

Diedut nr. 3/2007

Boazodoalu máhtut áiggis áigái

Etniid doaibma árbevirolaš oahpaheamis boazodoalus.

Solveig Joks

Ovdasátni

Čálos lea boadus golmma jagi dutkanprošeavttas “Mánáid sosialiseren boazodollui nissonolbmuid geahčastagas” mii álggahuvvui 2002 čavčča ja loahpahuvvui juovlamánu 2005. Prošeavtta leat ruhtadan Boazodoalu Ovdá-nahttinfoanda ja Sámi Instituhtta.

Mun giittán erenoamážit Sievju orohaga boazodoalliid ja buot nissonolbmuid geaid mun lean jearahallan. Sii leat buriin mielain juohkán munne dieđuid iežaset boazodoalloeallima ja -bargguid birra. Buohkat leat diktán mu maiddái geavahit sin namaid čállosis.

Giittán maiddái Sámi Instituhta ovddeš direktevrra Audhild Schanche gii lea bagadallan dán čállosa álgogeahčen. Dasto giittán dálá direktevrra Jelena Porsanger gii lea viššalit lohkan čállosa ja bagadallan. Svanhild Andersen ja Káren Elle Gaup leaba guktot lohkan ja árvvoštallan čállosa, ollu gitu sudnuide. Giittán Máret Sárá ja Inger-marie Oskal geat leaba divodan giela.

Guovdageaidnu, juovlamánu 21. b. 2007

Solveig Joks

Sisdoallu

| | |
|--|----|
| 1 Álggahus | 7 |
| Boazodoalu organiseren | 8 |
| Boazu ja eatnamat..... | 10 |
| Siiddastallanvuohki rievdagoohtá..... | 12 |
| Čuolbmačilgehus ja metoda | 14 |
| Čállosa hábmen | 16 |
| 2 Boazosámi nissonolbmuid sajádat ja doaimmat ovddeš áiggis otnážii..... | 17 |
| Boazosámi nissonolbmuid sadji Finnmárkku boazodoalus | 18 |
| Boazosámi nissonolbmuid sadji Ruota bealde | 19 |
| Boazodoallonissonolbmuid sadji eará guovlluin | 21 |
| Boazosámi nissonolbmuid árbevirolaš eallin Guovdageainnus..... | 23 |
| Siiddastallanvuogit váikkuhit nissonolbmuid dillái | 26 |
| Boazosámi nissonolbmuid riekti ja sadji ovddeš áiggis..... | 27 |
| Árbevirolaš bargojuohku nissonolbmuid ja almmáiolbmuid gaskka..... | 28 |
| Mo lábat ja njuolggadusat čuhcet nissonolbmuid dilálašvuhtii | 30 |
| Nissonolbmo doaibma iešguđetláhkái guovllus guvlui..... | 31 |
| 3 Sosialiseren ja máhttu – guovddážis árbevieruid sirdimis | 33 |
| Sosialiseren..... | 33 |
| Máhttofievrrideapmi..... | 36 |
| Álgoálbmotmáhttu ja dieđalaš máhttu..... | 37 |
| Álgoálbmotmáhtu sadji ja doaibma..... | 38 |
| Geavatlaš máhttu | 41 |
| 4 Boazosámi mánáid sosialiseren..... | 45 |
| Oahpaheapmi bargguid oktavuođas | 45 |
| Čakčat mearragáttis | 46 |
| Čohkkenáigi | 47 |
| Gidda ja geassi..... | 48 |
| Oktavuođat earáiguin..... | 48 |
| Olbmo ja bohccuid gaskavuođat | 49 |
| Bealljemearka | 49 |
| Diiddat | 51 |
| Hállu daguid vuodđu | 52 |
| Heivehit iežas luonddudilálašvuodaide | 54 |
| Muitalusaid doaibma | 55 |
| Duolbmat alccesis luotta | 58 |
| 5 Boazodoallomáhtuid fievrrideapmi | 60 |
| Oahppat oassálastima bokte | 60 |
| Oaidnit, dovdat ja dájdajdit | 60 |

| | |
|---|-----------|
| Árvvoštallat | 64 |
| Boazodoalu giella | 64 |
| Boazu oahpaha..... | 67 |
| Gessot guovlluide ja gulahallat daiguin | 69 |
| 6 Sihkkarastit máhtuid sirdima | 72 |
| Boazodoallomáhtu ipmárdus | 72 |
| Skuvla- ja árbevirolaš máhtu ruossalasvuodat | 74 |
| Mánáid oassálastin ollesolbmuid bargguin | 75 |
| Boazodoalu iešvuodat..... | 77 |
| Skuvladoaibma árbevirolaš máhtu oahpaheamis | 78 |
| Boazodoalu oahpaheami mánjggabealatvuodat | 79 |
| Máhtu dehálašvuhta boahttevaš boazodoalu bisteavašvuhtii..... | 81 |
| Árbevirolaš máhtu oinnolašvuhta ja viidodat..... | 81 |
| Máhtu aktiivvalaš sirdin | 83 |
| Manne seailluhit máhtu? | 83 |
| Boazodoallomáhtu seailluheami eavttut boahtteáiggis | 84 |
| 7 Loahppasánit..... | 86 |
| Boazodoallomáhtu dovdomearkkat..... | 87 |
| Máhtu mearkkašupmi | 88 |
| Gáldut..... | 91 |
| Čoahkkáigeassu..... | 97 |
| Summary | 99 |

1 Álggahus

Boazodoallu man vuolggasadji lea goddebivdu, lea leamaš Sámis juo mánja čuohtejagi. Bearrašat leat johtán bohccuideasetguin áiggiid čađa. Sin máilmimi-oaidnu, vierut ja máhtut leat sirdašuvvan odđa buolvvaide áiggis áigái. Ollu boazodoallomáhtuin bohciidit boazodoalu guovlluin gos olbmot johtet ja ellet. Olbmuid birgejupmi leage guovddážis. Rievdadusat sihke boazodoalu siskko-bealde ja servodagas muđui leat dagahan odđa dilálašvuodaid, ja odđa máhtut leat čuožžilan. Leat dattetge ollu oasit boazodoalus mat leat bisuhuvvon áiggiid čađa nugo ovdamearkka dihtii johtin. Boazu guohu iešguđetlágán šattuid ja danne johtá iešguđetlágán eatnamiid gaskka. Leat erohusat guovlluid gaskkas gos bearrašat johtet, ovdamearkka dihtii lea suolo- ja nannánjohtolagain erohus. Go mearra lea johtolagas, de gáibida dat máhtuid mat eai leat seamma dárbbašlaččat boazo-sámiide geat johtet nannámis.

Dábálaččat boazosámit leat lullieatnamiin dálvet ja geasset fas davvi-eatnamiin. Johtima bokte leat sii hákhan máhtuid sihke eatnamiid ja bohcco luonduu birra. Dasa lassin gullet maiddái eará bealit johtimii nugo gálvofievrrideapmi, lávostallan, bivttasteapmi, biebmoháhkan ja muđui buot eará bealit mat gusket birgejupmái. Bohccos fidne olmmoš sihke bierggua ja ávdnasiid, ja dasa dárbbaša máhtu diehtit makkár bohcco lea buoremus njuovvat iešguđetge dárbbuide. Jus ovdamearkka dihtii áigu goarrut čikŋabeaskka, de fertesii misiid njuovvat juo suoidnemánuus dahje borgemánu álgogeahčen go dalle lea guolga fiidnámus.

Barggut rievddadit jagi mielde. Leat vissis áigodagat goas njuovada, goas gápmasiid váldá, goas náhkiid navilda ja nu ain. Jagiáiggit ja jahkodagat leat máŋgjalágánat ja dat gáibidit iešguđetgelágán heivehemiid. Máŋggat bearrašat sáhttet ovttas guođohit ealu, ja nu maiddái johtetge fárrolaga. Leat earát fas geat johtet lahkalagaid ja geaiguin ferte gulahallat vai ii masstatt. Muhtun barggut leat álo leamaš, earát fas jávket, rivdet dahje odđasat bohret sadjái. Nugo dilálašvuodat rievddadit guovllus guvlui, de dat maiddái sáhttet rievddadit bearrašis bearrašii, ja vel olbmos olbmui. Eaige buot bearrašat vuorut bargguid seammaláhkái. Leat dieđusge maiddái oktasaš barggut nu guhká go boazodoallu jođihuvvo árbe-virolaččat, mas ovdamearkka dihtii johtolatstruktuvrrat ja sosiála organiseremat bisuhuvvojtit. Buot dát leat máhtut boazodoalus, man vuolggasadji lea eallinvuohki ja birgejupmi. Oahppan álggahuvvo mánnán ja dahkko sihke bargguid, muitaleami, vánnddardeami ja duhkoraddama bokte.

Boazodoalu eallinvuohki gáibida ovttasbarggu ja gulahallama jus doaibma galgá lihkostuvvat buoremus láhkái. Ollu olmmošlaš bargonávccat dárbbašuvvojtit jus boazodoalu galgá sáhttit fievriridit árbevirolaš málle mielde, nugo ovdamearkka dihtii johtit, guođohit, mearkut, ávnnastit ja duddjot. Go leat

májggat iešguđetgelágán doaimmat, de góibiduvvo máhtoviidotat mii ii leat dušše ovta olbmo duohken dan ollašuhtit. Muhto go leat bearraša olbmot geain leat iešguđetlágán máhtut, de dat ovttas devdet boazodoalu dárbbuid. Nisson-olbmuin lea omd. májgi eará doaibma go almmáiolbmuin, ja nu šadetge sis maiddái earálágán máhtut ja vásáhusat. Leat maiddái áigodagat nugo čohkken, rátkkašeapmi ja njuovvan goas lea dárbašlaš ahte ollugat servet mielde. Njuovadtettin omd. lea lunddolaš ahte nissonolbmot geat duddjojit, leat válljemín gápmasiid dahje beaskanáhkiid.

Boazodoalus lea dehálaš máhttit gulahallat earáiguin, ja danne lea oktasaš giella ja oktasaš áddejupmi dehálaš. Bohccuid omd. dávjá mastet eará siiddaid ealuide, mii mearkkaša ahte bohccot šadet earáid hálđui. Buorit oktavuođat eará siiddaid olbmuiguin lea mívssolaš go iežas bohccuid galgá oažžut ruovttoluotta. Máhttit gulahallat lea ávkin jus olmmoš galgá bures lihkostuvvat.

Boazodoalu organiseren

Boazodoalus lea viiddis organiseren mas boahťa ovdan ahte olmmošlaš bargonávccat ja oktasaš bargoguoimmit bidjet vuodu ealáhusa doibmii. Georg Henriksen (1994: 200–201) oaivvilda ahte arktalaš álgoálbmogiin lea seamma-sullasaš vuohki organiseret servodagaid. Fuolkevuhta lea joavkkuid organiseren-vuodđu, mas lea stuorra heivehanmunni. Joavkkuid sturrodat ja miellahtut molsašuddet dan ektui makkár vejolašvuodđaid ja góibádusaid iešguđet jagiáiggit buktet. Boazodoalus lea maiddái dábálaš ahte miellahtut molsašuddet go geasse-siidda olbmot eai dárbaš leat seammát go dálvesiidda olbmot.


Boazodoalu válđoásahusat leat báikedoallu ja siidoallu. Mikkel Nils Sara (2001) meroštallá báikedoalu čuovvovačcat:

Báikedoallu, mii lea doaibma dehe visot barggut mat galget dáhkidit iešbirgejumi. Lea báiki mii oktiibuot galgá háhkat alcces gaskaomiid mat dárbbahuvvojít barggu doaimmaheapmái ja eallámuššan, ja mii galgá vástidit bargogeatnegasvuodđaid ovddas siidda siste. (Sara 2001: 85–86.)

Sienda lea moattit dahje májggat báikedoalut, mat leat searvan ealu guođohit ja gohkket oktii ráđiid (Sara 2001: 94). Dábálačcat gullet ovta siidii bearrašat, áhkut, ádját, oappážat, vieljažat dahje eará lagaš fulkkežat (geahča mu 1. govvosa). Muhto okta báikedoallu sáhttá maiddái doaibmat siidan. Eai dárbaš seamma báikedoalut gullat seamma siidii miehtá jagi. Báikedoallu sáhttá siiddastallat earáiguin geasset go dálvet, ja sáhttá leat maiddái sierra siidan dálvet.

Sámi árbevirolaš boazodoalloorganiseren lea vuodđuduuvvon fuolkevuhpii (Joks 2005: 41).

Govus 1. Boazodoalu organiseren



Genealogija govvosa ruvttuid siste leat iešguđetgelágán bearashaštuvrrat mat ovddastit iešguđetge báikedoalu. Báikedoalus, mii lea gurut ravddas, leat áhku, su guokte bártni, nuppi bártni eamit ja sudno mánát. Dasto lea nuppi ruvttos seamma áhku nieida oktan isidiin ja mánáiguin sierra báikedoalus. Goalmmát ruvttos lea fas áhku sivjot oktan eamidiin ja mánáiguin. Majemuš ruvttos siste oaidnit fas ovddit báikedoalu bártni, gii lea náitalan ja lea ásahan sierra báikedoalu. Buot dát namuhuvvon báikedoalut servet oktii ja ásahit oktasaš siidadoalu. Genealogija govus čájeha ovdamearkka mo bearashaštut sáhttet ovddastit báike-

doalu. Sáhttet ollu eanet molssaeavttut, nugo ovdamearkka dihtii eadni bártnii-disguin. Govus čájeha dušše ovta mánjga eará vejolašvuodas.

Robert Pehrson (1957) gii lea dutkan mo sosiála oktavuođat doibmet Geaggánvuomi boazodoalločearus, mii lea Ruota beale Gárasavvonis, oaivvilda ahte joavkomiellahttuvohta ja kollektiivvalaš vuogatvuodat sirdašuvvet sihke nissonolbmuid ja almmáiolbmuid bokte. Geaggánvuomi sámiin eai leat danne ovttageardánis njuolggadusat dasa goappá sohkabeali bearrašii náittosguoimmit galget ásaiduvvat, ja juohke dilálašvuhta ferte danne iskot, oaidnin dihtii makkár oasit váikuhit válljemii, čuočeuha Pehrson. Oasit mat mearridit fárreba go eamida vai isida siidii, leat ekologalaš dilálašvuodat, bearrašiid valljivuhta, náittosguimmiid váhnemiid dahje vieljaid ja oappáid stáhtus, olmmošlaš bargo-veahka, náittosguimmiid ahki, ja demográfalaš dilálašvuhta. Go vuhtiváldá dáið osiid, de lea seamma vejolašvuhta ásaiduvvat eamida jovkui, mii servodatfágas gohcoduvvo *uxorilocal* ja nuppe beales gohcoduvvo fas *virilocal* go náittosguimmežat fárrejít isida jovkui. (Pehrson 1957: 66–67.) Finnmárkku boazodoalus leat seamma prinsihpat vuodđun siidaasaheamis go Geaggánvuomis oaivvildeaba Nils Oskal ja Mikkel Nils Sara (2001). Go báikedoalu bohcot leat searválagaid eará báikedoalu bohccuiguin siiddas, de mearkkaša dat ahte go ođđa báikedoalut ásahuvvojit, eanaš áigge náitaleami oktavuođas, de ferte maiddái báiki mearri-duvvot earret dalle go náittosguimmežat gullaba ovta siidii. Go ii leat njuolggadus mii dadjá goappá sohkabeali siidii galgaba ásaiduvvat, de árvvoštallo dilálašvuhta dainna lágiin ahte ekologalaš ja sosiálalaš bealit gessojuvvoyit ovdan go báikki galgá válljet. (Oskal ja Sara 2001: 304.)

Nugo boaháa ovdan mu dutkamušas *Boazosámi nissonolbmot, guovddážis báike- ja siidadoalus muho vajálduvvon almmolačcat* (Joks 2001), de lea dihto juohku báikedoallo- ja siidadoallobargguin. Siidda barggut juogaduvvojit báike-doaluid gaskka, nugo guođohanvuorut. Siidda oktasaš bargguide gullet ee. gárddá-stallamat ja daidda ráhkkanameamit, nugo ovdamearkka dihtii gárddiid ceggen ja divodeamit. Siiddas šiehtadallet goas ealu bidjet gárdái, ja goas rátkkašit. Báikedoallobargguide gullá fas bearraša boazodoalu hálddašeapmi, nugo rehketdoallu, boazodoallodieđáhus, doarjaoħcamat omd. boraspirevhágiid ovddas. Nissonolbmot omd. duddjojít dálvesujiid, geassesujiid ja čiŋaid. Báikedollui gullá maid-dái biebmo- ja ávnناسرাদjan. Dasa lassin lea ráhkkanapeapmi oassin báikedoallobargguin nugo fievrridit horsttaid, lávžžiid, borramušaid, bensiinnaid ja loavda-giid. Barggut čatnasit oktii dan láhkái ahte báikedoalu ja siidadoalu barggut dagahit ollisvuoda boazodoalus (Joks 2001: 6).

Boazu ja eatnamat

Boazu dárbbaša molsašuddi ealáhaga jus galgá birget buoremus láhkái ja danne leat guohtondilálašvuodat guovddáš ášši boazodoalus. Boazobargi ferte dovdat

eatnamiid nu bures ahte diehtá gos boazu buoremusat sáhttá gávdnat guohtuma iešguđetlágán áigodagas. Buot jagit eai leat ovttalágánat ja danne ferte maiddái diehtit mo dálkkádat ja muohtadilálašvuhta váikkuhit guohtumiidda. Mikkel Nils Sara (1994) čálláge, ahte eatnamiid ja guohtuma árvvoštallan ii sáhte dahkkot almma dálkkádagaid ja muohttaga vuhtiiváldima haga.

Boazodoalus lea eatnamiid válđojuohkin davvi (alli) ja lulli (máddi) gaskka. Dát guoská maiddái guovlluide gos boazu lea seamma eanaviidodagas birra jagi. Doppe fertejít maiddái leat eanaoasit mat sulastahttet davvi- ja lullieatnamiid, nu ahte dat duhtadit bohccuid dárbbuid. (Sara 1994: 30.) Go boazobargi dovdá iežas bohccuid johtolaga, de oahpásmuvvá daidda guovlluide ja eatnamiidda.

Boazosápmelačcat fertejít maiddái diehtit iešguđetlágán bohccuid doaimma ealus go dat váikkuha ealáhii ja johtimii. Ovdamearkka dihtii lea nulpu valli čuollat čeärgga ja ráigá dan nu ahte čearpmahat olahit guohtuma. Muhtun bohccot johtalit ealus eanet go earát vaikke bohccot gal maiddái mannet dohko gos lea ealát, erenoamážit čakčat johtá boazu viidát go haksá guopparhája.

Johan Turi (1987 [1910]) čállá ahte go olmmoš lea hui čeahppi guođohit, de ealiha bohccuidis ollu buorebut go dat guhre ii máhte riekta stivret. Geassebáhkat ja divrriit čuhcet bohccuide ja dan ferte boazosápmelaš eastadit buoremus láhkái. Ovdamearkka dihtii diehtá boazosápmelaš, ahte bohccuid gávdna báhkkán alážiid alde dahje jus leat jiehkit ja jasat, de boazu bálgá dohko. Doppe lea gálus ja eaige gávdno divrriit. (Turi 1987 [1910]: 70.) Guottetáigge fertejít maiddái boazosápmelačcat erenoamážit váruhit bohccuideaset boraspíriin. Dalle leat boraspiret uhkádussan aiddo šaddan misiide ja vel rieban ja goaskin leat várálaččat. (Sikku ja Torp 2004: 55.)

Dovdat iešguđetge bohcco olgguldas hámiid nugo mearkka, guolggaa ja luonduu bokte leat dehálaš máhtut. Go dovdat bohccuid olgguldas hámi bokte, de áiccat jođánit iežat siidda bohccuid go leat mastan kránnjásiidda čorragiidda. Dovdat bohccuid mihtilmasuodaid, nugo bohcco mii lea oaivugas, bohcco mii orru ealu ravddas, guovdu dahje lea dakkár mii bázada leat dárbbašlaš dieđut. Go bohcco mihtilmasuodaid dovdá, de lea maid vejolaš fuomášit go soamis váilu ealus.

Oahppat dovdat johtolagaid, eatnamiid ja bohccuid gáibida dárkilis máhtuid. Dutki Collinder (1932) gii jođii Sámis badjel 70 jagi áigi dassái, lohká ahte johtisápmelačča eallin lea hábméjuvvon boazodoaluin. Son dovdá bohcco ja buot mii gullá boazodollui, ja das lea ráhkadan olles diehtaga. Nugo arábialaš beduiidna, de lea son čeahpes anatomihkar. Son dovdá bohcco gorutosiid ja orgánaid, ja daid namaid. Sápmelačča attáldat dovdat iežas ja earáid bohccuid ja earuhit daid iešguđetge hámiid bokte lea Collindera mielas hirpmástuhtti. Boazosápmelaš govvida bohcco seamma sihkkarvuodain go botanihkar iská amas šattu dahje kemihkár analysere iskosa. (Collinder 1932: 19–20.) Dan áigge go Collinder jođii Sámis, de ohppa mánát das go oassálaste beaivválaš eallima doaimmain.

Siiddastallanvuohki rievdagaohtá

1960-logu álgogeahčen ájihišgodii skuvla eambbo ja olbmot ássagohte čoahkkebáikkiin. Ovddeš áigge barge mánát ovttas váhnemiiguin, fulkkiiguin, siida-guimmiiguin dahje ovtaahkásáččaiguin (Balto 1997: 95, Jernsletten 1997: 98, Eira 2004: 16). Dasa lassin go mánát ohppet konkrehta barggu, de ohppet maiddái bargobirrasa sosiála ovttastallama norpmaid (Balto 1997).

Nils Jernsletten (1997) govahallá mo mánáid oahppan lea rievdán ovddežis otnážii. Ovddeš áigge čuvvo mánát mielde ja guldaledje go ollesolbmot ságastalle. Sii oassálastigohte árrat ollesolbmuid bargguide, ja nu sii dađistaga ohppe, ja besse hárjehallat. Go sis ledje persovnnalaš bargovásáhusat, de sáhtte áddet maid-dái ollesolbmuid ságastallama ja máinnasteami ja maiddái ieža oassálastit. Nu sii maiddái besse oahppat giela ja sátneriggodaga. Sin máhttu viiddui dan mielde go guldaledje ja ieža oassálaste. Eatnamat, mearra, deanut, jogat ja jávrrit leat leamaš Sámi ja eará smávva servodagaid laboratoria gos nuorat leat hárjehallan ja oahppan. Odđa áigásáš oahppovuogit eai sáhte ollásit vástidit dološ oahppovugiide. Jus skuvlaoahpahussii ii lasihuvvo birasoahpahus gosa máhttu gullá, de jávket dehálaš máhttooasit. Nu šaddet sámi skuvllat dušše nama dáfus, muhto sisdoallu gal lea eurohpalaš. (Jernsletten 1997: 98–99.) Lea mearkkašanveara dás ahte Jernsletten veardida sápmelaččaid oahppanbirrasa laboratoriain. Dás ovdalis leat oaidnán mo fas Collinder (1932) oinnii boazosápmelačča botanihkarin ja kemihkárin go dovdá bohcco nu dárkilit. Jernsletten govvida ges olles birrasa laboratoriain gos mánát leat geahčaladdan, hárjehaddan ja dađistaga oahppan. Lea miellagiddevaš ahte goappašagat veardideaba sámi bargovugiid dieđalaš bargguin mat adnojít oarjemáilmmi oainnu mielde oalle alla diedan. Jernslettena ja Collindera buohtastahttimis oaidná ahte eai leat čielga dikotomijat árbevirolaš ja oarjemáilmmi dieđalaš máhtu gaskka.

Siiddastallan rievdagodii 1960-logus Guovdageainnus go nissonolbmot ja mánát eanet orrugohte čoahkkebáikkiin. Mánát vázzigohte skuvlla measta birra lagi ja sis unnui vejolašvuhta oahppat siidabargguid beaivválaš eallimis. Mánát ledje eanaš áigge skuvllas ja orro internáhtas dahje etniid luhtte čoahkkebáikkiin. Internáhtta loahpahuvvui Guovdageainnus 1990-logu gaskamuttus, ja das manjá šattai maiddái váhnemiidda váddásat guođđit mánáideaset vaikke livččiige lean dárbu dahje hállu vuolgit siidii. Rievdan dagahiige ahte eatnit šadde vel ain deháleappot mánáide, nugo báikedoalus gos mánát eanaš áigge orrot skuvlaváccidettiin. Eatnit leat maiddái ráhkkanahttimin mánáid siidda bargguide. Sii leat ieža mánáiguin doppe dahje lágidit dilálašvuoda nu ahte mánát álkit besset vuolgit siidii. Vaikke boazodoalu struktuvrrat doalahuvvojit nugo siiddastallan, johtin, guođoheapmi, de leat rievdamat álgán moaddelogi lagi dassá, mat leat ere-noamážit váikkuhan nissonolbmuiide ja mánáide. Mánát ledje boazodoalu boahtte-áigi, ja máhtuid maid sii dárbašedje ledje sii oahppan váhnemiin, áhkuin, ádján ja muđui birrasis, gos sii ásse ja vánddardedje. Boazodoalu struktuvrrat doala-

huvvojit mealgat muddui, muhto struktuvrrat boazodoalu olggobealde rivdet, nugo skuvlavázzin ja ássan čoahkkebáikkiin. Jearaldat lea mo máhtuid sáhttá fievrridit viidáseappot go lunddolaš máhtoháhkama dilálašvuodat rivdet. Skuvlavázzima guhkideapmi, viessohuksen čoahkkebáikkiide ja odđa teknologijia mii váikkuhii boazodollui ledje faktorat mat rievdadedje boazodoalu. Bearrašat eai johtán šat siidda mielde nugo lei dábalaš gitta 1960-lohkui. Nilsen ja Mosli (1994) leaba guorahallan mo boazodoallu doaimmahuvvui Guovdageainnus 1960-1993. Sudno čilgehusa mielde lei árbevirolaš boazodoallu bargonávciaid duohken. Barggut nugo guodoheapmi, johtin, rátkkašeapmi, mearkun, njuovadeapmi ja duddjon leat nu manjxit go 1960-logus doaibman measta dušše fal mekánalaš veahkkeneavvuid haga.

Skuvlavázzin guhkiduvvui, mii čuozai maiddái boazodollui. Birrasii 1965:s álggahuvvui 9-jagi skuvla Guovdageainnu suohkanis, mii lei máŋga jagi manj Jágo omd. eará sámi gielldain nugo Buolbmágis, Unjárggas ja Kárásjogas. Ovdal go 9-jagi skuvla álggahuvvui, de lei johtisámemánái skuvla skábmamánu rájes gitta beassážiid rádjái. 9-jagi skuvla dagahii, ahte skuvlajahki guhkui. Guhkes skuvlajahki, mii lei borgemánu gitta geassemánu rádjái, hehttii mánáid beassamis mielde boazodoallo barguide seammaláhkái go ovdal ledje dahkan. Guhkit skuvlavázzin dagahii ee. ahte mánáin šattai maiddái skuvla giđđa- ja čakčajohtima áigge.

Anton Hoëm (1976a) cállá mo Guovdageainnu johtisápmelaččaid searvi celkkii iežas jahkečoahkkimis juo 1961, ahte searvi ii vuosttil 9-jagi skuvlla ceggema, muhto 7. luohká rájes fertejit johtisámemánát ieža beassat válljet makkár fidnooahpahusa sii hálidot. Báikkalaš searvi oaivvildii ahte seammás go 9-jagi skuvla galggai leat eaktodáhtolažjan, de berrii maiddái manjumuš skuvlajagis leat oahpahus ruovttus oassin boazodoalu fidnooahpahusas. Johtisápmelaččaid searvi oinnii skuvlla golbma manjemuš jagi fidnoráhkkaneapmin. Fidnooahpahus maid skuvla fálai dieid jagiid, oidnojuvvui heajubun go oahpahus maid sii ieža sáhtte addit mánáidasaset. Hoëm mielas orrot boazosámit oaivvildeamen ahte boazodoalu ja skuvlla vuogádagat ovddastedje guovttelágán eallinvuogi, mas goappašat ásahusat geahčaledje čeahppudahttit mánáid iežaset erenoamáš birrasii. Nu boazosámiin lei duohtha ballu ahte skuvilla geažil mánát guđđet iežaset ovddeš eallinvuogi. Oaidnu bodii ovdan go boazosápmelaččat oaivvilledje, ahte mánát geat ledje dan buoremus oahppanagis gaskal 7 ja 16 jagi, hárjánedje birrasii mii dagahii sin dohkemeahttumin johtisápmelažjan. (Hoëm 1976a: 67–68.)

Teknologijia bodii boazodollui 1960-logus ja geahpedii johtima. Dalle šattai álkit siidda olbmuide ollet johtilit čoahkkebáikkiide. Dálloceggen čoahkkebáikkiide lassánišgođii ja nissonolbmot ledje dat geat eanaš áigge orro dáluin. Isidat sáhtte fitnat ealu guodoheamen ja boahtit dávjxit čoahkkebáikkiide gos beará ásai. Muohtaskohteriin ii ádjánan go moadde diimmu dan sadjái go čuoigga sáhtii ádjánit manggaid diimmuid ja vel beivviidge.

Vaikke boazosápmelaččaid dilli rievddai dalle go skuvlavázzin guhkiduvvui, dálut ceggejuvvvojedje čoahkkebáikkiide ja skohter váldui atnui, de bisuhuvvo ain ovddeš organiserenmálle mas moattit báikedoalut searválagaid ásahit siidadoalu. Go ovddeš organiserenmálle bisuhuvvo, de mearkkasha dat ahte ollu barggut, doaimmat ja sosiála dilálašvuodat nugo seamma siidda báikedoaluid gulahallan gaskaneaset ja gulahallan eará siiddaiguin doalahuvvo.

Čállosis guorahallo makkár máhtut boazodoalu siskkobealde leat ja mo dat háhkojuvvvojitet. Lea dehálaš diehit ja áddet mo máhttofievrrideapmi dáhpáhuvvá boazodoalus ja mo dat spiehkasta eará máhttofievrrideamis. Boazodoallu dárbaša beassat nuppiid buolvvaide fievrredit máhtuidis, ja danne lea dehálaš ahte čuvgejuvvo ii dušše makkár máhtut doppe leat, muhto maiddái manne dat leat dehálaččat. Eisevalddiide geat leat njunnožis láhčimin dili ja mearrideamen sáme-guoski ášsiid, lea ávkkalaš diehit makkár váikkahuusat sáhttet čuožžilit boazodoalu eallinvuohkái go stuorraservodat dakhá rievdadusaid mat čuhcet mánáid ja bearrašiid dillái boazodoalus.

Čuolbmačilgehus ja metoda

Servodaga odđa gaibádusat leat váikkuhan boazodollui, nugo omd. 9-jagi skuvla mii dál lea guhkiduvvon 10-jahkái, lea dagahan ahte mánát leat dál unnit áiggi beaivválaš boazodoallobargguin. Rievdadusat mielddisbukte ahte mánát leat čoahkkebáikkiin etniid luhtte skuvlla váccidettiin. Otná boazodoalus ii leat šat ovddeš máhttofievrrideapmi, mii dahkui beaivválaš eallimis go mánát ledje eanaš áigge doppe gos boazodoalu barggut doaimmahuvvvojedje. Jearaldat lea mo máhtut odne fievrividuvvojitet, ja makkár doaibma etniin lea dán oktavuođas go sii leat mánáiguiin ovttas dan áigge go áhčit leat ealu luhtte. Diedusge sáhttá leat maiddái nuppeláhkái, ahte mánát leat áhčiid luhtte ja eatnit leat ealu luhtte, muhto dás mun guorahallan dušše daid bearrašiid, gos etniid váldodoiba lea báikedoaluin.

Go organiserenmálle bisuhuvvo, de lea jáhkkimis ahte seamma máhtut dárbašuvvvojitet mealgtat muddui odne go ovdalis áigge. Boazodoalu mánjgabéalat barggut sihke báikedoalus ja siidadoalus góibidit ain máhttoviidodaga. Gažaldat lea mo máhtut fievrividuvvojitet ja oahpahuvvvojitet odne boazodoalus go ovddeš siiddastallanvuohki mas olles bearáš lei searválagaid ii gávdno šat.

Go nissonolbmot leat guovddážis mánáid beaivválaš eallimis boazodoalus, de sáhttá geažidit ahte nissonolbmuin lea guovddáš doaibma máhttofievrrideami oktavuođas. Jearaldat lea makkár doaibma nissonolbmox lea otná boazodoalus, go siiddastallanvuohki gos olles bearáš jodii bohccuiguin lea rievdan? Lea dalle lundolaš guorahallat vuos mo nissonolbmo doaibma lei ovddežis ja mo dat lea rievdan otnázii. Máhtut čuvvot bargguid mielde, ja nu leage mívssolaš geahččat makkár barggut bisuhuvvvojitet ja makkár barggut fas jávket. Gažaldat lea maiddái mo máhttofievrrideapmi ja máhtut sáhttet doalahuvvot vaikke oassi boazodoalus

leage sirdašuvvan čoahkkebáikkiide, ja mánáid skuvlavázzin lea dál measta birra lagi. Sáhttá maiddái jearrat, ahte makkár kultuvrralaš ávki lea máhttofievri-deamis.

Namuhuvvon gažaldagaid vástideapmái, geavahan iešguđetlágán gálduid. Lean čohkken dieđuid čálalaš gálduin ja lean jearahallan nissonolbmuid ja daid gaskkas maiddái nissonolbmuid geat ieža leat bearrašiiguin johtán siidda mielde. Muđui lean čuvvon ovta bearraša ja sin siidda 2003-2005. Doppe lean geahčalan oaidnit sin bargguid ja erenoamážit bargguid maid nissonolbmot dahket, ja muhtun muddui oassálastán sin beaivválaš eallimis.

Mun lean 2002 skápma ja 2003 álgogeahčen jearahallan guokte vuorrasut nissonolbmo ja golbma nissonolbmo geat ledje gaskkamuttus 50-jagiid ja badjel 60 lagi. Sii leat buohkat Guovdageainnus eret. Gažaldagat maid jerren ledje juhkkjuvvon fáttáid mielde. Buot jearahallamat leat báddejuvvon. Ságastallan lea leamaš sin orohagaid birra sihke ovdal náitaleami ja náitaleami manjjá. Sii muitaledje mo sii mánán ohppé, ja mo fas sii ieža oahpahedje mánáideaset. Oahppama ságastalandettiin lei deattuhus máhtuide mat leat dehálaččat jus galgá lihkostuvvat boazodoaluin.

Čálalaš gáldut leat eanaš Davvi-Sámi guovlluin. Girjegálduin lean erenoamážit gidden fuopmášumi nissonolbmo bargguide ovddeš áigge, mánáid bargguide ja mo nissonolbmot govviduvvojedje dan áigge. Dieđuid maid lean čohkken girjiin ja go lean jearahallan vuorrasut nissonolbmuid, galget sihke čalmmustahttit sin doaimmaid boazodoalus ovddežis ja leat vuodđun buohtastahitimii dálá áiggiin, dahje čájehit mo muhtun barggut ja máhtut leat seilon ja earát fas jávkán.

Boarráseamos girjjit leat čállon 1800-logus ja 1900-logu álgogeahčen, ja dalle ferte atnit muittus ahte eanaš girječállit dan áigge ledje almmáiolbmot. Ollusat sis leat govven sápmelaččaid eallima oppalaččat, eaige leat sirren almmáiolbmuid ja nissonolbmuid doaimmaid. Antropologa Andrea Amft (2000) oaivvilda, ahte sámi nissonolbmuid dilálašvuhta lea unnán oidniosis historjjálaš ja antropolologalaš/etnologalaš dutkamušas.

Mun lean maiddái čuvvon Oarje-Sievju orohaga, mii gullá Guovdageainnu nuortajohtolahkii, 2003 geasi miessemearkuma rájes gitta 2005 dálvvi rádjái. Dás lean geavahan filbmakamera, ja lean čuvvon erenoamážit Ailo Kemi, gii lei 11-jahkásaň dalle go filbmegohten. Son, su váhnemät ja su siidaguoimmit leat munne čalmmustahttán mo oahpahheapmi dáhpáhuvvá.

Lean ieš beassan leat mielde doppe gos barggut dahkkojuvvojedje ja oahpahuvvojedje. Boazodoalu iešguđetlágán guovllut bidjetge maiddái vuodu máhtuide ja lea dehálaš máhttoháhkama oktavuođas.

Nissonolbmuid ovddeš áigge doaibma boazodoalus lea rievdan. Dattetge leat sii dárbašlaččat boazodoalus sihke sin máhtu geažil ja máhttofievrrideami oktavuođas. Sihke ovdalaš áigge govahallamat ja čielggadeamit boazosámi nissonolbmuid hárrái ja mu iežan jearahallamat ja čuovvumat čuvgejít mo nissonolbmo

dilálašvuhta lea rievdan, muhto das leat maiddái oasit mat leat bisuhuvvon. Lea dehálaš bidjat deattuhusa rievdamidda, muhto liikka dehálaš lea deattuhit daid beliid mat leat bisuhuvvon. Bealit mat leat bisuhuvvon sáhttet boktit min fuomášumi daidda, sihke mo dat doibmet ja mo dat leat čadnon otná boazodoalu jođiheapmái. Dutkamuš čuvge maiddái mo rievdadusat náššuvnnalaš ásahusain, nugo skuvllas, váikkuha ealáhusaide ja eallinvugiide.

Guorahallan das mo mánát ohppet boazodoalu ja makkár doaibma nissonolbmuin lea oahpaheami oktavuođas, lasiha dutkamuššii dieđu boazodoalu ádde-jumis. Ollu dutkamuš lea dahkon boazodoalus, muhto eanaš dutkamuš guorahallá boazodoalu oppalačcat. Muhto dát čálus fuomášuhtá maiddái boazodoalu mánáid ja nissonolbmuid geahčastagas.

Čállosa hábmen

Mun geahčan boazodoalu máhttofievrrideami nissonolbmo geahčastagas ovddežis otnážii. Nissonolbmot geat leat juohkán munne dieđuid ovdastit moatti báike- ja siidoalo Guovdageainnus, mii lea stuorámus boazodoallosuohkan Norggas. Ollu seammalágán beliid sáhttá oaidnit boazodoalus muđui Sámis go boazodoallu lea belohahkii nomádalaš eallinvuohki. Muhto leat dattetge erohusat riikkarájáid, suohkaniid, orohagaid ja vel siiddaid gaskasge.

Nuppi kapihtalis lean guorahalan mo boazodoallonissonolbmuid doaibma lei ovddežis, ja mo sosialiseren dáhpáhuvai boazodoalus. Viidásut geahčan mo boazodoalu rievdan lea váikkuhan nissonolbmuide ja mánáide. Dasto guorahalan mo rievdamat lágaid bokte leat njulgestaga vealahan nissonolbmuid, ja maiddái mo lágat sáhttet váikkuhit dasa ahte nissonolbmo ovddeš sajádat boazodoalus ii leat šat seamma nanus go ovdal.

Goalmmát kapihtalis árvvoštalan mo sosialiseren ja máhttu čilgejuvvo. Go lea sáhka boazodoallomáhtuid fievrrideamis, de lea dárbbašlaš geahčcat mo álgoálbmotmáhttu árvvoštallo, ja mo dat buohtastahtto oarjemáilmomi máhtuiguin. Boazodoallomáhttu lea oppalohkái geavatlaš máhttu, ja mun guorahalan mo dat máhttu čilgejuvvo ja mat dan erenoamášvuodat leat.

Njealját kapihtalis guorahalan mo boazosámi mánát bajásgessojuvvoyit boazodollui, ja makkár doaibma etniin lea mánáid ektui. Dasto guorahalan viđát kapihtalis mo máhtut fievrividuvvoit mánáide, ja makkár hámis fievrrideapmi dahkko. Guđát kapihtalis digaštalan mo sáhtašii sihkkarastit, ahte máhtut sirdašuvvet mánáide boazodoalus. Dan oktavuođas geahčan mii lea dahkon servodatdásis dasa ahte máhttu galgá bisuhuvvot, ja makkár hástalusat čuožžilit. Loahpas guorahalan vel makkár árvu máhtuin lea go ságastallá boazodoalu doallevašvuodas, ja mo nissonolbmot leat dasa váikkuheamen.

2 Boazosámi nissonolbmuid sajádat ja doaimmat ovddeš áiggis otnážii

Nissonolmmoš birge hui bures boazobargguin go lea čađa oahppan buot bargguid ja lona-huvvan buot bargguide. Ja go vel nagoda gozistit dalle go dárbaša. Muhto luondu lea nu sivdmiduvvon ahte ii birra jagi dárbaš jur álo gohcit birra jándora.

(Máhte Máret, lohkkiid čálus Áššu áviissas guovvamánu 3. b. 2004.)

Boazosámi nissonolbmot eai leat homogena joavku. Sii leat májggalágán dilálaš-vuodain. Muhtumat barget sihke siidabargguid ja báikedoallobargguid ja earán lea fas dienasbargu boazodoalu olggobealde. Sii leat bearasholbmot dahje ovttaskas olbmot. Bargguid vuoruheamit eaige dárbaš buot áiggiid leat ovttalágánat. Muhtumat leat eanet siidabargguin go báikedoallobargguin. Earát fas atnet áiggi-set ja návccaideaset oahpahit mánáidasaset boazodoallobargguid ja árbevieruid vaikke sis lea maiddái bargu boazodoalu olggobealde.

Ferte maiddái atnit muittus ahte Guovdageainnu boazodoalus, mii lea guovddážis dán čállosis, lea girjáivuohta. Leat omd. sierra eavttut mat váikkuhit máhtuide. Vuosttažettiin bidjet guovllut eavttuid. Suolohasat dárbašit omd. earálágán máhtuid go njárggahasat. Dasto bidjet maiddái siiddaid ja ealuid sturro-dagat máhttoeavttuid. Stuorra siiddain omd. main leat ollu báikedoalut doppe eai dárbaš buot miellahtuin leat máhttoiidodat nugo unna siiddažiin main eai leat go moadde báikedoalu.

Boazosámi nissonolbmuid májggabealátvuhta dáidá leat dál eanet čal-bmáicuohcci go dallego bearrašat ledje čoahkis ja johte ovttas. Májggas leatge guorahallan mo nissonolbmuid dilálašvuhta ja barggut leat rievdan boazodoalus. Sii eai leat šat mielde beaivválaš boazobargguin, mii lea váikkuhan nissonolbmo doibmii boazodoalus (Komissar, Møystad ja Rognlie 1987, Eikjok 1990, Sara ja Karlstad 1993, Nilsen ja Mosli 1994, Karlstad et.al. 2002).

Earret eará Mariann Komissar, Mari Møystad ja Kate Rognlie (1987) guorahallamis mo nissonolbmuid dilálašvuhta ja sin barggut leat rievdan, oidno ahte ovddeš áiggiid ledje nissonolbmot eanet siiddas go dál, ja guođoheapmi leage šaddagoahtán aivve almmáiolbmuid bargun. 1978 boazodoallolága ulbmil lei oač-čuhit boazodolliid biergobuvttadeaddjin ja dan bokte oččodit ekonomalaš lassá-neami boazodollui (Björklund 2004: 128). Go biergovuovdin lassáníi, de árvvus-atnigohte eanet ealloravdabarggu go eará barggu boazodoalus. Árbevirolačcat

gulai olgobargu almmáiolbmuide ja viessobargu fas nissonolbmuide, muhto bargeját eai lean nu čavga go nissonolbmot ledje maiddái mielde guođoheamen, råtkkašeamen ja mearkumin. Dál orrot leamen ráját šaddan čavggabut. (Komissar, Møystad ja Rognlie 1987: 24–36.)

Nissonolbmo árbevirolaš barggut báikedoalus adnojit almmolačcat vuolit árvosažžan go siidadoallobarggut gos eanaš almmáiolbmot barget (Joks 2001). Jus galgá áddet sihke kultuvrralaš rievama ja bisuheami, de ii sáhte daid njulgestaga laktit struktuvrralaš rievdamidda, go kultuvra ii dárbbas rievdat seamma jođanit. Sivvan dasa lea, ahte kultuvrralaš ja morálalaš máhtut ja árvvoštallamat sirdašuvvet buolvvas bulvii goruha ja reflekterekeahes dábiid bokte. (Connerton 1989, Rudie 1995, Kramvig 1999.)

Dán kapihtalis guorahalan vuos nissonolbmuid iešguđetlágán sajádagaid boazodoallogouvlluin. Digaštallamii válddán mielde mo sin barggut leat rievdan ovddežis otnázii, ja mo fas eará barggut ja doaimmat leat bisuhuvvon. Lean jearahallan viđa nissonolbmos Guovdageainnus mo sii muijet boazodoalu jođiheami sullii 1900-logu gaskkamuttus. Váldogažaldat lea leamaš makkár doaibma nissonolbmuin lei daid áiggiid, ja mo dat ledje mielde hábmemin boazosámi nissonolbmo beaivválaš eallima. Guorahalan maiddái gáldodieduid, mat čilgejít nissonolbmuid doaimmaid ja rivttiid boazodoalus 1800-logu loahpageahčen ja 1900-logu álgogeahčen.

Boazosámi nissonolbmuid sadji Finnmárkku boazodoalus

Boazosámi nissonolbmuid dilálašvuodat leat rievdagaohtán iešguđetge áigodagain Finnmárkku boazodoalu guovlluin. Dábáleamos rievdadus lea ahte nissonolbmot orruohte čoahkkebáikkiin guhkkin eret siidadoaluin. Almmáiolbmot ledje dat geat guođohedje ealu ja orro maiddái muhtun áigodagaid sierra.

Erik Solem (1970 [1933]) gii lei sundi, čállá mo boazodoalu eallinvuohki ja hápmi ledje iešguđetgeláhkái Finnmárkku njealji boazodoallogouvllus, Várjjagis, Buolbmágis, Kárásjogas ja Guovdageainnus 1930-logus. Várjjagis ledje buot náittosbárain dállokoalut Várjjatvuonas gos eamidat oktan mánáiguin orro, ja isidat fas ledje siidadoalus. Lassin boazodoalloealáhussii lei bearrašiin arvat sisaboahdu dállokoalut ja danne ii sáhte sin gohčodit nomádan. Geasset ledje bohccot dábálačcat geahču haga. Buolbmágis ledje boazosápmelačcat dan manjemuš áigge huksegohtán dahje oastigohtán viesuid, muhto sin dállokoalut ii lean mearkkašupmi dietnasii ja danne áinnas dárbbas edje boazodoalu sisabođuid. Bearrašat dábálačcat sirde geasseorohagaide, ja nissonolbmot veahkehedje guođohit. Bohccot guođohuvvojedje sihke geasset ja dálvet. Kárásjoga boazosápmelačcat ledje maiddái huksegohtán viesuid girkobáikái gos eamidat ja smávit mánát ásse eanaš áigge dálvet, erenoamážit dan áigge go mánát ledje skuvllas. Jus ieža eai eaiggádušsan viesuid, de láigohedje daid čoahkkebáikki ássiin skuvllaáigge. Dattetge

ledje ain boazosápmelačcat Kárášjogas geat elle ollislačcat nomádaeallima. Guovdageainnus elle dadjat buot boazodoallit nomádaeallima, ja orro gođiin birra jagiid. Skuvlaáigodagas orro mánát girkobáikki internáhtas. (Solem 1970 [1933]: 38–39.)

Jorunn Eikjok (1989) lea dutkan muhtun sámi giláža Nuorta-Finnmárkkus gos eanaš bearrašiid almmáiolbmot ledje siidadoalus. Sii orro guhkit áigodagaid sierra. Eamidiin lei eará ealáhuslákki, ja sis ledje maiddái šibitnávehat. Dattetge ledje guokte, golbma joavkku main olles bearashaž jodii mearragáddái. Muhtun 90-jahkásaš boazosámi almmáiolmmoš muitala, ahte son jotkkii boazodoaluin go náitalii 30-jahkásažan, ja su eamit fas bisáni dállo dolli. (Eikjok 1989: 28–51.) Dán albmá eamida dállo doallu ferte leat leamaš juo 1930-loguin.

Boazodoallu lei earaláhkái Deanus 1950- ja 1960-loguin go Kárášjogas ja Guovdageainnus, muitala muhtun boazodoallonissonolmmoš konferánsas, maid Finnmárkku fylkkagielda lágidii Kárášjoga hoteallas njukčamánu 8. ja 9. b. 1994. Nissonolmmoš muitala ahte mánán sii orro dálui, ja ledje dušše almmáiolbmot geat johte mearragáddái. Su eatnis lei návetdoallu gitta dassážii go son gearggai vuodđoskuvillas. Son muitala ná:

Mis lei loahpas 50 ja 60 jagiin earalágán jodihanmálle go Kárášjogas ja Guovdageainnus. Mii leimmet fásta ássit, - ledje dušše dievddut geat johte mearragáddái. Min bearrašis oačuimet guovttelágán bajásšaddanduogáža. Mis lei geasseorohat Čorgaš-njárggas ja dat guokte borrasepmosa eaba beassan fitnat geasseorohagas Čorgašis. Nuoramusa guovttos gal beasaiga manjil fitnat doppe eatni mielde manjilgo son lei ožžon biila vuodjinkoartta. (Finnmárkku fylkkagielda: 1994: 5.)

Dás boahtá ovdan ahte 1930-logus eai johtán šat bearrasat siidda mielde Várjjagis ja Deanus, ja maiddái Kárášjogas ledje boazosámit ásaiduvvagohtán girkobáikái. Várjjagis ja Deanus leat leamaš nissonolbmuin dállo doalut maid sii hálddašedje, ja isidat guođohedje fas bohccuid. Dás boahtá maiddái ovdan, ahte nissonolbmuin sáhtii leat váttis beassat siidii. Muhto nugo ovdamearka čájeha Deanus, de lei fas nissonolbmuide álkit beassat geasseorohahkii go ieža sáhtte vuodjít biillain.

Boazosámi nissonolbmuid sadji Ruota bealde

Andrea Amft (2000) lea nákkusgirjjistis čállán mo sohkabeali oktavuođat leat rievdan Ruota beale Sámis 1900-logus. Amft mielde 1900-logu álgogeahčen lei boazosámi álbmot stuorra muddui iešbirgejeaddji Ruota bealde. Sápmelačcat ráhkadedje ieža eanaš oasi das mii dárbašuvvui johttisámi báikedoalus, ja lei dušše unna oasáš mii ostojuvvui. Lea ollu mii čujuha dasa, ahte goavvejagit gaskal

1932 ja 1936 ledje sivvan dasa go stuorra oassi boazosápmelaččain davvi Ruota guovlluin orruohte dáluin. Ruhtadoallu maiddái dagahii ahte olbmot ássagohte dáluin. Ferte dattetge atnit muittus ahte ledje regiovnnalaš erohusat, nu ahte ássan ja ruhtadoallu doaibmagodii iešguđetge guovlluin iešguđetge áiggis. (Amft 2000: 51–53.)

Amft dutkamuša guovddás áššin leat boazodoalu rievadusat mat dagahedje ahte nissonolbmot eai lean šat aktiivvalaččat mielde boazodoallobargguin. Boazodoallu rievddai. Ovddeš *intensiivvalaš* boazodoallu nogai, mas eallu dollui čoahkis birra jagi, ja álddu bohčojuvvojedje bieveln. Dan sadjái šattai biergobuvttadeapmi guovddážin ja heivehuvvui gávpemárkanii. Boazodoallobargu šattai bargun maid almmáiolbmot hálldašedje, ja mas nissonolbmuid ja mánáid bargo-návccat eai dárbbashašuvvon seammaláhkái go ovdal. Boazodoallu rievddai, ja nissonolbmot, mánát ja boarrásat ásaiduvve dađistaga dimbbarviesuide. (Amft 2000: 18–19.)

Muhto ii leat áibbas ovttamielalašvuhta dasa ahte dušše rievdan *intensiivvalaš* boazodoalus *ekstensiivvalaš* boazodollui dagahii ahte nissonolbmot eai šat johtán siidda mielde. Lea čájehuvvon ahte muhtun guovlluin jotke nissonolbmot johtit siidda mielde, vaikke boazodoallu rievddaige *ekstensiivvalaš* doallun. Hugh Beach (1981: 499) čilge *ekstensiivvalaš* boazodoalu leat doallu mas bohccot guođohuvvojtit viiddis eatnamiin, ja eaige leat geahču vuolde čađat. Astri Andresen (1991) čujuha Emilie Demant-Hattii ja Israel Ruongii geat oaivvildeigga ahte Čohkkerasas ledje stuorit rievadusat 1800-logu loahpageahčen ja 1900-logu álgogeahčen. Andresen oaivvilda ahte rievadusat sáhttet belohahkii guoskat dasa go boazodoallobaibma muhttašuvai, ja belohahkii dasa go gálvvu oažzugohite álkibut Ruota bealde. Šaddagođii dábálažan ahte dušše dat geat guođohedje, oassálaste johtimis geasseorohahkii, ja nissonolbmot, mánát ja vuoras olbmot ássagohte geasseorohagain Ruota rájá bealde. (Andresen 1991: 189.) Vaikke Gárasavvonis lei maiddái boazodoallu muhttašuvvan *ekstensiivvalaš* doibmii, de ii lean dilli seammaláhkái go Čohkkerasas. Nissonolbmot oassálaste johtimis nugo ovdal ledje dahkan. Dattetge ii mearkkaš dat, ahte doaibmamuhuttašuvvamis ii lean makkárge váikkuhus. Bohcco ii galgan šat bohčit, ja nu ii lean šat nissonolbmui seamma dárbu go ovdal. Iige lean šat dárbu guođohit ealu seamma čavgadit go ovdal. *Ekstensiivvalaš* doaibmavuohki dagahii ahte lei álkit johtit okto vaikke ekonomalaš dilli ii lean áibbas buorre. (Andresen 1991: 195.)

Hugh Beach (1981) lohká, ahte ollusat leat navdán boazodolliid geat johte Gárasavvonis Johkamohkkái 1900-logu álgogeahčen doaimmahan *ekstensiivvalaš* boazodoalu. Muhto sin boazodoallu ii lean *ekstensiivvalaš* eará go geasset. Muđui jagis lei sis oalle *intensiivvalaš* boazodoallu. (Beach 1981: 506.)

Mu mielas Andresena čilgehus čujuha dasa, ahte nissonolbmot eai heitán oalát johtimis siidda mielde manjá go boazodoallu rievddai *ekstensiivvalaš* boazodoallun. Dasa lassin sáhttá leat nugo Beach lohká, ahte ii dárbbashašan leat

ekstensiivvalaš boazodoallu miehtá jagi. Maiddái Guovdageainnus čájehuvvo ahte nissonolbmot ain johte siidda mielde vaikke bohčin nogaise.

Tom G. Svensson (1985) lea čállán girjji *Asa Kitok och hennes döttrar*. Asa Kitok lei riegádan 1893:s Váhčira guovllus. 1900-logus ledje Unna čerožis 10 siidda bievlaágige ja 7 dálvesiidda. Svensson oaivvilda, ahte lea stuorra erohus odđaágásaš boazodoalu ektui mas siiddat leat oktan siidan geasset, ja dálvet fas juohkásit 3 – 4 jovkui. Áldobohčima geažil ledje ollu siiddat bievlaágodagas. Go siiddat ledje smávvát, de lei maiddái bargoveahka unnit, ja erenoamážit dan ektui man ollu barge vai bohčin galggai lihkostuvvat. Buot bearraša miellahtuin lei stuorra ovddasvástádus, ja nissonolbmot ja mánát fertejedje maiddái oassálastit boazobargguide. Boazosápmelaččain geain lei smávva eallu, ii lean várri doalahit reanggaid dahje biiggáid, ja nu fertejedje dorvvastit báikedoaluidasaset. Jus ledje ollu mánát, ja daid gaskkas vel eanaš nieiddat, de sin árrat bajásgesse lossa ja góibidahkes bargguid bargat. Nu lei ovdamearkka dihtii dilli dan bearrašis gos Asa Kitok bajássattai. Bearrašis lei sierra siida birra jagi. Siiddas lei Per P:son oktan eamidiin ja viðain mánáin, main okta lei bárdni. Nieiddat šadde árrat hárjánit boazodoalloeallimii. Go áidna bárdni manai reŋgot stuorra boazoeaiggáda dakka-viđe go ollii ollesolbmo ahkái, de lei lunddolaš ahte nieiddat šadde bargat. (Svensson 1985: 28–29.)

Beach (1982) lea artihkkalistis čállán makkár sadji nissonolbmuin dábá-laččat lea odđaágásaš čearus Ruota bealde. Son čuočeuha ahte sis lea dávjá čalbmáičuohcci earálágán sadji go almmáiolbmuin. Máŋgga čearus eai beasa nissonolbmot jienastit boazobarggu dahje kollektiivva ekonomalaš áššiin. Beach gohčoda dán miellagiddevaš dakhun, danne go dát deaividia odđaágásaš industrijaservodagas mii lágaid bokte vealaha nissonolbmuid. Paradoksan dás lea, ahte odđaágásaš servodaga ideálat ja standárdat leat dásseárvosašvuhta sohkabeliid gaskka. Ovddeš áigge ledje boazodoalu nissonolbmot eambbo aktiivvalaččat boazobarggus go máŋga dievduu leat odne. Sis lei friddjavuohta mearridit iežaset boazobargoáššiid. Muhto otná odđaágásaš teknologijja ja stáhta rašonaliseren-politikhka lea dagahan, ahte sámi nissonolbmot leat gártan heajut dillái boazosápmelažžan go dievddut. (Beach 1982: 127–141.) Beach guorahallan Davvi-Ruotas čájeha ahte boazodoalu rievdadusat ja odđa lágát leat duvdán nissonolbmuid boazodoalus eret. Maiddái dutkamušat eará boazodoalloguovlluin čájehit, ahte stáhtaid politikhka lea garrisit váikkuhan nissonolbmuid dilálašvuhtii boazodoalus.

Boazodoallonissonolbmuid sadji eará guovlluin

Maiju Saijets (2000) gii lea dutkan boazosámi nissonolbmuid dilálašvuodaid Áŋgelis Suoma bealde lohká ahte boazodoallu lea iéšguđetlágán guovllus guvlu. Erohusat leat maiddái sogaid gaskkas. Nu sáhttáge nissonolbmo sajádat rievddadit

bearrašis bearrašii. Nissonolbmuid gaskkas leat maiddái erohusat, nuppit liikojit leat ruovttus ja earát fas háliidit meahccái. (Saijets 2000: 38.) Saijets oaivvilda ahte vaikke nissonolbmuid barggut eai oidno statistikhain, de sis lea liikkáge iežaset rolla boazodoallobearrašii. Nissonolbmuid rolla sáhttá govahallat ná:

Nissonolmmoš stivrre ja hálldaša dávjá boazobearraša dálloalo; son málesta bearrašii, duddjo ja fuolaha bearraša bivttasgálvvuin. Nissonolmmoš lea maid dat, gii bajásgeassá mánáid, dasgo bearraša isit lea hui ollu boazomeahcis. Badjeolbmuid guovdu sohkabeliid gaskasaš bargojuohku ii leat čavgat, dasgo eai leat čielga almmáidahje nissonolbmuid barggut. (Saijets 2000: 57.)

Saijets dutkamuš čájeha ahte leat sullasašvuodat Guovdageainnu boazosámenissonolbmuid ja sámi nissonolbmuid gaskka Suoma bealde gos son lea dahkan jearahallama. Nissonolbmos leat sierra barggut mat gullet sutnje, muhto dattetge eai leat ráját áibbas čavgat.

Øyvind Ravna (2002) lea čállán njenecaid historjjá birra, ja oaivvilda ahte nomádalaš eallinluohki mas olles bearasha lei duoddaris, jotkkii gitta 1940- ja -50 loguide vaikke kollektiivvadoalut ásahuvvojedjege 1930-logus ovddeš Sovjetlihtus. Olbmot duođas ássagohte čoahkkebáikkiide 1957, go dalle bođii mearrádus rievdadit davviálbmogiid ekonomija ja kultuvrra. Doaibmabijut álggahuvvojedje, ja galge oačuhit njenecaid ja eará nomádaid davvi guovlluin heaitit johtimis ja baicce ásaiduvvat bissovaččat. Árbevirolaš nomádaeallin adnojuvvui boaresáigá-sažan, ja ođđa boazodoallovuogádagas ledje dušše almmáiolbmot guođoheaddjít ja barge boazodoalu brigádas duoddaris. Nissonolbmot ja mánát galge ássat gávpogiin. Almmáiolbmuide ásahuvvui vuogádat gos sii barge vuoruid mielde. Dát vuogádat cuvkii árbevirolaš nomádaeallima, mas olles bearasha lei mielde johtimis. (Ravna 2002: 131-32.)

Tuula Tuisku (2001) lea maid dutkan njeneca boazodoalu dilálašvuodaid Okrug guovllus Ruoššas. Doppe leat maiddái nissonolbmot ja mánát šaddan guođdit boazodoalu eallima go Sovjetlihttu oinnii boazodoalu buhtes ekonomalaš doaibman, mii buvttadii biergu ja duodjebuktagiid. Olles bearasha duoddaris oidnojuvvui hehttehussan buvttadeapmái. Njeneca álbmogii lei fas bearasha eaktun jus galggai beassat normála eallima eallit. Sovjetlihttu fievrridii almmolaččat dakkár politihka mii galggai nissonolbmuid ja mánáid bissehit orrumis duoddaris. Go Sovjetlihttu heittii doaibmamis 1991, de gildui dákkáraš politihkka. Muhto geavatlaš hehttehusat nugo visteváilevašvuodat ja mánáid skuvlavázzin, dagahedje váttisin nissonolbmuide fárret fas duoddarii. Ollu njeneca nissonolbmot ja almmáiolbmot lohket ahte boazodoallu lea bearashdoallu. Bearasha háddjen ja goabbat sajis orrun lea fas Sovjetlihtu hutkkus. (Tuisku 2001: 48–53.)

Maiddái riikkaidgaskasaš boazodoalloguovddáža várrepresideanta Maria Petronova Pogadaeva (1999), gii gullá Sahka republihkii Sibirjjás, muitala mo

bearrašat šadde hádjosit, go badjel 30 lagi dás ovdal jođihedje olmmošmeahttun boazodoallopoltihka Ruošša bealde. Boazodoalu atne hálbbes bohccobiergo-buvttadeaddjin, eaige eallinvuohkin. Boadus lei ahte ovddeš boazodoalloeallin nogai go nissonolbmot ja mánát eai šat oassálastán boazodoallobargguide ja nu šattai boatkka. Pogadaeva lohká ahte 1990-logu loahpageahčái leat fas nissonolbmot ja mánát máhccan boazodollui. Nissonolbmuid lohku, geat ellet nomádan taigas ja duoddaris lea odne beliin lassánan. (Pogadaeva 1999: 88.)

Sihke siskkáldas rievdamat oktan olggobeali rievdamiguin, nugo tekno- logiija ja lágat, leat vuosttažettiin váikkuhan nissonolbmuid ja mánáid dilálaš-vuhtii. Sidjiide leat rievdadusat čuohcan eanemusat, go geahčá boazodoalu bealis. Nissonolbmot ja mánát eai johtán šat siidda mielde nugo ovdal, ja nu unnui sin oktavuohta siidii, bohccuide ja sin siidaguimmiide. Mohtorfievrrut dagahedje ahte bargoveahkadárbu unnui nugo guođoheami áigge. Ii dárbbasan šat čuoigat ealu, muhto sáhtii skohteriin vuodjit. Nissonolbmuid barggut leat maiddái dál olggobealde oppalaš boazodoalu, go siidabarggut leat oidnosis almmolaččat nugo statistikhain, muhto nu eai leat báikedoallobarggut gos nissonolbmot leat. Ovdal go boazodoallu rievdagodii, de lei dábálaš ahte nissonolbmot ja mánát ledje mielde beaivválaš siidadoalus. Go ovddeš Sovjetlihttu ásahii kollektiivva doaluid boazodollui ja fárrehišgodii nissonolbmuid ja mánáid giliide, de sin nomádaeallin nogai ja bearrašat eai orron eaige johtán šat ovttas duoddaris.

Boazosámi nissonolbmuid árbevirolaš eallin Guovdageainnus

Guovdageainnus johte ain nissonolbmot siidda mielde gitta 1960-lohkui ja dassážii lei maiddái dábálaš johtit ráiddiguin. Mun lean jearahallamiid bokte ožžon dieđuid, mat govvejít boazosápmelačča eallima Guovdageainnus juo ovdal 1900-logu gaskkamuttu. Dieđuid leat muiatalan sihke vuorrasut ja nuorat nissonolbmot, mii addá áigeoperspektiivva. Sii leat čilgen mo sii dan áigge siiddastalle, ja makkár doaimmat nissonolbmuin ledje.

Anna Persdatter Buljo Bæhr (Ánná) lea badjel 80 lagi boaris ja lea logi máná eadni. Son muiatala mo son lea siiddastallan mannjá go náitalii. Ánná vuoni lei báhcán leaskan ja lávii ovttas guvttiin bártniin, main nubbi lei Ánná isit, gaikkihit álo sierra siidii čakčat. Dasa lassin lei vel reaŋga ja muhtumin biigá. Son šattai maiddái guođohit vuosttas jagiid náitaleami mannjá. Siiddastallamis adnojít ollu olbmot, muiatala Ánná. Go ovdamearkka dihtii bohccuid láhppá, de ferte mannat ohcat daid. Vuos ferte mannat ránnjá siidii geahččat leat go dohko mannan. Jus dušše moadde bohcco leat mastan, de lávžegeažis buktojít ruoktot. Muhto jus leat ollu mastan, de ferte rátkkestit sierra.

Das mannjá lea maid Ánná johtán stuorra mánnájoavkkuin davás ja son muiatala mo dat lei:

Mus leat mánát dievva mielde, ja isit lea ealu luhtte ja nu leat maiddái reanga ja biigá. Muhtumin isit boahrtá viežžat mu dáppe heargeráidduin, ja de mii johttát ja ollet dohko guottetbáikái, ja das de mii dumistit dassážii go gerget guoddimis álldut, de mii gal johttát fas. Ja lávejít mánát dađi mielde go veaháge stuorrolit, šaddat guođohit bohccuid, dakkár 8-jahkásaš ja diekko 10-jahkásac̄at, guođohit luovvasiid – heargeealu, maid mii gohcodit luovvasin, dat leat luovos bohccot. Álldut dat leat eará báikkis mat leat guoddimin doppe, main leat miesit šaddamin. Ja mun dal daiguin mánáiguin doppe, bijan ain guođohit. Ja gal daiguin lea oalle ballu, dieđus mánáiguin go dálki nai boahrtá ja mierká, ferten viehkalit ieš geahčat mot dál lea mu boazovázziiguin. Nu leat oahppan guođohit ja bargat, ja nu mii dal johttát fas davás dohko. Mii johtit davás dassái go ollet geasseorohahkii, muhto dat ii leat gal duottar. Ii leat eambbo go rášša. Dasa mii bisánit, ja das mii orrut ja bargat daid giđđahommáid, sisttiid navildit ja njuorjjonáhkiid dikšut ja viežžat doppe meara vuovddis dakkár diŋgaid maiguin mii dikšut - osttuid ja bárkkuid. Ja de fas dan duoddarii, doppe daid ordnet ja goarrut. Gal dat gáma galgá oppa ollu dalle gorrojuvvot njuorjjonáhkis.

Ellon-Gáren gii lea lagabui 80 jagi, lea maiddái náitaleami manjá orron sierra siiddas geasset ovdal go sirdii bearrašiinnis sullui. Doppe bearáš siiddastalai ovttas Gárena fulkkiiguin. Son lea riegádahttán 8 máná ja 5 leat eallimin. Gáren muitala makkár doaimmat sus ledje go mánát ledje smávvát, iige loga muitit bargguid maid nissonolbmot eai bargan:

Goadi báikkis gal lei dušše mu bargun nugo čázeħiid goarrut ja ráhkadit ortnegii buot. Go johttát galget, de galge čázeħat, sistteħat. Buot dáid galggat bargat giđđat nai, nu ahte čakčat leat gárvásat. Gal lei mu bargu dat goadī bargu. Muhto jus boazobargu lei beare kritisk, de mun lávejin veahkkin, áloħii. Ja go doppe johttát dan Beaħjuras, de mun lávejin dámpii mannat mánáiguin Áltái, ja boadán biillain bajás gitta deike, ja siida boahrtá dáppe. Nu mun lávejin dahkat go mánát ledje unnit.

Dan áigge go Ánná ja Gáren jodīiga siidda mielde, de lei állduid bohčin sudno váldodoaibma. Ánná muitala:

Mii láviimet čakčat hirbmadit bohčit. Borgemánu mii láviimet juo gáfemielkki álo bohčit, ja de dahkat vel vuosttáid. Ja goahtedilis mii ain bohčit hirbmadit, ja madi buoret šaddá čakča dađi eambbo mielki állduin. Mii bohčit beivviid miehtá. Beaivet boahrtá diehko guokte-

nuppelot-ovtta áigge eallu livvasadjái ja mii njoarostallat veaigái dohko. Juohke unnoraš njoarosta ja doallá dan álddu vai eadni bohčá.

Gáren muitaša maiddái dan áiggi go son božii állduid:

Go goahti lea siiddas ja buot joavku siiddas, dalle bođii eallu livvasadjái álot álo, ja justa gaskabeaiáigge lávii boahtit livvasadjái, ja gal han golbma-njeallje diimmu gal lávii livvasajis. Ja dalle leat áhkut mannan ealu sisa bohčit. Áhčci njoarosta, ja jus lea bárdni, de dat njoarosta. Eadni bohčá, ja jus lea nieiddaš dan mađi, dat goit oahpahallá goit juoba lojes álddu, nubbi hivván doallá.

Sihke Ánná ja Gáren gullaba dan bulvii geat johte siidda mielde oktan bearra-šiiguin. Guktot leaba vásihan mo lea sierra siiddastallat. Dalle fertejít buot siida-miellahtut leat mielde guođoheamen vuoruid mielde, muđui ii leat vejolaš doalahit sierra siidda. Dán guovtti nissonolbmo doaibma siidadoalus lei eanet dan duohken man stuoris bargoveahka lei ja mo eadneolmmoš dárbbášuvvui goadis mánndikšuma áigge, go dan ahte lei čavga bargojuohku sohkabeliid gaskka. Bargojuohku gal lei nissonolbmuid ja almmáiolbmuid gaskka nugo bohčin ja bivttasteapmi. Muhto nissonolbmot dattetge barge buotlágán bargguid siiddastaladettiin dárbbuid mielde.

Ánná nieida, Máret Ánná gii lea gaskkamuttus 50 jagiid, muitala mo son lei hárjánan leat mielde siidabargguin nieidavuođa rájes. Son lea vázzán gávcci lagi skuvlla dan áiggis go lei skuvla skábman beassážiid rádjái:

Ii lean nieidaolbmuide nu, ahte go skuvllas gearggat, ahte leat dušše viesu luhtte. Mii eat láven viesu luhtte eará go dalle go duddjostalaimat, ja dálvet lei buoret, dalle eai dárbbášan nu ollusat leat ealu luhtte. Dalle eallu orru ja mii doapmalit duddjostit buot čiŋaid ja buot maid mii dárbbášit, oainnat go diehtit ahte go april mánnu boahtá, de gal cuopuda ja de gal galget buohkat doppe, de gal šaddá guođohit čuoigga, nie herggiin dieđusge vuodjá maid. Oainnat dat lei min ruoktu mas lei nu guhká diet, ja dat ledje ain maŋjelii mu go mun mannen, dat eatni ja áhči siida, dat johte nie.

Máret Ánná muitala man eará láhkái son vásihii dili go náitalii ja fárrii isidis siidii. Lei lagi 1969 giđa go son bođii dohko ja dalle lei maid johtináigi. Doppe ii lean šat oktage joavku gii jođii. Son ies̊ lei hárjánan dasa, ahte olles joavku lei mielde johtimin. Nubbi erohus lei ahte doppe eai botken luovvasiid, muhto johte olles ealuin gitta njárgii. Máret Ánná muitala mo su oktavuohta lei siidii go mánát ledje smávvát:

Miessemánu mun fárrejin biillain geasseorohahkii. Dalle ledje mus smávva mánát, eage skuvlamánát vuos. Muhto de rievddai nu, ahte mii álggiimet botket luovvasiid giđdat. Čoavjjet ealu de guođohedje sierra, vai bessel misiid mearkut giđasgeasi, nugo dál dahket odne maid. Dán rájes mun lean leamaš mielde ealu luhtte, go luovvasiid botkejtit ja misiid merkejtit. Go mánát de stuorruledje, de mun álgen johtit ealu mielde, ja nu lea odne ain.

Go mun jearan Máret Ánnás leat go eanet nissonolbmot dál geat oassálastet johtimis go ovdal, de vástida:

Šaddet eambbo siiddat oktii go boahťa giđđabáikái. Ja dan siiddas gal leat duollet dálle muhtumat mielde, nu ahte dat lea álgán dál. Lea dego fas rievdan diet. Dál don oainnát eatni mánáiguin doppe. Álgobáliid don it oaidnán dan. Dat lei ovta gaskka nu unnon diet, ja erenoamážit dalle go mun bohten dohko.

Siiddastallanvuogit váikkuhit nissonolbmuid dillái

Siiddaid ja orohagaid iešguđetlágán heiveheamit váikkuhit maiddái dasa man ollu nissonolbmot oassálastet siiddadoalus. Jus leat unna siiddažat, de nissonolbmot šaddet eanet oassálastit siiddadoalus. Go Máret Ánná siida álggii botket luovvasiid sierra, de maiddái Máret Ánná válldii mánáid mielde ja vulgii siidii. Rievdamat sáhttet maiddái nugo Máret Ánná ovdamearka čájeha, mannat dan guvlui ahte nissonolbmuid oassálastin siiddadoalus lassána. Go lea sáhka das, ahte nissonolbmuid dilálašvuhta boazodoalus lea rievdan, de eatnasiid millii badjána jurdda ahte nissonolbmuid oassálastin siiddadoalus lea unnon. Muhto, nugo Máret Ánná siiddas oaidnit, de leat nissonolbmot oassálastigoahtán eanet manjemuš 30 lagi, go dan maid dahke 70-logu álgogeahčen.

Lea gal maiddái oalle čielggas, ahte go buohtastahttá dan áiggi go Ánná ja Gáren jodiiga siidda mielde dálá áiggiin, de lea nissonolbmuid dilli rievdan. Vuos lea nu ahte olles bearrašat eai jođe šat siidda mielde čađat. Bohčin ii leat šat nugo lei dalle go Ánná ja Gáren siiddastalaiga. Dalle maiddái guođohedje ealuid čoahkisin birra jándora.

Lea liikkáge dehálaš atnit muittus go iská mo vierut rivdet, ahte geahččá daid dilálašvuodđaid ektui. Dilálašvuodđat sáhttet leat nugo iešguđetlágán johtingeainnut, mo ealu hábme ja makkár eallindilis olmmoš lea, nugo smávvamáná eadni, skuvlavázzimánáid eadni dahje nissonolmmoš geas eai ba leatge mánát. Vierut sáhttet maiddái ealáskit, nugo Máret Ánná muitala mo son garrii ealu lusa, vaikke eará nissonolbmuin ii lean dáhpi dan dahkat.

Olbmot leat ieža aktiivvalaččat doalaheamen vieruid, danne rievdan ii dáhpáhuva nu jođánit go májgii orru leamen go geahččá oppalaččat ja olggobeale

čalmmiiguin. Vierut sáhttet maiddái muhtun áigge leat unnit oidnysis dahje leat jávkan oanehis áigái, muhto nu guhká go gávdnojít olbmot geat hálddašít máhtuid, de dat sáhttet fas ealáskit. Go geahčá vieruid rievama ja bisuheami ektui, de lea dehálaš oaidnit mo rievttit doibme ja mo bargojuohku lei nissonolbmuid ja almmáiolbmuid gaskka ovdeš áiggis.

Boazosámi nissonolbmuid riekki ja sadji ovddeš áiggis

Go buohtastahttá Sámi rivtiid Norgga ja Ruota rivtiid ektui, de sámi nissonolbmuin leat leamaš stuorát oamastanrievttit. Norgga rievtti mielde lei eamidis belohakkii iešoamasteapmi, muhto dat lei rievdan juo ovdal Chr. V lága (1687). Dát láhka eaktudii oktasašoamasteami. Ruota rievtti mielde lei fas oktasaš luovosopmodat dábálaš. Norgga ja Ruota riektenjuolggadusat oktasašoamasteamis eai leat áibbas bastán sápmelaččaide. Sápmelaš náitalan nissonolbmos lea eanet iešheanalalašvuohta opmodagas badjel go dáčča ja ruottelaš nissonolbmuin. (Solem 1920: 23.) Gustaf von Düben (1977 [1873]) oaivvilda, ahte sámi nieiddaide gulai olles oassi árbbis ja vel eanet, dassážii go Ruota ja Norgga ábelágat unnidedje oasi almmáiolbmuide buorrin. Sivvan dasa go nieiddaide gulai olles oassi árbbis ja vel eanet, navdá von Düben sámi myhta leat duogážin, mas nissonolmmoš lei dat gii álggos bohcco dámai.

Erik Solem (1920) oaivvilda, ahte sápmelaččaid nammavieuin oidno ahte nissonolbmuin lea iešrádálat sajádat go dat mii lea germánalaš vieruin. Nammavieruin geavahuvvo liikká burest eatni namma nissonolbmo nama ovddabealde go áhči namma, omd. Ristena-Hánsa. Risten lea Hánssa eadni. Goabbá namma geavahuvvo lea dan duohken goabbá váhnen lei eanet dovddus. Solem gii lea doaibman sundin Deanus 1912 – 1931 ii loga iežas diggerievtis goassige vásihan, ahte boazosápmelaš lea geavahan isidis nama go lea leamaš vihtanin dikkis ja lea šaddan čállit iežas ollislaš nama diggeprotokollii. Son lohká alddis leat leamaš oalle mánga nissonolbmo vihtanin. (Solem 1920: 24–26.) Leat maiddái ollu nissonolbmo namat mat geavahuvvojít goargun odne, nugo ovdamemarkka dihtii Risten, Sárá, Sire ja Mágga.

Sámi dálueamit lea árvvus adnojuvvon ja sus lea iešheanalalaš árvu sihke bearraša siskkobéalde ja sámi servodagas ja dát guoská erenoamážit boazo-sápmelaččaide (Solem 1970 [1933], Bye 1939). Nissonolbmo guovddáš sadji bearrašis ja servodagas čilgejuvvlo leat danne go son lea buktán arvat bohccuid ellui, ja soittii vel stuorámus oasige. Son doalaha mearkkas, ja su merkii merkejuvvojít miesit maid su álldut guddet. (Smith 1938, Solem 1920.)

Ovddeš áiggiid lei dáhpín ahte náittosbárra oruiga jagi dahje vuosttas jagiid nissonolbmo váhnemiid goađis (von Düben 1977 [1873], Solem 1920, Elgström 1922, Smith 1938, Zorgdrager 1997). Solem (1920: 73) lohká maiddái dávjá gártan nu, ahte nuorra náittosbárra jotkkii ássamis eamida ruovttus, nu šaddágé

matrilocala náittosdilli. Ørnulv Vorren ja Ernst Manker (1957:165) geat leaba čállán sámi kultuvrra birra, oaivvildeaba maiddái ahte boazosápmelaččaid gaskkas lei ovddeš áigge dábálaš, ahte almmáiolmmoš fárrii eamida ruktui. A. I. Jefimenko gii lea čállán Ruošša beale sámiid juridihkalaš dili birra, oaivvilda ahte sámiid gaskkas lei dábálaš orrut lagi eamida bearraša luhtte manjjá náitaleami (Jefimenko 1878).

Dutki Nellejet Zorgdrager (1997: 59) oaivvilda, ahte sámi servodagas ii lean nissonolbmuid sadji almmáiolbmuid vuollásazžan. Nissonolbmot ja almmáiolbmot oassálaste ovttárvosaččat bohccuid guođoheamis, ja guktot bealit mearrideigga iešheanalaččat. P.L. Smith lei báhppan Guovdageainnus 12 lagi 1900-logu álgo-geahčen, ja lea čállán girjji man namma lea *Kautokeino og Kautokeino-lappene*. Dalle lei dábálaš ahte isit ráddádalai eamidiinnis ovdal go mearridii dehálaš áššiid, ja Guovdageainnu suopmanis maiddái gohčoduvvo isit dahje eamit guoibmin. Sátni guoibmi mákságe verdde ja lea bealátkeahtes, mii mearkkaša ahte guoibmi sahhtá leat sihke nissonolmmoš ja almmáiolmmoš. Smith čállá viidáseappot ahte nissonolmmoš maiddái čuovvu dárkilit mielde mo ealuin manná, vaikke goahtebarggut nugo borramušráhkadeapmi ja mánnadíkšun hehtte su oassálastimis guođoheamis. (Smith 1938: 321.) Dan maid Smith dalle fuomášii, ahte lei dábálaš iežas eamida dahje isida gohčodit guoibmin, lea ain odne ge dábálaš gullat Guovdageainnus.

Čálalaš gálduin maid mun lean dás geavahan, boahtá ovdan ahte boazosámi nissonolbmuin lei iežaset árbi, goargu ja opmodat mat čuvvo sin mielde go náitaledje. Maiddái lei vejolaš ásaiduvvat nissonolbmo báikái manjjá náitaleami, mii mielddisbuvtii ahte nissonolbmos ledje su iežas váhnemat, vieljat dahje oappát ja muđui fuolkkit lahka. Mo lei dasto bargojuohku sohkabeliid gaskka?

Árbevirolaš bargojuohku nissonolbmuid ja almmáiolbmuid gaskka

Vorren ja Manker (1957) oaivvildeaba ahte boazodoalus gáibiduvvojit boazo-vázzit dan ektui man stuoris eallu lea. Boazovázzit guođohit vuoruid mielde. Boazoeaiggát geas eai leat doarvái bártnit, ferte bálkkahit ovta dahje moadde reaŋga. Nu fertejit maiddái eamidis leat doarvái biiggát geat maiddái leat mielde guođoheamen. Biiggás ii leat heajut dilli go reaŋgas, soai baicce leaba bearlahtut. Soai borrabá seamma biepmu go earát. Biigá sahhtá šaddat mannjin ja reaŋga fas vivvan, ja jus reaŋga hoide iežas opmodaga maid dine reangan, de sahhtá šaddat seamma dássái go isit. (Vorren ja Manker 1957: 165–66.) Lilian Bye gii jođii 1930-loguin sámi bearraša mielde Kárášjogas, čállá erenoamážit nissonolbmuid bargguid ja dilálašvuodaid birra. Son oaivvilda, ahte eamidis Ánná Márrjás lei seamma ollu dadjamuš báikedoalus go su isidis, ja son mearridii iešheanalaččat buot mii guoskkai mánáide ja náhkkebargguide. Almmáiolbmot

stivrejedje ealu, dattetge eai njuovvan ovttage bohccó dahje eai dahkan makkárge gávppašeami ovdalgo lei ráððádalloyuvvon eamidiin. (Bye 1939: 21–22.) Bearraša nieiddaguovttos fertiiga guoðohit ealu seammaláhkái go almmáiolbmot. Guoðoheamis leigga nieiddaguovttos seamma buorit go almmáiolbmot. (Bye 1939: 155.)

Maiddái Smith gii lea seamma áigge johtán boazosámiid mielde go Lillian Bye, čállá nissonolbmuid beaivválaš bargoeallima birra. Son lohká, ahte go beaivváš oidnogoahtá óððajagimánu gaskkamuttus ja beaivvit guhkkot, de álgá jaskadat bargoeallin. Nissonolbmot dikšot mánáid, mii lea áddjás bargu, ja dalle álgá maiddái goarrunbargu. Sii gorrot biktasiid ja gápmagiid. Náhkiid dikšot mat galget šaddat sihke beaskan ja dorkan. Olles beaivi lea dálueamida bargu juhkkoyuvvon goarrumii, mánnádikšumii ja dolla- ja gáffegohkkemii. Lea maiddái dávjá eamida bargu čuollat muoraid. Oahppat rievssatgárdiid gullá maiddái nissonolbmo ja mánáid bargguide. Biiggáid, reanggaid ja nuoraid áigi gollá eanemusat guoðoheapmái. (Smith 1938: 308.) Bye čállá mo joðidettiin šaddet buohkat bargat:

Dugelig hadde kvinnfolka tatt vare på sitt, mens mennene styrte med reinene. De venta ikke hjelp til gjenstridige teltdukflak eller uhandterlige teltstokker. Enhver hadde sitt å passe, og enhver måtte se til at det ble gjort uten hjelp fra andre. Det var grunnloven i fjellfinnens liv. (Bye 1939: 89.)

Máŋggas leat oaivvildan, ahte lea nana bargojuohku almmáiolbmuid ja nissonolbmuid gaskka. Nissonolmmoš ii njuova bohccó, iige gálde bohccuid dahje dáma herggiid, ja almmáiolmmoš fas ii bože iige goaro. Mánnágeahču gulai maiddái nissonolbmuid bargguide. (Smith 1938, Zorgdrager 1997.)

Vaikke leige vissis bargojuohku sohkabeliid gaskka, de dat ii leat áibbas čavga. Go mun jearan Ellon-Gárenis ahte njuvve go nissonolbmot bohccuid, de vástida ahte dahke dieðusge dan go lei dárbi. Máhte Máret gii lei leamaš boazodoalus čaðat, čálli lohkkiid čállosa Áššu áviisii 03.02.2004 man bajilčala lei “In dohkket hejohit nissonolbmo barggu boazoealáhusas”. Son čállá earret eará mo nissonolbmot leat šaddan bargat buot bargguid:

Eai buot siiddain goit leat leamaš nu ollu bártnit, ja go leat nieiddat de leat olbmot ankkje siiddastallan. Ja birgen sii leat goit iežaneaset bargguiguin ja siiddaiguin.

Kirsten Berit Gaup gii lei riegádan 1943 ja lei Kárášjogas eret, muitalii Ragnhild Enoksenii, gii jearahalai boazosámiid 1993 máhttoárbevieruid birra boazodoalus, ahte son ii lean boaris vuosttas geardde go lei mielde njuovvamin. Son fertii ieš goddit bohccó go maiddái dat gulai su bargguide. Nieiddat fertejedje oahppat justa dan seamma maid gánddat, nugo njoarostit bohccó, goddit dan ja loahpas vel njuovvat. (Enoksen 1998: 447.)

Dáid ovdamearkkaid vuodul sáhttá dadjat ahte ii leat leamaš áibbas čielga bargojuohku boazodoalus sohkabeliid gaskkas. Dáin ovdamearkkain boahktá baicce ovdan, ahte nissonolbmot šadde bargat eanaš bargguid. Go ledje unna siiddažat, de šadde nissonolbmot bargat veahkkálagaid earáiguin. Bargohivvodat ja joavko-sturrodat ráddjejedje nissonolbmo bargoviiododaga.

Mo lágat ja njuolggadusat čuhcet nissonolbmuid dilálaš-vuhtii

Amft (2000) cállá mo boazosámi nissonolbmot Ruota bealde vealahuvvojedje lága bokte, mii doaibmagodii 1928 ja bistti 1971 rádjái. Lágas daddjui, ahte nissonolbmot lei vuogatvuhta boazodollui dušše dalle go lei náitalan dahje lea leamaš náitalan almmáiolbmuin geas lea sullasaš riekti. Muhto jus nissonolmmoš náitalii almmáiolbmuin geas ii leat boazodoalloriekti, de massii songe iežas vuogatvuoda. Almmáiolmmoš ii massán gal iežas boazodoallorievtti vaikke náitalii soapmásiin geas ii lean seamma riekti. Nu nissonolbmuid persovnnalaš riektevuogatvuhta rievddai jus náitalii boazodoalu olggobeallái, muhto dat seamma ii guoskan boazodoalu almmáiolbmuide. Sohkabeali riektevealaheapmi lágaid bokte bistti 1971 rádjái go dalle ilmmai odđa láhka mii loktii nissonolbmuid riektevuogatvuoda almmáiolbmuid dássái boazodoalus. (Amft 2000: 78.) Muhto ollu nissonolbmot leat geargan massit vuogatvuodaideaset, ja šaddan guođđit boazodoalu dan 40 jagis go láhka lei fámus. Dál leat sin mánát boazodoalu rivttiid haga vaikke sin eatnit ledje bajásšaddan boazodoalus. Maria Kråik muitalii áviisii *Aftonbladet* 21.09.2005, mo son lea gártan boazodoalu olggobeallai vaikke su eadni lei riegádan boazodollui:

När mina föräldrar gifte sig 1968 förlorade min mamma sina renar därför at pappa var icke renskötande same. Därför har jag heller inga samiska rättigheter i dag.

Dás sáhttá jearrat ahte lea go láhka, mii lea doaibman badjel 30 lagi dagahan ahte boazosápmelaččat leat ráhkkanahttán nieida- ja gándamánáid iešguđetgeláhkái go leat diehtán, ahte nieiddat šaddet guođđit boazodoalu jus gávdnet isidiid boazodoalu olggobealde.

Jagi 1987 lea dahkkon prošeaktabargu nissonolbmuid dili birra boazodoalus Norgga Gieldda- ja bargodepartemeantta ovddas. Guorahallan iská makkár sadji boazosámi nissonolbmuin lea boazodoalu ekonomalaš vuogádagas, ja mo lágat ja siehtadusat váikkuhit báikedollui. Boazodoallu lea ekonomalaš vuogádat, mii sistisdoallá iešguđetlágán bargguid. Boazodoalus dárbbasuuvvojat sihke almmáiolbmot ja nissonolbmot go goappašagaid barggut leat seamma dárbbashaččat. Lea liikká dáhpín ahte nissonolbmuid barggut leat čihkosis. Prošeaktabarggu okta-

vuodas daddjo, ahte manjá go ekonomijja sirdašuvai iešbirgejumis márkanekonomijji, de nissonolbmuid barggut eai adnon šat seamma árvosažžan boazodoalus go almmáiolbmuid barggut. Lágat ja šiehtadusat govvidit ja nanusmahttet odđá-aigásash proseassa, mas nissonolbmuid barggut badjelgehčojuvvojit. Das čuovvu ahte nissonolbmuid rolla geanoluhuvvá. Nugo boazodoalloláhka ja -siehtadusat dábálaččat dulkojuvvvojit ja geavahuvvvojit, de nissonolbmo bargu ii oidno dehá-lažžan boazodollui ja danne ii oačo seamma stáhtalaš vuogatvuodaid ja árvvu go almmáiolbmo bargu. (Komissar, Møystad ja Rognlie 1987.)

Norgga bealde ii leat odne dušše náittosguimmiid duohken mearridit goappá siidii válljeba cegget báikedoalu. Boazodoallolága § 4 gáibida vuosttažettiin, ahte sus gii áigu jodihit boazodoalu lea sierra doallu. Nissonolbmot oamastit arvat unnit doaluid go almmáiolbmot. Sii eaiggáduššet 16% doaluin. Mánjasis geain lea sierra doallu, leat leaskkat geat leat árben doalu isida manjis. Muhto leat gal muhtun nuorra nissonolbmot geain lea sierra doallu (Landbruks- og matdepartementet 2004: 31). Dasa lassin ii leat vejolaš Boazodoallolága § 4 vuodđul sirdit boazodoalu eará orohahkii almmá guovllustivrra lobi haga. Go bidjá vuodđun nissonolbmuid sierra doaluid vuollegris logu ja sin alla agi, ja dasa lassin ahte ii leat beare sirdit doalu eará orohahkii, de oaidná ahte odne leat maiddái lágat ja njuolggadusat bisseheamen báikedoalu ásaheami nissonolbmo siidii. Sáhttá jearrat ahte leat go formálalaš bealit dagaheamen dan ahte nissonolbmuid sajádat servodagas geanoluhuvvá.

Nissonolbmo doaibma iešguđetláhkái guovllus guvlui

Boazodoalus leat leamaš iešguđetgelágán heiveheamit. Nuorta-Finnmárkkus leat nissonolbmot mannan čuohtelogu álgogeahčen orron dáluin gos sis lei maiddái šibitdoallu. Guovdageainnus ja muhtun muddui Kárášjogas lea leamaš nomáda-eallin gos olles beará jođii siidda mielde. Bohčin lei dábálaš Guovdageainnus gitta 1960-lohkui ja lei nissonolbmuid doaibma. Go bohčin heaittihuvvui, de nogai maid oassi nissonolbmuid doaimmain. Muhto nissonolbmot dattetge jotke johtit seammaláhkái go ovdal. Boazodoallu ii leat ovttalágan buot siiddain dahje báikedoaluin ja danne ii sáhtege leat čavgadis bargojuohku sohkabeliid gaskka. Nissonolbmot leat dárbbu mielde bargan eanaš bargguid ja nu maiddái njuovvan, ja leat guođohan seammaláhkái go gánddat.

Rievdamat eará boazodoalloálbmogiid gaskkas leat maiddái dagahan ahte nissonolbmot šadde guođđit beaivválaš boazodoalloeallima. Ovddeš Sovjetlihtus adnojuvvui boazodoalloeallinvuohki boaresáigásazžan, ja danne oačuhedje doppe nissonolbmuid ja mánáid sirdit čoahkkebáikkiide. Muhto manjá go ovddeš Sovjetlihttua nogai, de leat fas nissonolbmot ja mánát váldigoahtán ruovttoluotta ovddeš eallinvuogi.

Sámi náitalan nissonolbmot ovttas mánáiguin leat goađis duddjon, murren ja gárdon. Ovddeš čállon gálđuin oidno ahte nissonolbmuin lea leamaš iešheanalaš sadji bearrašis ja siiddas, muhto lábat ja njuolggadusat leat cagga nissonolbmuid árbevirolaš rivttiid ja sin sajádaga servodagas. Vaikke ođđa vuogádagat leat boahztán boazodollui nugo *ekstensiivvalaš* boazodoallu ja stáhta lábat, de leat ollu vierut maiddái bisuhuvvon. Nissonolbmot leat ain mielde johtimin ja sii duddjojit nugo ovdalge leat dahkan. Vaikke muhtun vierut leat jávkan, de leat dattetge ain ollu nissonolbmot geat doalahit vieruid ja fievrredit daid ođđa buolvvaide. Lea danne dehálaš maiddái rievđama oktavuođas atnit muittus vieruid mat doala-huvvojít, jávket muhtun áigái ja váldojit fas atnui.

Sámi boazodoalus leat guktot sohkabeali joavkkut leamaš seamma dehá-lačcat go bargooktavuođat galge hábmejuvvot. Náittosbárra sáhtii ásahit báike-doalu liikká bures eamida go isida bearashaovkui. Mihtilmas dovdomearkkat sosiála struktuvrrain leatge dávggasvuohta ja molsašupmi. Muhto orro leamen maiddái nu, ahte otná lábat oktan váhnemiid vieruin vuoruhit doalu gánddaide, soaitá leat mielde bisseheamen ovddeš vejolašvuodaid válljet goappá bearraša siidii ásai-duvvat.

3 Sosialiseren ja máhttua – guovddážis árbevieruid sirdimis

Muhtumat máhttet gale visot, muhto muhtumat eai máhte eai maidege duddjot dievduin. Ja dat lea stuora vahát, go lea dakkár dievdu mii ii máhte duddjot. Muhto dat lea velá vahát go nisu lea čuorbi, mii galgá biktasiid goarrut visot, mii gullá sámi nissoniid bargui.

(Turi 1987 [1910]: 47.)

Mánát leat boazodoalu boahtteáigi, ja sii leat danne guovddážis go lea sáhka boazodoalloservodaga boahtteáiggi birra. Ovddeš áigge lei oalle diehttalas ahte mánát bajásgessojuvvodje lunddolaččat boazodollui. Sii ledje doppe gos sin váhnemát, áhkut ja ádját elle. Duhkoraddan, muiatalusat ja barggut ledje oassin sin eallindilis. Dál ii leat dilli šat nu, go mánát eai bajássatta šat oppalaš boazodoallobirras. Nubbi váhnen fuolaha siidadoallobargguid, ja nubbi fas lea báikedoallobargguin ja dasa lassin sáhttá sus leat vel dienasbargu boazodoalu olggobealde. Eanaš gerddiid lea nissonolmmoš báikedoallobargguin, ja almmáiolmmoš fas siidadoallobargguin. Mánát vázzet skuvlla ja sis leat dasa lassin eará asttuáiggefálaldagat. Ovddeš lunddolaš oahpaheapmi mii dahkui beaivválaš bargguid bokte lea nohkagoahtán. Go máhtut dál galget fievrriiduvvot, de váhnemát fertejít dan oalle diđolaččat dahkat.

Sosialiseren ja máhttua leat guovddáš doahpagat go lea sáhka mánáid-bajásgeassimis boazodollui. Doahpagat leat ollu guorahallojuvvon, ja daidda ii leat ovttageardánis čilgehus. Čilgehusat leat dávjá dan duohken man geahčastagas ja áigodagas dat leat oidnojuvvon. Máhttotoaba lea vel dasa lassin čadnon fápmohierarkijai, nugo ahte mii lea riekta ja dohkálaš máhttua.

Sosialiseren

Berger ja Luckmann (1996) čilgeba sosialiserema leat viiddis ja bistevaš stivren, mii fievrriida individa servodaga objektiivvalaš málbmái dahje dan oasázii. Soai juohkiba sosialiserema guovtti oassái, nammalassii: *primára-sosialiseren ja sekundára-sosialiseren*. *Primára-sosialiseren* lea álgo sosialiseren maid olmmoš čađha mánnán, ja man bokte šaddá servodaga miellahtun. *Sekundára-sosialiseren* lea juohke áidna maajnelis proseassa, mii stivre juo ovdalis sosialiserejuvvon indiiviidda servodaga objektiivvalaš málmmi odđa surgiide. (Berger ja Luckmann

1996: 154.) Berger ja Luckmann (1996) čilgeba viidásut mo sosialiseren dáhpá-huvvá:

Det, der i et samfund tages for givet som viden, bliver sammenfaldende med det, der er muligt at vide, eller skaber i alle tilfælde den ramme, indenfor hvilken man i fremtiden kan få alt det at vide, som man endnu ikke ved. Det er denne viden, der indlæres under socialiseringen, og den, der formidler internaliseringen af den sociale verdens objektiverende strukturer i den individuelle bevidsthed. Viden er, forstået på denne måde, krumtappen i samfundets fundamentale dialektik. Den »programmerer« de kanaler, hvorigennom eksternaliseringen frembringer en objektiv verden. Den objektiviserer denne verden gennom sproget og det erkendelsesmæssige apparat, der er baseret på sproget, dvs. den skaber orden ved at gøre verden til objekter, der kan opfattes som virkelige. Under socialiseringen internaliseres den igjen som objektivt gyldig sandhed. (Berger ja Luckmann 1996: 84–85.)



Govva 1. Pia-Maria Labba

Sosialiserenboadus oidnojuvvo dávjá diehttallassan, dan láhkái ahte das gávdnojit juo gárves jurdagat ja struktuvrat maid mánna internalisere. Nu guhká go mánát ieža eai leat leamaš mielde hábmemin máilmui, de máilbmi boahtá sin čalmmiid ovdii dego gárves duohtavuohta. (Berger ja Luckmann 1996: 77–78.) Ollu dutkamušat leat deattuhan proseassaid, maid bokte mánát passiivvalaš objeaktan ohpet kultuvraset. Nu dutkit vajálduhttet geahčat mo mánát váikkuhit árjjalačcat iežaset eallima, seammaláhkái go mánát váikkuhit iežaset birrasa.

Corsaro (1997) oainnu mielde, eanaš sosiologija jurddašeapmi mánáid ja mánávuoda birra bohciida teorehtalaš barggu oktavuođas. Sosialiseren leat proseassat maid bokte mánát heivehit iežaset servodahkii ja internaliserejít dohko. Sosialiserema čilgehusat sistisdollet oainnu, man mielde mánát leat servodaga olggobealde. Nu mánáid fertejít hábmet ja ládestit olgguldas fámuiguin vai šaddet ollislaš miellahtun servodahkii. Leat evttohuvvon guovttelágán modeallat sosialiserenproseassaide. Vuostas lea *deterministalaš modealla* mas mánás jáhkket leat passiivvalaš rolla. Dien oainnu vuodul mánna lea sihke easkaálgi, mas lea vejolašvuhta leat mielde bajásdoallamin servodaga ja seammás umáhttu, man ferte bearráigeahčat hárjehallama bokte. Nubbi lea *konstruktivistalaš modealla* mas máná navdet doaibmat aktiivvalačcat ja lea ángiris oahpahalli. Dán oainnu vuodul mánna aktiivvalačcat hábme iežas sosiálamáilmui ja su iežas saji das. (Corsaro 1997: 8–9.) Vaikke konstruktivistalaš teorijat navdet mánáid leat aktiivvalaš servodaga ovddasteaddjin, de teorijat vuosttažettiin deattuhit ovdáneami bohtosiid, eai ge váldde duođas máŋgabeadlatvuoda mii lea sosiála struktuvrrain ja mánáid kollektiivvalaš aktivitehtain (Corsaro 1997: 27).

Corsaro oaivvilda baicce ahte mánávuoda sosiologijateorijat berrejít luovvanit eret individualistalaš geahčastagas, mii oaidná mánáid sosiála ovdáneami duše dan láhkái ahte mánna internalisere ollesolbmuid gelbbolašvuoda ja máhtu. Muhto mánna lea baicce ieš aktiiva ja hutkái. Son iešge sáhttá fuomáshit ja hutkat odđa beliid maid váhnemati eai dárbaš leat sutnje oahpahan, ja nu sosiologija geahčastagas ii leat sosialiseren duše heiveheapmi ja internaliseren. Dán sosialiserenoainnu guovddážis adno kollektiivvalaš dehálašvuhta árvvusin – mo mánát šiehtadallet, hábmejit ja juogadit kultuvrra ollesolbmuiguin ja iežaineasetguin. Dattetge ii leat doarvái dadjat, ahte sosialiseren deattuhit kollektiivvalaš ja oktasaš proseassaid go odđa mánávuoda sosiologija galgá ráhkaduvvot. Váttisvuhta lea iešalddis *sosialiseren* doaba. Go olmmoš gullá doahpaga, de badjána millii ahte mánna aivve nuppiid bokte oahppá dustet boahtteáiggi. Corsaro baicce evttoha čuovvolit odđa ipmárdusa, maid gohčoda *interpretive reproduction* go dat vuhtiiváldá mánáid odasmahttinbeliid ja hutkás beliid oassálasttidettiin servodagas. *Reproduction*-doaba sistisdoallá jurdaga ahte mánát eai leat duše internaliseren servodaga ja kultuvrra, muhto leat baicce aktiivvalačcat fuolahamen kultuvrralaš buvtadeami ja rievdađeami. Go mánát leat oassálastimin servodagas, de leat doaibmi sosiála struktuvrrat hehtehussan sidjiide. Dat meark-

kaša ahte mánát ja sin mánnávuhta váikkuhuvvo dan servodagas gos sii leat miellahtut. (Corsaro 1997: 18–19.)

Antropologa Jean Briggs (1992) lea dutkan inuihttamánáid bajásgeassima. Su oainnu mielde lea jáhkku, ahte oaivilat gávdnojít kultuvrras, ja olbmot váldet daid passiivvalaččat vuostá, jođánit molsašuvvamin dieđalaš máilmis. Dál leat dutkanbohtosat čájehan, ahte kultuvra sistisdoallá osiid maid olbmot aktiivvalaččat válljejit ja dulkojít, ja geavahit daid mángga láhkái dan mielde mo vejolaš-vuodat, návccat ja vásáhusat diktet sin dahkat. Ii leat indiviida gii ovdánahtá oaiviliid, muhsto kollektiiva dakhá dan (Briggs 1992: 25).

Mun doarjun dás Corsaro (1997) ja Briggs (1992) oainnuid, ahte mánát leat ieža mielde váikkuheamen kultuvrraset, eage ovttageardánit čuovvol dahje internalisere dábiiid ja vieruid mat leat servodagas. Sosialiseren dakhko dan bokte, ahte mánát leat ieža aktiivvalaččat servodagas. Sii leat mielde hábmemin kultuvrra ovttas earáiguin, nugo omd. bearrašiin ja seamma ahkásáččaiguin. Bearašásahus lea guovddážis fievrrideamen giela mánáide, ja nugo Berger ja Luckmann (1996) oaivvildeaba, de giela bokte máilbmi objektiviserejuvvo ja ordnejuvvo.

Njálmálaš giella lea leamaš dehálaš máhttofievrrideami oktavuođas sápmelaččaid gaskkas go sámegiella čállingiellan lea oalle ođas. Ovđdit buolvva sápmelaččat ohppe máhtuideaset sámi callimis sagastaladettiin vuorrasut olbmuiuin, oaivvilda Gunvor Guttorm (2001: 62) gii lea dutkan sámi duoji. Go galggai oahppat ja oahpásmuvvat máhttui mii lei dárbbashašlaš, de dáhpáhuvai dat njálmálaš sirdima bokte. Njálmálaš diehtu ii leat aivve duoji birra, muhsto sistis-doallá eallima máhtuid man siskkobéalde duodji čuožžila, oaivvilda Guttorm.

Asta Balto (1997) guhte lea dutkan sámi mánáid bajásgeassima, deattuha ahte mánát ohppet muitalusaid bokte norpmaid, árvvuid ja morála. Son árvvoštallá buorrevuođa muitalusain dáinna láhkái:

Muitaleaddjimetoda lea erenoamáš buorre dainna lágiin, ahte dat addá vásáhusa ja ráhkada buriid searválasvuodđaid. Danne dat sáhttá leat njuolgadet geaidnu juksanmearrái go verbála moraliseren, mii dán áigge lea dábálaččat. Muitalus ovddasta dávjá kollektiiva árbbi, sága máttarváhnemiin mii sirdojuvvo buolvvaid gaskka. Dán searválasvuodas ráhkaduvvá oahppanbiras, man geažil mánát ja nuorat álkibut váldet vuostá váikkuhusa, dovdamuša ja fihttejumi. (Balto 1997: 115–116.)

Máhttofievrrideapmi

Máhtuid fievrrideapmi lea stuorra oassi sosialiseremis, ja lea áiggeguovdilis ášši boazodoalus dál go mánát leat eanaš áigge skuvllain, gos čálalaš máhttu váldá ollu saji. Máhttu lea viiddis doaba, mas leat ollu bealit. Lea dábálaš juohkit máhtu

osiide nugo omd. álgoálbmotmáhttu, oarjemáilmomi máhttu, árbevirolaš máhttu ja dieðalaš máhttu. Máhtuid sirde ja hákke iešguðetgeláhkái iešguðetge birrasiin. Skuvla ja muðui eará formálalaš oahpahusásahusat leat oalle guovddázis máhttofievrrideami oktavuoðas. Doppe lea čálalaš máhttu guovddázis. Muhto eai juohke máhttofievrrideami oktavuoðas leat girjjit mielde oahpahettiin. Bearaš lea omd. dehálaš ásahus njálmálaš máhttofievrrideami oktavuoðas. Dasto gazzá olmmoš maiddái máhtu iežas bargguid bokte ja muðui eallima vásáhusaid bokte.

Álgoálbmotmáhttu ja dieðalaš máhttu

Arun Agrawal (1995) lea čállán artihkkala mas árvvoštallá mo sáhtášii sirret álgoálbmotmáhtu ja dieðalaš máhtu. Son čuočuha, ahte áiggisid čaða leat oainnus rievdan iešguðetge máhtuid ektui. 1950- ja 1960-loguin oidne ovdánahttin-teoretikhárat álgoálbmot ja árbevirolaš máhtu gávnneheapmin, ja hehttehussan ovdánahttimii. Dálá áigge dovddastuvvo ahte ovddeš áigge govvádusat álgoálbmotmáhtuid birra leat ovttageardánat. Muhto vaikke álgoálbmotmáhtu bealu-šteaddjít leat geahčalan fuopmášahttit álgoálbmot ja unnitálbmogiid máhtu, de sin bargu gillá ruossalasvuodaid ja rašis doahpagiid geažil oaivvilda Agrawal. Ruossalasvuodat bohtet ovdan go álgoálbmotmáhttu biddjo vuostálagaid oarjemáilmomi máhtuin. Dalle daddjo ahte álgoálbmotmáhttu čatnasa vuosttažettiin doaimmaide mat leat dehálačcat olbmuid birgejupmái dan sadjái go ohppet abstráktalaš jurdagiid ja filosofijaid. Nuppe bealis oarjemáilmomi máhttu lea sierranan eret olbmuid beaivválaš eallimis ja ovddasta eanet máilmomi analyhtalaš ja abstráktalaš beliid. Agrawal vuosttilda dákkár juohkima oarjemáilmomi ja álgoálbmotmáhtu gaskka. Son oaivvilda, ahte go guorahallá máhttobuktaga iešguðetge náššuvnnain ja iešguðetge álbtomjoavkkuin, de sáhttá rehkenastit gávdnat girjáivuoda sihke oarjemáilmomi máhtu siskkobealde ja seamma maiddái álgoálbmotmáhtu siskkobealde. Guorahallan sáhttá maiddái gávnnahit oktasaš vugiid das mo “álgoálbmot” ja “oarjemáilmomi” dieðaoalbmot vuodðudit máhtuid. Agrawal mielas gávdnojít čalbmáičuhcci erohusat sierra álgoálbmogiid filosofijaid ja nu maiddái oarjemáilmomi sierra filosofijaid gaskka. Nuppe beales oaidnit maiddái, ahte erohusat mat leat šaddan goanstadahkkon vuogi mielde leat mealgat muddui ovttalágánat. Dan sadjái go bidjat oktii buot máhtu, mii lea oarjemáilmomi olggobealde ja gohčodit dan “álgoálbmotmáhttun”, ja nuppe beales fas bidjat oktii buot oarjemáilmomi máhtuid, de livčii jierpmáleabbo dohkkehít erohusaid kategorijaid siskkobealde, ja várra gávdnat vel ovttalágánvuodaid oarjemáilmomi máhtu ja álgoálbmotmáhtu gaskka. (Agrawal 1995: 414–427.)

Arne Kalland (2000) ii leat ovttaoivilis Agrawal ákkastallamiin das ahte eai leat erohusat álgoálbmotmáhtu ja dieðalaš máhtu gaskka. Álgoálbmotmáhtu árvvus leat ráddjehusat, nugo leat buot eará máhttošlájainge. Ráddjehus lea juo ieš dan namahusas. Álgoálbmotmáhttu lea earálágán go dieðalaš máhttu vaikke

Agrawal čuoččuha eará, oaivvilda Kalland. Muhto Kalland baicce jearrá man stuora erohus lea álgoálbmotmáhtu ja eará máhttošlájaid gaskkas nugo “báikkálaš”, “árbevirolaš” ja “geavatlaš” máhtus. Jus gidde fuopmášumi álgoálbmotmáhttui, de sáhttá jodánit vajálduuhitt sullasaš máhtu, mii gullá eará álbmo-giidda. Jus gáržzida máhttogaorahallama álgoálbmotmáhttuun, de dagaha dat váttis-vuodaid, omd. álgoálbmotmáhttu jodánit čatnasa árbevirolaš máhttui ja sáhttá oidnot árbevirolaš máhtu synonyman, oaivvilda Kalland. Das čuovvu ipmárdus ahte álgoálbmotmáhttu ii rievdda, muhto lea stirdon dan sadjái go lea dynámalaš ja ovdáneaddji, ja nu olggobeali olbmuid guottut nannejuvvojit dan hárrai ahte álgoálbmogiin leat oktageardánis teknologijijat, álkes ekonomiija ja leat guhkkin eret máilmmei márkanis. (Kalland 2000: 320–322.)

Vaikke Agrawal (1995) ii hilggo álgoálbmotmáhtu doahpaga, de ii čuovvol jurdaga ahte livčče čielga erohusat oarjemáilmmei ja álgoálbmotmáhtuid gaskka, go máhttooasit eai sáhte agibeavái leat merkejuvvon “álgoálbmoga” dahje “oarjemáilmmei” máhttun. Su mielas baicce livččii deháleabba ságastallat mángga máhttofáttás ja šlájas main leat iešguđetlágán logihkat ja epistemologijijat. (Agrawal 1995: 433.) Oarjemáilmmei dieđalaš máhttu ja álgoálbmotmáhttu geava-hit goabbatlágán vugiid dutkat duohtauvođa, ja ovdanbuktet maiddái goabbatlágán máilmmeoainnu. Dás lea sáhka guovttelágán epistemologijjas, nugo mii diehtu lea, mii áigeguovdilis diehtu lea ja mii lea luohtehahti diehtu. Álgoálbmot- ja dieđalaš máhtus lea sierralágán vuodustus das mii diehtu lea, ja gokko rádjá manná das maid mii eat sáhte diehtit.

Lean ovttaoaivilis dasa ahte eai leat čielga erohusat oarjemáilmmei máhtus ja álgoálbmotmáhtus, omd. sáhttá dadjat ahte smávit mearraguolástedđiin sáhttet leat seamma vásáhusat ja máhtut go álgoálbmogiin geat bivdet sullasaš guovlluin ja seamma vuogi mielde. Muhto lea váddáseabba čuovvolit jurdaga, ahte hilgut geavaheamis álgoálbmotmáhtu doahpaga ja dan sadjái ságastallat máhttofáttáin ja šlájain. Álgoálbmotmáhtu dovdomearka lea holistalašvuohta ja danne lea dan váttis botket osiide.

Álgoálbmotmáhtu sadji ja doaibma

Fikret Berkes (1999) čujuha Coyote ja Cree álgoálbmogijid árbevirolaš muitalusaide ja máidnasiidda mat čájehit, ahte ekologalaš beliid ii sáhte sirret eret sosiála ja vuoinjalaš beliin. Muitalusat ja máidnasat leat oassin álgoálbmotmáhtus danne go dat sistisadollet árvvuid ja oaiviliid mat leat ruohtasmuvvan eatnamii ja addet dovddu guovlluide. Berkes govahallá mo álgoálbmogat davvi Kanadas dávjá čujuhit *knowledge of the land* dan sadjái go ekologalaš máhttui. Sidjiide eai leat eatnamat dušše ávnaslaš duovdagat, muhto sistisadollet ealli birrasa. (Berkes 1999: 6–9.)

George J. Sefa Dei, Budd L. Hall ja Dorothy Goldin Rosenberg (2000) čállét ahte álgoálbmotmáhtu ii sáhte oaidnit dušše báikkálaš fenomenan. Dát máhttu rasstilda sihke kultuvrralaš ja historjjálaš rájáid ja geográfalaš sajiid. Álgoálbmotmáhtu lea álbmoga joavku ieš čohkken sihke historjjálaš ja dálá vásáhusaid bokte. Odđa máhttu fuomášuvvo oahppanproseassa bokte doložiid birra, ja dat dagaha álgoálbmotmáhtu soddilis dan sadjái go stirdon máhttun. Álgoálbmotmáhtu mihtilmasuodat leat máhtut mat leat háhkkojuvvon guhkit áiggi ássama oktavuoðas vissis guovluuin. Máhttu čujuhuvvo árbevirolaš norpmaide ja sosiála árvvuide, seammás go čujuhuvvo miellagovahallamiidda mat ládestit, organiserijit ja heivehit olbmuid eallima, ja dahket sin málmmi áddehahttin. (Dei, Hall ja Rosenberg: 2000: 4–6.)

Dei, Hall ja Rosenberg (2000) oaivvildit ahte álgoálbmotmáhtu beahttin, árvonjeaidin ja badjelgeahčanvuhta lea máhttohierarkijaid boaðus mat leat dihtomielalaččat geavahusas. Máhttohierarkijat ruovttuin, skuvllain, bargosajiin eai sáhte álkít heaitihuvvot danne go dat leat álo hábmen skuvllaíd, servodagaid ja politikhalaš eallima. Ásahusat leat jurdda- ja doaibmansajit gosa leat báhcán mearkkat. (Dei, Hall ja Rosenberg: 2000: 4.)

Eamiálbmogiid organisašvnnat leat čujuhan, ahte árbevirolaš máhtus ii leat nu ollu sáhka dan agis, muhto das man vuogi mielde máhttu háhkkojuvvvo ja geavahuvvo. Máhtu sosiála oahppan- ja sirdinprobeassat dahket dan árbevirolažžan, ja das lea sosiálalaš árvu ja riektevuogádat mii lea earálágán go dan máhtus maid álgoálbmogat hákhet olggobealde. (Andersen 2002: 13.)

Álgoálbmotmáhtu doaba lea ávkkálaš go dat čujuha maiddái álgoálbmogiidda main lea dat máhttu ja geaidda máhttu gullá. Ollu álgoálbmogiin lea mealgat muddui máhttu rieviduvvon, ja nu leatge leamaš olggobeale fámut, mat leat stivren guhte máhttu lea dohkkehuvvon. Boazodoalu siskkobealde lea maiddái máhttu, muhto lea unnán váldon atnui riikkaid lágaide ja njuolggadusaide, mat gusket olbmuide geat leat ealáhusa siskkobealde. Maori dutki Linda Tuhiwai Smith (1999: 63) oaivvilda ahte oarjemáilmimi kultuvrra ja máhtu globaliseren nanne ovttatláhkái oarjemáilmimi iešdovddu. Oarjemáilmimi kultuvraguoddit leat legitiimmalaš máhtu guovddážis. Sii leat duopmárin dasa mii lohkko máhttun ja doibmet “siviliserejuvvon” máhtu gáldun.

Juridihka dutki Tore Henriksen (2002) guorahallá mo biologalaš máŋgga-bealatvuoden konvenšuvdna giedħahallá álgoálbmogiid rivttiid. Eanaš stáhtat – 181 stáhta ja dasa lassin EO – leat šaddan konvenšvnna bealálažžan, ja nu fertejit čuovvut dan njuolggadusaide. Stáhtain leat geatnegasvuodat álgoálbmogiid ektui ja sin máhtuide konvenšvnna máŋgga mearrádusa vuođul, gč. artihkkala 8 (j) ja artihkkala 10 (c). Artihkal 8 (j) ii geavat álgoálbmot namahusa, go lea sáhka álbtmogiid birra main lea árbevirolaš máhttu, muhto geavaha “álgoálbmot-servodaga” namahusa. Go geavahuvvo doaba mii sistisdoallá mearritkeahthes joavkkuid, de leat stáhtat sihkkarastán, ahte rievttit eai njulgestaga sáhte čuožžilit konvenšvnna mearrádusain, oaivvilda Henriksen. Jus álgoálbmotdoaba livčii

geavahuvvon, de livččii dat sáhttán dulkojuvvot ahte álgoálbmogiin lea ieš-mearridanvuogatvuoha. (Henriksen 2002: 173–177.)

Tore Henriksen geažuha ahte álgoálbmogat dáidet leat eanet čatnasan lundai go earát. Sin birgenlháki lea luondduvalljodagaid duohken. Álgoálbmogat leat čuđiid jagiid ovddidan vugiid ja máhtuid, mat leat addán sidjiide vejolašvuodđaid ávkkástallat valljodagain doallevaš vuogi mielde ja leat sihkkarastán birgema. Henriksen oaivvilda maiddái, ahte álbtmotrievtti siskkobealde ii gávdno dohkkehuvvon čilgehus álgoálbtmotdoahpagii. Sivvan dasa lea dohkkehaváttisvuoha, erenoamážit Ásia ja Afrihká riikkain. Henriksen (2002: 171–72) oaivvilda, ahte sáhttá liikkáge lohkat ahte álgoálbmogiin leat oktasašvuodđat nugo:

- sii leat guovllu manjisboahttit ovdal go dat koloniserejuvvui, ja maid fas odne ođđa joavkkut hálldašit,
- sis leat nana ruohtasat eatnamiidda gos ásset, ja mat leat nannoseappot go earain, ja
- sis lea sierralágán kultuvra, mii čatná sin oktii iežaset máttuiguin.

Jus álgoálbtomáhtu doaba ii leat anus almmolaččat, de lea bahá ahte dat hávká báikkálaš máhtu doahpaga siskkobeallai. Álgoálbtomáhtus sáhttet oaidninvuogit jávkát, nugo ahte dat lea holistalaš, ja rasstilda riikkaid rájáid. Boazodoallu lea ealáhus mii lea viiddis guovlluin máilmmiss. Eatnašat leat álgoálbmogat geat barget boazodoalus. Sis leat ollu oktasaš máhtut bohccos, johtimis, bivttasteamis, duddjomis, dálkkádagain, dádjadeamis, boraspíriin ja nu ain. Sis leat maiddái ollu oktasaš vásáhusat, nugo ahte olggobeale sisabahkjeaddjít leat váldán atnui sin árbevirolaš eatnamiid, ja ahte eiseválddiin lea váilevaš áddejupmi sin eallindilálaš-vuhtii. Boazodoallonissonolbmot leat maiddái gillán go stáhtaid eiseválddit leat duvdán sin eret árbevirolaš eallimis ja nu hehtten sin geavaheamis máhtuideaset ealáhussii ávkin.

Boazodoallomáhttu sáhttá maiddái gullat álgoálbtomáhtui, go eanaš boazodoallit leat álgoálbmogat. Sii eai eaiggáduša eatnamiid, ja sii leat unnán beassan mearridit iežaset eatnamiid badjel.

Sisabahkkemiid geažil leat sin eatnamat gáržon, mii fas gáržuda sin ealáhusa. Boazosámit geat ellet njealji riikkas, leat maiddái áiggiid čađa vásihan sisabahkkemiid iežaset árbevirolaš johtinguovlluide. Ollu diggeášsit duođaštit nákkuid mat leat boazodolliid ja earáid gaskka, geat maiddái ávkkástallet dahje hálidiit ávkkástallat daid seamma guovlluid gos bohccot lihkadir ja guhot. Boazodoallomáhttu lea dasto álgoálbtomáhttu, mii lea áiggiid čađa fievrividuvvon ođđa buolvvaide dain guovlluin gos boazodoallu lea leamaš. Dattetge ii leat sin máhttu dušše báikkálaš máhttu, dasgo boazodoallu lea viiddis guovlluin máilmmiss.

Boazodoallodiehtu ii bálljo gávdno girjiin, ja buot máhtuid fievr ridgeapmi ja hákhan dáhpáhuva muitaleami, guldaleami, dárkuma ja vásáhusaid bokte. Sáhtašii dadjat ahte boazodolliid máhttu lea siskkáldas máhttu go dat ii bálljo oahpahuvvo boazodoalu olggobealde. Dattetge ii gávdno odne vuogádat eiseválddiid beales,

mii áibbas čielgasit válddášii vuhtii boazodoalu siskkáldas máhtu, ja mii bijašii dan vuodđun go loahpalaš mearrádusat dahkkojuvvojtit. Odne maiddái ii leat vuogádat mii sihkkarastá ahte boazodoallit leat mielde mearrideamen iežaset ealáhusa ja eallinvuogi badjel. Boazodoallomáhttu lea maiddái geavatlaš máhttu, ja danne lea dárbu dás dan čilget.

Geavatlaš máhttu

Eanaš oassi boazodoalus oahpahuvvo geavatlačcat. Unnán lea čállojuvvon dan birra, ja dadjat juo buot oahpaheapmi ja oahppan dahkko barggadettiin, muitalettiin, dárkkudettiin ja olbmo iežas vásáhusaid bokte. Čilgen dihtii geavatlaš máhttu, de válddán atnui Bertil Rolf (1995) čilgehusaid, das mo geavatlaš máhttu doaibmá ja mat dan dovdomearkkat leat. Son lea váldán vuodú Michael Polanyi máhtto- ja servodatteorijain.

Bertil Rolf (1995: 110–111) čujuha Polanyi ja májgga eará filosofii geat dadjet ahte geavatlaš máhttu lea álo njuolggadusaid duohken. Son oaivvilda ahte gávdnojít guovttelágán geavatlašmáhtut. Vuosttas geavatlašmáhttu mearkkaša ahte áššit čovdojuvvoyit njuolggadusaid vuodul. Nubbi geavatlášmáhttu mearkkaša fas ahte olmmoš fikkaha dihto dagu dannego dat lea buoret go eará dagut. Dát eaktuda ahte olmmoš dovdá njuolggadusaid dasa ahte mo earuhit buori heajus. Njuolggadusat doibmet dalle jávohis máhttun doaimmahettiin. Vuosttas geavatlaš máhtus gávdnojít njuolggadusat, mat biddjojuvvoyit vuodđun árvvoštaladettiin dagu. Nubbi geavatlaš máhtus ferte dahkkis leat sajáiduvvon njuolggadusat, mat doibmet jávohis máhttun ja mii fas mearkkaša ahte máhttu ovdanbuktojuvvvo giela haga.

Polanyi mielas lea gielain vejolašvuhta čájehit jávohis máhtu dehálašvuoda kultuvraárbbi sirddedettiin. Olmmošlaš diehtu stuorru dávjá go jávohis máhttu ja gielalaš reflekšuvdna doibmet ovttas. Jávohis máhttu sáhttá soames áiggi gárvvohuvvot gielain, cuiggoduvvot kritihkalaš reflekšuvnnain, ja hápmi sáhttá buriid eavttuid vuodul buoriduvvot ja sajáiduvvot fas peršuvnnalaš máhttun. Gielalaš ja ii-gielalaš máhtut ovdánit ovttas. Dán láhkái kultuvra sajáiduvvá midjiide ja šaddá min peršuvnnalaš máhttun, oaivvilda Polanyi. (Rolf 1995: 35.)

Peršuvnnalaš máhttu badjána go máhttoárbevierut ovttastahttojít indviidalaš vásáhusaiguin. Lea ovttasbargu indviida ja árbevieru gaskka, mii ládesta dasa maid Polanyi gohčoda “peršuvnnalaš máhttun”. (Rolf 1995: 13.) Peršuvnnalaš máhttu manná viidábut go subjektiivvalaš máhttu, go das leat oktasaš njuolggadusat dasa mo olmmoš strukturere, diehtá dahje doaimmaha juoidá. Máhtu integreren gal lea dáhpáhuvvan subjektiivvalaš vásáhusaiguin, muhto seammás lea vuodđuduvvon kultuvrralaš árbáí. Nu leage peršuvnnalaš máhttu čadnon kultuvrralaš njuolggadusaide, mat leat vuodđuduvvon oktasaš lágalašvuhtii. Jus spiehkasta njuolggadusain, de sáhttá moitojuvvot. Polanyi oaivvilda, ahte eai

juohke olbmos dárbaš leat buot vásáhusat. Kognitiivvalaš bargojuohku lea vejolaš. Muhto vásáhus ii šatta dárbašmeahttumin dahje dan ii sáhte lonuhit govvádusaiguin. Sihke son gii ráhkada kárta ja son gii dan lohká maŋjá, dárbašeaba vásáhusaid heivehan dihtii njuolggadusvuogágada iežaska vásáhusaid ektui. Máhttofievrrideapmi viidáseappot góibida unnimusat golbma buolvva. Ii sáhte gohčodit árbevierrun jus omd. áhčči sirdá mánnasis máhtu maid ieš lea hutkan. (Rolf 1995: 101.)

Rolf čuoččuha ahte árbevierru hábme kultuvrralaš joatkaga. Dat mii lea sirdašuvvan, joatká doaibmat otná áiggis. Árbevirolaš joatkka, mii sistisdoallá sirdašuvvama, ii dárbaš sistisdoallat justa dan seamma mii lei ovddežis, muhto dattetge ferte sulastahttit ovddeža. Rolf čujuha Polanyi gii earuha árbevieruid mat rivdet dain mat eai rievdda. Polanyi deattuha aivve daid árbevieruid mat rivdet. Árbevierus ii leatge sáhka, Rolf oaivila mielde, dušše máhtu sirdimis, muhto lea sáhka das mo fievrridit jurdda- dahje doaibmaminstara nuppiide. Jurdda- dahje doaibmaminstara fievrrideapmi mearkkaša, ahte B sirdá C:ii maid ieš lea oahppan A:as rievdatkeahttá dahje unnit rievdadusaiguin. (Rolf 1995: 146–147.)

Rolf čujuha Polanyi gii oaidná geavatlaš diedu guovtti dásis, nammalassii *gelbbolaš geavatlaš máhttu ja elementára geavatlaš máhttu*. Gelbbolaš geavatlaš máhtu mihtilmasvuhta lea, ahte dan doaibma lea nannosit čadnon dilálašvuhtii ja kontekstii. Ovddalgihtii ii sáhte bidjat čielga, ovttageardánis njuolggadusaid dasgo dilli ieš góibida oðasmahtima, ja dan ii sáhte ovddalgihtii einnostit. Gelbbolaš geavatlaš máhttu lea dasto rievdaš njuolggadusaid ja juohke áidna konteavstta duohken. Elementára geavatlaš máhtu dovdomearkkat leat fas nuppeláhkái. Máhttodoaimmaheapmi sáhttá stivrejuvvot čavga njuolggadusaiguin. Elementára geavatlaš máhttu addá vejolašvuodaid čoavdit rutiidnabargguid rievddakeahtes birrasis maid olmmoš ovddalgihtii dovdá. Indiviida máhttu sistisdoallá dasto, ahte son heiveha iežas čavga njuolggadusaide. (Rolf 1995: 104–112.)

Nugo mun ádden Bertil Rolf, de ii sáhte buot geavatlaš máhtu njulgestaga oahpahit, go lea veajemeahttun dovdat juohke dilálašvuoda ja konteavstta ovddalgihtii. Vaikke leat gal maiddái dilálašvuodat maidda ovddalgihtii gávdnojít čavga njuolggadusat. Nu heivege geavahit dán juogu maid Rolf geavaha, nammalassii *gelbbolaš geavatlaš máhttu ja elementára geavatlaš máhttu*. Mun válljen dás vuos guorahallat geavatlaš máhtu dainna hámiin, ahte eai buot áiggiid gávdno čielga njuolggadusat mo ássiid čoavdit. Válljen dan dahkat go boazodoallu doaibmá dávjá eahpesihkkaris dilálašvuodain. Hárve leat dilálašvuodat ovttalágánat. Fámut mat eai leat olbmo olámmuttos, váikkuhit dávjá boazodoalu dilálašvuhtii. Válljen dás geavahit Inga Kristine Ragnhild Eira Kemi (Ingá) govahallama das mo boazodoalus dilli sáhttá rievddadit. Ingá lea ieš bajásšaddan boazodoalus ja bargá dál maiddái olles áiggi boazodoalus. Go Ingá, mun ja Ailo, gii lea su bárdni leat vuodjimin biillain giđdat mieđušteamen Aillo giđđajohtimii, de son govahallá man váttis lea einnostit mo dilálašvuodat leat sihke bohccuide ja olbmuide go galget johtit davás:

Boazodoallu lea dego biilavuodjin, don it goassige oahpa ollásit, don it dieđe goassige mii doppe lea ovddabealde. Boazodoallu lea maid guohtuma duohken ja gokko don jođát. Don it sáhte juohke jagi johtit justa seamma saji, don fertet veahá nuppe sajis johtit, soaitá doppe buoret guohtun. Lea álohhii juoga earaláhkái, juohke beaivve.

Go ovddalgihtii ii sáhte mearridit justa goas ja gokko johtit danne go ii sáhte diehtit mo siivu ja guohtun lea, de ferte dat váikkuhit maiddái oahpahepmái. Konteaksta, olbmo iežas vásáhusat ja dárkun fertejít leat dárbašlaš bealit go oahppamis lea sáhka. Sáhttá jearrat, áhte lea go ba vejolaš oahppat boazodoalu almmáge leat doppe gos doaibma lea? In áiggo dás geahčálit olles gažaldaga vástidit go eahpitkeahttá sáhttá muhtun osiid oahppat maiddái boazodoalu olggo-bealde. Muhto lea oalle čielggas maiddái, ahte ii buot máhtu sáhte njulgestaga oahpahit, go iešguđetlágán dilit gáibidit *gelbbolaš geavatlaš máhtu*, nugo Rolf (1995) dan gohčoda. Go galgá hálldašít dien máhtu, de ferte máhttit “lohkat” dilálašvuoden ja dan vuoden mearridit. Dasa fas gáibiduvvo, ahte olmmoš lea ieš doppe ja máhttá válljet buoremus čovdosa máňgga eará čovdosiin.

Grete Bergstrøm (2001: 60) mielas lea dehálaš muittuhit ahte giella lea mágssolaš go jávohis máhtu gálgá sirdit, muhto giella ii leat dehálaš dušše dan dihtii ahte gielalačcat čilget ilbmudusa man birra galgá oahppat. Ovdamearkka dihtii go meaštir rámida iežas oahppi bargovugiid, cavgila mo niibbi berre eará láhkái doallat dahje meaštir oahpista oahppi bargui oanehis čilgehusain leat njálmmálaš giela albmaneamit mat mearkkašit ollu go galgá háhkat dan jávohis dieđu, mii lea geavadiin ja gelbbolašvuoden.

Antropologa Tim Ingold (2000a) geavaha doahpaga *landscape*, mii sámegillii vástidivčii duovdda. Ingold oaivvilda ahte duovdda šaddá oassin mis go mii eallit doppe seammaláhkái go mii leat das oassin. Duovdda lea málbmi nugo olbmot dan dovdet geat ellet doppe ja geat orrot ja johtet daid guovluin. Ingold oaivvilda ahte duovddahámit eai leat ovddalgihtii gárvásat olbmuide, muhto duovddahámit vuodđuduuvvojtit eallima dahje orruma proseassaid bokte. Duovdaga ii sáhte gieđahallat objektan jus dan galgá áddet. Muhto duovdagat baicce hábmejít olbmuid ja olbmot hábmejít duovdagiid. (Ingold 2000a: 191–198.)

Mun ádden Ingolda dainna lágiin ahte olmmoš oahppá ipmirdit duovdaga go ieš lea doppe. Boazosápmelaš hábme duovdaga go vásáhusaid bokte lea ásahan buriid johtolagaid sihke bohccuid ja olbmuid várás. Nuppebeales hábmejít duovdagat boazosápmelačča ipmárdusa. Go omd. tv ja rádio lohpidot čáppa dálkki, de sáhttá boazosápmelaš dulkot dan nuppeláhkái. Beaivvadat billista siivvu ja šaddá leat giksin jođidettiin.

Oahpásmuvvan duovdagiidda dáhpáhuvvá oassálastima bokte. Ingold (2000b: 21) čujuha Gibsonii gii geavaha doahpaga *education of attention*, man sáhtašii sámegillii gohčodit *fuomášumi oahpaheapmi*, go lea sáhka das mo juohke buolva oahpaha ođđa buolvvaid. Aimo Aikio gii lea dutkan sámi mánáid ovdá-

neami proseassaid, oaivvilda ahte dárkuma ja áiccadeami máhtu ovdáneami mielde mánná máhttá giddet fuopmášumi dehálaš ja mágssolaš stimulánssaide. Aikio lohká máná oahppat barggadettiin ja áiccadettiin. (Aikio 2000: 215.) Ingold govahallá áicilvuoden oahpaheami go mánná dahje easkaálgi biddjo vissis dillái, gos nevvoduvvo dovdat dili, máistit dan dahje fuomásit dili eará láhkái. Mánná oahppá go lihkada máilmis, guorahallá dan, dahje dušše gulđala dan ja fuomásia mearkkaid mat čájehuvvojít máilmis. (Ingold 2000b: 21.) Ingold oaivvilda ahte mánát ohpet čájehame bokte. Čájehit juoiddá nubbái dagaha dan oidnosin, ja nu sáhttá son oažzut das njulgestaga ipmárdusa geahcadettiin, gulđalettiin dahje dovddadettiin. Bagadalli bargu lea dasto bidjat easkaálgiid dilálašvuodaide gos sii ožzot vejolašvuoden vásihit dili. Go easkaálgi lea biddjon vissis dilálašvuhtii, de son lea maiddái råvvejuvvon geahččat duon dahje dán geahčastagas. (Ingold 2003: 51–52.)

Oahppan dakhko dasto dainna lágiin ahte olmmoš ieš lea doaibmamin aktiivvalaččat. Muhto lea maiddái soames gii čájeha maid galgá fuomásit ja nugo mun ádden, de ferte olmmoš gii čájeha váikkuhit dasa maid nubbi galgá oahppat. Leat rávvagat maid mielde mánná dahje easkaálgi galgá čuovvut go čuolmmaid čoavdigoahktá. Sáhttet gávdnot máńga vejolašvuoden mo čoavdit ášši, muhto go nubbi čájeha, de čuovvoluvvo vissis málle man mielde bargat. Čájeheddji lea seammás fievrrideamen odđa buolvvaide máhtu, maid son ieš lea ožzon ovddit buolvvain. Nu sáhttage lohkat ahte árbevierru fievrriduvvo viidáseappot, ja mánná sosialiserejuvvo servodahkii.

Sosialiseren servodahkii ii dáhpáhuva passiivvalaččat. Mánát leat bacie ieža aktiivvalaččat mielde hábmemin iežaset dilálašvuoden. Dattetge leat struktuvrrat servodagas mat eastadit mánáid leat čađat mielde hábmemin diliset. Mánát boazodoalus maiddái ellet dilálašvuodain gos skuvla lea guovddážis. Dat dieđusge hehtte sin oassálastimis ealáhusas seammaláhkái go sin ovddit buolvvat leat sáhttán dahkan. Boazodoallomáhttu gulláge álgoálbmotmáhttu, go eanaš boazodoallit máilmis leat álgoálbmogat. Sis leat dávjá seamma vásáhusat, ja maiddái dávjá ovttalágán máhtut, ja sii leat maiddái gillán go olggobeali álbgogat ja stáhtat leat bahkken sin guovlluide ja maiddái čađahan rievdadusaid maid sii ieža eai leat hálidian. Nu leage álgoálbmotmáhttu mángii rašis dilis go oarjemáilmimi dieđalaš máhttu lea politihkalaččat kievrrat.

Máhttofievrrideapmi lea sosialiserema oassi, ja ii datge dáhpáhuva ovttageardánit. Oahpaheapmi boazodollui dáhpáhuvvá eanaš áigge barggadettiin ja dávjá olmmoš galgá leat doppe gos bargu dakhko. Geavatlaš máhttu leage guovddážis go boazodoalus lea sáhka. Easkkaálgi oahppá go čuvoda oahppan olbmuid geat lágidit sin dakkár dillái gos ieža fertejít čuolmmaid čoavdit dárkuma, dovdama dahje gulđaleami vuodul.

4 Boazosámi mánáid sosialiseren

Boazosámi mánáid bajásšaddandilálašvuhta sihke sulastahttá ja spiehkasta oppalaš bajásšaddandilálašvuodain. Ovtalágánvuodat bohtet ovdan go boazosámi mánát maiddái orrot čoahkkebáikkiin, vázzet skuvlla ja sis leat ollu seammalágán beroštumit go mánáin muđui eará guovluin. Boazosámi mánáid eallimis leat dattetge erenoamášvuodat go buohtastahttá mánáiguin muđui. Sii oahpahuvvojít boazodoalloeallimii, mas leat iežas árvvut maidda mánát bajásgessojuvvojít. Dábálaš boazodoalloeallin Guovdageainnu orohagain lea johtin siidda mielde ja dasto báikedoalu hommát gos duddjon ja ráhkkaneamit siidadollui leat guovdážis. Boazosámiin, nugo earáinge geat ellet árbevirolaš ealáhusain, leat árvvut mat fievrriduvvojít buolvvas bulvii ja mat leat dahkon áiggiid čađa. Vaikke boazodoallu lea rievdan ja mánát eai leat mielde seammaláhkái go ovdal, de goittotge čuvvot ain ollu ovddeš árvvut ja vierut sin mielde.

Boazosámiin leat ollu sullasaš árvvut ja vierut go dálóniin. Dát guokte joavkku leat guhkit áiggiid orron bálddalágaid. Oktasaš árvvuid ja vieruid čilgehus lea maiddái das go gávdnojit sihke dálonat geat leat leamaš boazosámit ja boazosámit geat leat leamaš dálonat. Dainna lágiin eai leatge nu čavga ráját dán guovtti joavkku gaskka. Dattetge leat dieđusge erohusat das mo dán guovtti joavkku mánát bajásgessojuvvojít, go eallinvuogit leat goabbatlágánat. Boazodoallu gáibida sierralágán heivehemiid. Siiddat johtet, ja nu leatge maiddái boazosámiid beroštumit čatnasan bohccuide ja eatnamiidda gos sii johtet.

Oahpaheapmi bargguid oktavuodas

Inggá Risten Rávdna Kemi gean mun lean čuvvon iešguđetlágán boazodoallo-bargguid olis, gullá Oarje-Sievjju orohahkii, mii lea unna suoloorohagaš Oarje-Finnmárkkus. Lean váljen čuovvut Inggá go son lea olles áigge boazodoalus. Son bargá árbevirolaš boazodoallobargguid, nugo omd. ávnnasta ja duddjo. Inggá johtá maiddái siidda mielde geasseorohahkii ja válđá mánás mielde. Son bidjá áiggi oahpahit gánddas gii lea skuvlavázzi. Nugo válđá bártnis Aillo mielde bargguide mat lunddolaččat gullet áigodahkii, omd. čuohppaba gámasuinniid čakčat ovdal go suoidni ruškkoda beare ollu. Inggá oaivvilda ahte vähnemät buoremusat oahpahit go sii dahket dan hui dárkilit. Son eahpida, ahte vieris olbmot beroštivčče seamma vuđolaččat oahpahit go dan maid vähnemät dahket. Go Inggá oaivvilda ahte vähnen buoremusat oahpaha, de mun dulkon maiddái dan guoskat erenoamáš máhtuide mat leat gullevaččat sin siidii. Siidda erenoamáš máhtut leat čoggon áiggiid čađa go olbmot leat johtán ja birgen guovluin. Čovdosat leat heivehuvvon sin bearrašii ja guovlluide.

Seammaláhkái go boazodoallu doaimmahuvvo májgga láhkái, de sáhttet barggut maiddái čovdojuvvot iešguđetgeláhkái. Májggabealatvuhta boahá bures ovdan báikedoallobargguin. Váhnemát sáhttet oahpahit mánáideaset duddjot nugo sii leat fas iežaset váhnemiin oahppan. Bohtosiid oaidná biktsiin. Eai buohkat vácce ovttalágán nuvttohiiguin dahje gávttiiguin. Muhto dieđusge lea maiddái olbmuin válljenfriddjavuohta, ja eai buohkat čuovvol iežaset váhnemiid málliid. Girjáivuohta dattetge bisuhuvvo go gávdnojít nu iešguđetlágán duddjonmállet. Májggas háliidit oahpahit iežas bearraša málle mielde. Váhnemát dovdet maiddái dárbbu oahpahit mánáideaset, go eai gávdno eará ásahusat main lea čielga ovddas-vástádus fievrredit sin máhtuid mánáide. Boazodoallomáhtut eai leat formálalačcat otná oahpahusas vuodđoskuvllain mielde, ja nu lea oahpaheapmi váhnemiid ja fulkkiid duohken.

Čakčat mearragáttis

Ailo beassá dál leat mielde eanaš boazodoalu bargguin maiddái čakčat go orru Geassenjárggas gos sis lea geassedállu. Son lea oainnat golbma majemus jagi vázzán skuvlla Fielvuonas giđa rájes skápmá rádjái, go dalle lea sin eallu Sievjjus. Geassenjárggas lea miila Fielvutnii ja dohko Ailo johtá busse mielde juohke iđida, ja fas ruovttoluotta go skuvlla nohká. Ailo sáhttá dan dahkat go Ingá maiddái sirdá dohko. Ovdal go Ailo vázzigodíi skuvlla doppe, de šattai son etniinis vuodjít Guovdageainnus juohke vahkkoloahpa Geassenjárggi. Dál eaba dárbaš šat dan dahkat go leaba čađat doppe gitta dassázii go eallu fas johttá lulás čakča- ja dálveeatnamiidda. Ingá čilge man lossat lei ovdal go šattaiga Ailloin johtit miehtá čavčča Guovdageainnu ja Geassenjárgga gaskka. Dohko ádjánii sullii 4 diimmu biillain oktan fearggain. Ingá lea Geassenjárggas go čilge man olu álkít lea šaddan manjná go Ailo vázzigodíi skuvlla Fielvuonas:

Na, mun lean ovdal šaddan mannat Guovdageeidnui ja orrut doppe vahkuid ja go vahkkoloahppa boahá, de bearjadaga deike, sotna-beaivve fas ruovttoluotta. Ja de šattan bivdit hui ollu friddja go de álget dat barggut, de ferte váldit ruovttuskuvlla mánga vahku. Dáppe gal čakčat leat nu ollu barggut. Dainna lágiin mun lean šaddan nu ollu Ailo váldit eret skuvllas. Dáppe lea ollu maid galgá oahppat, muhto de lea nubbi dat ahte ollu fas bázahallá doppe skuvlabargguin Guovdageainnus, nu ahte ii datge leat nu beare buorre. Šaddá fas nu lossat duohpat daid earáid sisa. Dáppe ii dárbaš nu, dáppe mun sáhtán mannat jearrat maid dat galget dán vahku bargat, in dárbbat váldit manjnálagaid májggaid vahkuid. Mun sáhtán dáppe mannat duos dás ain jearrat maid dat barget dán vahku, ja moai sáhtte ain go

lea dilli bargat ain veahá. Dat šattai mihá váddásat Guovdageainnus oažžut dan vahkkoplána.

Go mun ledjen Inggá ja Aillo luhtte Geassenjárggas árračavča, de mun bessen oaidnit maid Inggá oaivvilda go lohká ahte čakčat lea ollu maid mánna ferte oahppat bargat. Dalle go mun ledjen doppe, de lei Aillo áhči Áslat Sievjjus ráhkkaneamen gárddástallamiidda, nugo gárddiid cegget. Inggá ja Ailo leigga fas Geassenjárggas gos Ailo iđđes čuovui busse mielde Fielvuona skuvlii. Soai leaba gámasuinniid čuohppan, spiilen duljiid, suovastuhttán biergguid. Bierggut galget leat maiddái niestin gárddástallanágge.

Go čakčat čohkkejtit ealu gárdái Boazovuonas mii lea Sievjjus, de Inggá váldá Aillo mielde. Geassenjárggas johtet fatnasiin Boazovutnii. Inggá gácces lea goahti doppe, gos orrot mánja beaivve ja gitta dassázii go leat suvdán bohccuid prámá mielde nannámii. Boazovutnii ceggejtit gárddi, ja doppe merkejtit geažotbeljiid ja rátkkašit ovdal go prámá boahtá suvdit bohccuid. Dalle suvdet sierra gávpečorraka mii njuvvojuvvo nannámis. Dohko bohtet maiddái kránnjáisiidda olbmot geat fas váldet iežaset mastan bohccuid, ja mat maiddái suvdojuvvojít prámáin.

Čohkkenáigi

Go sullos čohkkejtit ealu, de dárbbašuvvojít ollu olbmot go doppe ii sáhte 4-juvllagiin dahje mohtorsihkkeliin vuodjit. Suoloorohagain leat maiddái unnit siiddat go dohko eai čága ollu bohccot, ja nu leatge doppe unnit olbmot geat beaivválaččat barget boazodoaluin. Áigodagain nugo omd. čohkken- ja gárddástallanágge čakčat, dárbbašuvvojítge ollu veahkit. Sihke nissonolbmot ja mánát leat mielde čohkkemin. Inggá láve lohkat, ahte juohke olbmui lea dárbu go eallu galgá čohkkejuvvot. Go mun lean Boazovuonas čakčat gárddástallama áigge, de leat Inggá ja Áslaga siidaguoimmit doppe. Inggás leat guokte siessala doppe, Mihkkal ja Nils Issát. Soai leaba johtán Sivjui manjemuš jagiid, ja leaba dál ožžon bistevaš lobi Boazodoalloháldahuas johtit dohko. Mihkkala eamit, Vivi ja sudno guokte máná, Nils Issáha bárdni, Mihkkala ja Nils Issáha áhči ja sudno áidna oabbá ledje maid doppe. Dasto ledje Áslaga vieljat Mihkkal oktan su nieiddain ja Nils Máhtte eamidiinnis Biret Elliin ja vel reaŋga. Áslaga oappá bárdni Állen eamidiinnis ja áhčiin. Maiddái Állen lea johtán dohko manjemuš áigge, muhito son gal dál ii jođe šat Sivjui. Go čohkkiimet, de šadde mis muhtumat mannat fatnasiin ja dasto báhcit iešguđetge sajiide ja das goargnugoahtit várrái. Inggá lei ovdal munnej muitalan man lossat boazodoallu sáhttá leat sullos. Son lei munnej lohkan man mívssolaččat nuorraolbmot leat sullos go doppe šaddá alla váriid goargnüt. In ádden dalle maid son oaivvildii, ovdal go ieš vázzen ja vásihin man lossat lei goargnüt bajás ceakkos váriid.

Giðða ja geassi

Mannan giða lei Ailo vuosttas geardde okto áhcis Áslaga mielde johtimin. Inggá doalvvui su biillain Stillai, mii lea sullii 17 miilla Guovdageainnus eret. Áslat ja su siida geat johtet Stillia meattá, bohte Aillo viežat luoddageažis. Stillas sii ádjánedje vel sullii vahku ovdal go ollejedje ealuin Davvinjárgii gos sii juohke giða rátkkašit ja suvdet prámáin bohccuid Sivjui.

Geasi áigge merkejit misiid jiehkis. Dohko Ailo ja su siidaguoimmit mannet helikopteriin, ja vázzet fas vulos. Jagi 2003 ledjen mun maiddái Aillo gácce mielde go merkejedje misiid jiehkis. Earret Aillo ja su vahnemad, de lei Aillo čeahci, 3 vilbeali geain 2 leat eatni bealde ja okta fas áhcí bealde, 1 oambealli gii lea eatni bealde, guovtti vilbeliid eamidat ja vilbeliid 3 gánda, ja oambealis vel okta gánda. Nu ledje doppe earret mun, 9 ollesolbmo ja 5 máná.

Jiehkki bohccot bálget báhkaid áigge, ja dat geahpeda mearkuma go bohccot lunndolaččat vielladit dohko. Misiide lea maiddái linis Jiehkis muohhtaga alde, ja bohccot fidnejit čázi mii lea dehálaš erenoamážit geassebáhkaid áigge. Jiehkis Ailo ja su siidda olbmot ceggejtit vuos áiddiid ovdal go bohccuid vuojehit gárdái. Mearkunáigge ijastaddet tealltái maid ceggejtit muohhtaga ala. Ailo ja eará mánát besset vuodjit skohteriiquin go doppe lea muohta vaikke lea geassi. Go mearkumis geargat, de vuolgit vulos. Vuollelis Várddehárjjis lea orohaga oktasaš barta, gosa mii bisánat ja ijastaddat doppe guokte ija. Barta geavahuvvo geasset guođohetti ja čakčat čohkkenáigge. Geasset mannet badjelebbui ja lagabui jiehki gosa sii ceggejtit lávu. Dalle sii fertejtit guođohit ealu nu ahte dat ii mana davábeallái jiehki gos fas sáhttet masstadir eará siidda bohccuiguin. Go čoskkida, de mannet fas vuollelii gos bivdet jávrriid ja meara.

Oktavuodat earáiguin

Boazodoalus lea ovttasbargu ja gulahallan earáiguin dehálaš árvvut. Olmmoš ii sáhte okto birget boazodoalus. Veahkit dárbbasuvvojtit, ja erenoamážit go leat bargoáigodagat goas leat ollu barggut, nugo čohkken-, rátkin- ja njuovvanáigge. Olmmoš dárbbashaš maiddái buriid oktavuodaid siidda siskkobealde ja maiddái eará siiddaiguin. Inggá lohká ahte soabalašvuoda lea dehálaš mánái oahpahit vai ii dagut iežas ovdii maidege.

Fulkkiid dovdan ja muđui eará olbmuid geat leat du lahka go jođát ja barggat boazodoaluin, lea dehálaš máhttu mánáide. Inggá namuha álo Ailoi fulkkiid fuolkevuoda namahusaid mielde. Inggá lohká, ahte Ailoi lea dehálaš oahpásmuvvat ja diehtit geat su fuolkkit leat, erenoamážit go son lea áidna mánna. Seammaláhkái go Inggá geavaha fuolkevuoda namahusaid, de son maiddái geavaha risteatni dahje ristáhcí namahusa juohke álo go namuha sin. Aillos leat maiddái mearragáttelolbmot ristváhnemad. Inggá mielas lea oainnat dehálaš ahte Aillos leat oktavuodat

maiddái olbmuiguin mearragáttis. Aillo ristváhnemát čájadit dávjá sin luhtte Geassenjárggas ja su ristáhčči láve maiddái muhtumin veahkkin boazobargguin. Dasa lassin go mánná doahppáda guovlluide ja olbmuide geaidda leat čanastagat, de maiddái movttiidahtto oažžut lahkavuođa bohccuide.

Olbmo ja bohccuid gaskavuođat

Bealljemearka

Mánát ožzot iežaset bealljemearkka, ja vuosttas miesi sáhttá mánná oažžut juo ristaskeajkan. Dađistaga lassánit mánnái bohccot go miesit šaddet áldun ja guddet fas misiid. Odđa miesit ožzot seamma mearkka go álldut ja dađi mielde lassánit mánnái bohccot.

Boazu leage dehálaš olbmui, go mánnávuoden rájes juo šaddet mánás čanasteamit bohccuide. Anna Persdatter Buljo Bæhr (Ánná) govahallá boazosámi mánáid ja lohká sis leat boazoluondu:

Mánain lea juo luondu sogas sohkii. Boazosápmelaččain lea boazo-luondu, ja mánain maid seammalágán luondu. Oažžu guorahallat go humada sámi mánáiguin. Das lea gal nu boazoluondu jus bohccuid birra šaddá sahka, dat nie aivve jurddaša ahte nie galggašii, ja su bohcco ii galgga njuovvat. Dat galgá ruohttat doppe, ja sihtá iežas bohccuid eallit. Ii go leat boazoluondu, go nu háliida ahte sus galget leat dat bohccot?

Go Ánná dás lohká, ahte boazosámi mánain lea boazoluondu, de mun ipmirdan ahte son oaivvilda mánáid beroštit iežaset bohccuin ja háliidit daid eallit ja háliidit daidda buoremus dilálašvuodenaid. Bealljemearka leage mii čájeha geasa boazu gullá. Nils Isak Eira (1994) čállá ná bealljemearkka dehálašvuoden birra:

Bealljemearkkas lea iešalddis diehtelasas stuora váikkuhus bagadal-lamii. Dakkaviđe go mearka čielgá, diehtigoahtá gean boazu lea, de dieđus unnu daid bohccuid lohku sakkarahkan maid gaskkaid duot mearri boazu lea. Ja go dasto muitala velá makkár boazu lea, man agát ja lea go njiŋŋelas vai varis, de dieđus unnot vejolašvuoden mihá eambbo ja nu šaddá vejolaš fuobmáhahttit nuppi guđe bohccos lea sahka. (Eira 1994: 80.)

Go mánná oažžu mearkka ja iežas bohccuid, de son čuovvu maiddái mielde mo daiguin manná. Sáhttá dadjat ahte mánná lahkona bohccuid, ja dan bokte sáhttá badjánit miella searvat boazobargguide. Nu nanusmuvvá maiddái máná identitehta leat boazosápmelažžan.



Govva 2. John-Tomas Labba, Pia-Maria Labba ja Per G:tson Labba

Dovdat iežas bohccuid ja earáid bohccuid leage válđo máhttu boazodoalus. Jus olmmoš ii dovdda bealljemearkkaid, de gal lea dadjat juo veadjemeahttun bargat boazodoalus. Mánná oahppáge dovdat vuos iežas mearkka go merkegoahtá misiid. Váhnen dahje earát bagadallet máná merkedettiin. Áslat maiddái oahpaha Aillo merket. Ailo doallá bealjis ja merkegoahtá. Áslat fas čippostaddá bálddas ja bagadallá:

Diesa galgá gieška, čuohpas beare vulos. Dál oaččot mohkastit. Die lei gieška, ja dan ceahkká duokko nuo. Čugges fal ja de mohkas. Ja de moai válde olgeš bealji. Deatte beare vulos, ja de čuohpas dien. Válđdát dán bealde sáni duokko badjelis. Ále vuos mohkas, vuolgue beare, ja de guhpirdat. Oainnat man čielga mearka šattai.

Mánát dábalaččat ožžot mearkka mas lea vánhemiid mearka vuodđun, ja dasa bohtet lassin soames rievdadusat. Rievdadusat bohtet ovdan lassi sániiguin dahje soames unnit sátni rievdaduvvo, omd. lea dás ceahkes lasihuvvon Aillo merkii.

Dasa lassin go dovdat mearkkaid ja diehtit goal lea gudege boazu, de ferte maiddái doahpagiid bokte máhttit nuppiid olbmuide muitalit makkár iešguđetge boazu lea. Nu ferte maiddái bohcco eará iešvuodđaid mielde dovdat, nugo ovdamearkka dihtii olgguldas hámi mielde. Čeahpes boazobargi dovdá sihke bohcco mearkka ja olgguldas hámi. Ii juohke bohcco dovdda seamma bures, ja mihtilmass bohccuid muitá buorebut go dábalaš bohccuid. (Eira 1994: 78–80.)

Diiddat

Mánát maiddái diiddaid bokte ávžuhuvvojit beroštit sihke iežaset ja muđui earáid bohccuin. Guovdageainnus ja Gárasavvona guovlluin lean gullan diidda, maid lei dábalaš dadjat mánáide go lávostalle: “Ále dájo dolaiguin vai miessi ii čalmmehuva!” Nubbi diidda maid mun lean gullan Gárasavvona guovlluin lea: “Vai bohccot eai moskkohala gáisái, de ferte niibbiin časkit ráiggi bohcco beađbái maŋjá go dávtti lea sohpan¹”. Goalmmát diida maid lean gullan Guovdageainnus ja mii lei mánáid várás: “Gii dál doalvu dávttiid olggos, dasa buressivdniduvvojit bohccot daid dávttiid sadjái”.

Dan sadjái go gohččut máná doalvut dávttiid olggos ja gieldit mánáid dolaiguin dádjumis, de diiddastallama bokte geažiduvvojit mánáide sihke buorit ja heajos váikkuhusat jus duon dahje dán dahket. Diiddaid bokte boahhtá ovdan bohcco dehálašvuhta mánnái. Eahpitkeahttá lei mánáide miela mielde bargu doalvut dávttiid olggos go dihte ahte sidjiide bodđi dat ávkin, ja nuppe beales eai stoahkan dolaiguin go ii oktage hálidian váivviid iežas bohccuide.

¹ Mun lean maiddái gullan geavatlaš čilgehusa dása, man mielde earát galget beassat oaidnit ahte lea olmmoš gii lea borran, eaige eallit.

Diiddat doibmet dainna lágiin ahte mánáide muitaluvvo manne sii berrejít dahje eai berre nu dahkat. Go mánáa oahpahuvvo diiddaid bokte, de son ii dušše gohččojuvvo dahje gildojuvvo bargamis, muhto oahppá maiddái man dihtii son galgá dahje ii galgga bargat vissis láhkái.

Hállu daguid vuodđu

Aillo áhcči, Áslat lea vuolgaleamen dálvesiidii gos galgá njuovvat niestebohccuid. Son hásstuha Aillo vuolgit mielde. Muhto Ailo ii háliidivččii ja lohká iežas áigut olbmáiguun duhkoraddat. Áslat geahččala hálahit, ja lohká ahte doppe leat eará mánát maiddái. Ailo nimmorda ja lohká leat suivat doppe. Inǵá botke sudno digaštallama ja lohká, ahte Ailo ii dárbbáš vuolgit jus ii leat miella. Inǵá oaivvilda ahte olbmos ferte alddis leat beroštupmi boazobargguide, ja danne nuppi ii ábut bágget. Ailo manná olggus, muhto boahtá fas ja de gal lohká iežas vuolgimin áhcis mielde.

Inǵá addá mánnásis válljenvejolašvuoda, seammás go maiddái geažuha ahte boazodoalu bargguide ferte liikot jus galgá lihkostuvvat. Mánnái addo vejolaš-vuohta jurddašit dan birra maid eadni lea sutnje dadjan. Eadni ii leat bággen su, muhto lea baicce geažuhan, ahte olmmoš ii birge boazodoalus, jus alddis ii leat hállu dohko vuolgit.

Anton Hoëm (1976b) guhte lea dutkan bajásgeassima boazodoalu ja dáloniid mánáid gaskkas Sis-Finnmárkkus, oaivvilda ahte dávjá dahkko loahpalaš mearrádus olbmo hálu vuodđul. Go ii leat hállu, de olmmoš geažuha ahte doaibma ii leat dehálaš subjektiivvalaččat. Dohkkehít “hálu” lea dohkkehít nuppi vuogat-vuođa mearridit iežas daguid badjel, mii orru leamen diehttalas jus mánáa galggaš šaddat iešheanalaš doaibmi olmmožin. Nu guhká go mánát leat unnit, de sáhettet váhnemät muhtun muddui váikkuhit mánáid nu ahte sii ožzot ovddasvástádusa. (Hoëm 1976b: 152.)

Dađi mielde go mánát sturrot, de unnu váhnemiid stivrenvejolašvuhta. Mánáid “miella” dahje vuoruheapmi dáhpáhuvvá almmá dan haga ahte váhnemät njulgestaga váikkuhit. Váhnemät eai mívssat mánáid vaikke sii vuoruhit árvvuid eará láhkái go váhnemät livčče hálidian. Dalle go váhnemät ja mánát orro seamma birrasis, de šadde guhkit áigásaaš ja dehálaš mihttomearit eanaš háve oktasaččat. Muhto go 9-jagi skuvla álggahuvvui, de rievdagodii dađistaga dilli go mánát ledje ruovttus eret logi mánu jagis, ja nu ovddidedje árvovuogádaga mii lei molssa-eaktun boazosámiid eallimii. (Hoëm 1976b: 152–53.)

Maiddái nuortalacčaid boazodoalus Čeavetjávrri Suoma bealde addojuvvui mánáide stuora friddjavuohta dahkat iežaset mearrádusaid. Dávjá gullui ráđđádala-

dettiin dajaldat "Jish tiedak"², čállá Pertti Pelto (1962). Dajaldat čujuhii dasa gii galgá doaimmahit juoiddá, ja sutnje addui alccees mearridanvuogatvuohta mo dahje maid dahkat. Nuortalaččat eai dábálaččat duvdde máná olahit dihto meriid, muhto baicce movttiidahttet máná bargat iežas jierpmi mielde. Pelto oaivvilda ahte nuortalaš mánain dan dihtii lea unnit eahpelikhkostuvvandovdu go servodagain gos leat mihttomearit guovddážis. (Pelto 1962: 133–38.)

Hállu boahťa maiddái das go máná lea hárjánan leat ealu luhtte. Emilie Demant-Hatt (1913) lohká ahte jus sámi mánát eai livčii jámma ealu luhtte, de váillošii hállu ja lunddolaš beroštupmi. Jus duohta hállu ja beroštupmi vailu, de boazosámi dilli šaddá gierdameahttun. Demant-Hatt oaivvilda viidáseappot, ahte sámi mánain leat stuora vuogatvuodat ja geažehis friddjavuohta, ja ii báljo gávdno bajásgeassinvuohki, mas njulgestaga daddjo mánái ahte duon dahje dán galggat dahkat. Sii eai leat nugo mánát eará servodagain, geat váikkuhuvvojít mánjgga láhkái, go sámi mánát dušše oidnet ja gullet mii sin iežaset birrasis gávdno ja ohppet dan seamma diehtalassan go borrat ja vázzit. Go sii leat sturron dan veardde ahte sii birgejít ieža, de ii leat šat oktage jearramin gos sii leat dahje maid sii barget. Gal goittotge nealgi buvtteha sin goahtái rivttes áigái. (Demant-Hatt 1913: 25–65.)

Lea váttis dadjat čielgasit ahte gohčojuvvojít go mánát odne njulgestaga bargat. Muhto lea goittotge čielggas ahte dál lea dilli áibbas eará láhkái go ovddit čuohtejagi álgogeahčen dallego Demant-Hatt jođii sápmelaččaid mielde. Odne lea earálágán dilli go mánát eai leat šat čađat váhnemiid mielde bargguin. Sii leat eanaš áigge skuvllain. Ja dasa lassin leat maiddái mánain odne ollu eará asttu-áiggefálaldagat, mat maiddái sollejít sin eret beaivválaš bargguin. Eai dušše mánáide leat fálaldagat muhto maiddái ollesolbmuide. Odne leat ollu váikkuhusat olggobealde. Boazosámi mánát nugo eará mánátge, golahit áiggi tv:ii ja tv-spealuide. Ovdal mánát ledje ovttas ollesolbmuiguin goađis dahje dálus seamma lanjas, ja besse lunddolaččat gullat ságaid boazodoalus, máinnastemiid ja muđui oassálaste sosiála joavkkus. Ovtastallan ollesolbmuiguin lea unnon sihke skuvlla geažil ja go bearrašat eai leat ovttas álo go barggut dahkkojít dahje daid birra ságastallojuvvo. Jearaldat lea, ahte man ollu lea váhnemiin odne vejolašvuohta luohtit dasa ahte mánát ohppet bargat vaikke eai njulgestaga gohčojuvvo dan dahkat. Dasa lassin leat mánain odne maiddái eanet vejolašvuodat vázzit skuvllaid, mat ráhkkanahttet sin bargguide boazodoalu olggobealde. Eanet válljenvejolašvuodat sáhttet maiddái váikkuhit dasa ahte mánát eai odnege njulgestaga gohčojuvvo bargat. Váhnemat dihtet bures ahte odne leat mánain eanet vejolašvuodat hábmet iežaset boahtteáiggi go dan maid besse dahkat. Seammás dihtet váhnemat maiddái ahte mánát fertejít odne, eanet go ovdal, gohčojuvvot bargat jus galget oahppat, danne go odne leat ollu eará beroštumit mat hásttuhit mánáid.

² Davvi sámegillii: "Ieš diedát".

Heivehit iežas luonddudilálašvuodaide

Anton Hoëm čálli 1970-logus, ahte lei lunddolaš ahte mánát hárjehuvvojedje vuogatvuodaide ja geatnegasvuodaide. Dalle mánát ledje eanaš áigge doppe gos barggut lunddolaččat dahkkojuvvojedje. Dálonmánáid bajásgeassin lei mealgat muddui seamma friddja go boazosámi mánáid oaivvilda Hoëm ja čilge:

De fastboende barn later til å ha vokst opp under samme grad av frihet som flyttsamebarna, vel fordi de samme faktorer var til stede i begge miljø. Som blant flyttsamene levde barna i de bofastes miljø seg inn i sine rettigheter og plikter. Oppdragelsen har vært en funksjon av det spesifikke miljø barnet ble født inn i. Hva karakteriserte så dette miljø? Som for flyttsamene var det en total avhengighet av og innordning under naturkraftene og naturforholdene. Var det uvær, nyttet det ikke å vise til at arbeidet skulle begynt til et bestemt klokkeslett, f.eks. været avgjorde når arbeidet kunne begynne. Dette måtte prege menneskenes oppfatning av hva funksjonell tidsangivelse var med hensyn til presishetsgrad, likeså hva presis overholdelse av tidsavtale var. En romslig tidsregulert og et forholdsvis enkelt miljø syntes å være det barna vokste opp i. (Hoëm 1976a: 31.)

Asta Balto (1997) oaivvilda, ahte ollu sámemánát eai leat hárjánan dasa ahte ollesolbmot sin njuolgga stivrejtit. Mánát besset dáinna lágiin oahppat iežaset vásáhusaid bokte. Garra luondu lea buoremus bajásgeassi ja dagaha garra stivrema dárbbášmeahttumin. (Balto 1997: 28–42.)

Dás boahtá ovdan mo biras, luonddufámut ja luonddudilálašvuodat ledje oasit mat stivrejedje máná láhttema. Čavga plánaid lea diehttalas veadjemeahttun čuovvut jus olmmoš galgá birget luondduriggodagaiguin. Dalle leat ollu gerddiid fámut mat eai leat olbmo olámmuttus mat stivrejtit. Sáhtášiige dán oktavuođas geažidit, ahte sámemánáid friddja bajásgeassin mas lea leamaš ollu sáhka dutkiid beales, boahtá mealgadis das go váhnemiid diehtu luonddueallimis lea nanus.

Hoëm (1976b) govvidage ássanbáiki bokte maid gohčoda *Boplassen*, mo dálonat heivehalle iežaset luonddu iešguđetlágán dilálašvuodaide áiggis áigái dan sadjái go ovddalgihtii ráhkkanearni bahkkehit juohke dilálašvuhtii. *Boplassen* nammasaš guovllus ledje vihtta dálú main ledje lotnlasealáhusat. Dábáleamos lotnlasealáhusat ledje šibitdoallu, guolásteapmi, muorječoaggin ja veahá bivdu. Ássanbáiki lei luondduriggodagaid lahka, muhto vuovdin dáhpáhuvai gal eanaš áigge guhkkin eret. Eanaš oassi sosialiseremis dáhpáhuvai bargguid čađa. Mánát ledje dehálaččat dállodollui. Báikkit ledje smávvát, nu ahte ii lean vejolaš sirret mánáid ja ollesolbmuid birrasiid. Vuodđooaidnu mii sirdašuvai mánáide lei oahppat birget heivehallama bokte dan sadjái go mearrádusaid bokte. Ii báljo goassige dáhpáhuvvan ráhkkanepmi gos dat gii ráhkkanii, oinnii iežas hearráin

sosiála ja luonduu čadnon eavttuid badjel. Dat bodii ovdan dajaldagain, nugo “ju lea buorre dálki, de sáhttá dahkat”. (Hoëm 1976b: 21–106.)

Dál maiddái oahpahuvvojít mánát boazodoalus, ahte fámut maid badjel olmmoš ii hálddaš, váikkuhit dasa goas ja mo barggut sáhttet doaimmahuvvot. Ailo lea čállán skuvlastiila man bajilčala lea “Min bargu”. Son čállá ee. ná:

Boazodoallu lea hui miellagiddevaš bargu danin go mii ieža mearridit barggu. Doppe leat mánggalágán doaimmat, ja ollu ferte ieš fuomáshit, nugo guohtuma ja gosa johtit ja goas johtit. Muhtumin gal šaddá vuolgit vel ihkkuge jus lea heajos guohtun. Muhto eanaš áigge gal lea suohtas leat boazoeaiggát.

Ailo maiddái diehtá iežas vásáhusaid bokte, ahte heajos guohtun man badjel olmmoš ieš ii stivre, váikkuha dasa goas ja gosa sii johttájít. Boazosápmelaš ii sáhte čuovvut dárkilis áigeplána, muhto leat dálkkit, siivvut ja ealát mat stivrejít sin lihkademiid ja bargguid.

Mun lean iešge vásihan mo mu vuolggaa jiehkkái misessemearcumii šattai árabut go maid mun ledjen rehkenastán. Ingá lei munne geažidan ahte sii mearku-gohtet gaskkamuttus suoidnemánu. Muhto mearkun šattai álgit guokte vahku ovdal go báhkat bohte ja bohccot de álge bálgat jiehkkái gos lea čoasu.

Jorunn Jernsletten (2000) gii lea dutkan mo árvvut gaskkustuvvojít mättasámi guovllus, čállá ahte oahpaheapmi boazodoalus sulastahttá eanet integrerema go bagadallama. Mánás vurdojuvvo ahte son oaidná, guldala, dovdá ja geahčala. Olmmoš ii galgga ovttatláhkái jearahallat, muhto galgá baicce dárkut ja guldalit maid ollesobmot dadjet. Dieinna lágiin lassána doahpagiid máhttu ja muđui gelbbolašvuhta. (Jernsletten 2000: 105.)

Muitalusaid doaibma

Guldaleapmi lea juoga masa sámi mánát leat doloža rájes juo oahpahuvvon. Máinnasteapmi lea leamaš guovddážis go olles olbmot ja mánát leat čoahkkanan. Ailo maiddái liiko sihke guldalit ja ieš muitalit máidnasiid. Go mun fitnen Fiel-vuona skuvllas, de lei máinnasteapmi fáddán sámegiela diimmus. Ailo ja nubbi eará gánta leaba guovttá sámegiela diimmus. Diimmus Ailo muitala máidnasa maid lea gullan áhcistis. Oahpaheaddji guldala:

Ailo: Naba mu áddjárohkki mii oinnii guokte rávgga, doppe Buolát,
dieđátgo don gos dat lea, Stuoravuotna, dieđát go don gos dat lea?
Don beal....

Oahpaheaddji: Sievjjus?

Ailo: Na, don bealde.

Oahpaheaddji: Juo mun lean gullan, muhto mun in leat goassige leamaš doppe.

Ailo: Dieppe Buolát, dohko deaivá biegga nu garrasit, buot biekkat. Oainnat doppe lei idjadeamen gáttis ovta geađgeguoras gokko lea veahá suodji jus dattetge boahtá dálki, ja de dolasta ja dieppe leat čakčat oainnat hui sevdnjes ijat. Oainnat dál dat gal galgá idjadit, dál dat gal lea dolasteamen. Galgá bassit. Das lei suovastun biergu seahkas, válldii dan ja álggi bassit. Dál dat gal oaidná geat bat duo boahtiba, suhkifatnasiin. Oainnat dalle dat gal eai lean vuos mohtorat gal vuos. Mun in muitte, áddjárohkis lávii skohtermohtora, diekkár akslinga manai, das mas lea propealla, dainna dat lávii johtit oainnat. Ja dál gal oaidná boahtimin, jurddaša dat gal leat su albmát. Dál dat gal gullá čievra bodii, oainnat dat lea nie dearbmi, čievra, ii soaba oaidnit gii bodii, gulai geđggiid, “gluhk...”. Dál dat gal nu gullá go vázzá, “gluhk...”. Bodíiga rásseráj, jurddaša dál son gal galggašii juo oaidnit ja de álggi das “kleh...”, ja njuikkoda guovtte-beallái dola nie, ja manai nuppe beallai dola ja geahčá ádjá don beallái dola ja nu fasttit “grh...” boraha dan.

Oahpaheaddji: Ammal rávggat leat leamaš, lávejit lohkat ahte rávggat dat leat diet.

Ailo: De gal lei ballán, válldii hilláčoskka ja fáippui ja huškui dan hila, ja de gal gulai go viehkaleigga vulos fatnasii, ja de gal juo manaiga ja álggiiga vuodjat, ja majemuš ii oidnon go oaivvit ja “upp” de jávkkeheigga.

Ailo muiatalii manjá, ahte áddjá ii lohkan iežas diehko gal šat vuolgit idjadit. Sámi muiatalusain leage dávjá jođidettiin ja idjadanbotta ahte olbmot vurjojuvvojtit. Dovddus čilgehus dasa lea, ahte olmmoš ferte ovddalgihtii vuos jearrat lobi ijastaddat guovllus.

Sámis lea máinnasteapmi ja muiptaleapmi leamaš ovddežis hui guovddážis, ja dalle sáhttet sihke ollesolbmot ja mánát čoahkkanit oktii. Go Ailo muiatališ-goahtá, de diđošta vuos guldaleaddjis ahte son maiddái diehtá ja dovdá guovllu gos dáhpáhus lea leamaš. Ailo muiatala iežas ádjá birra gean guldaleaddji maiddái dovdá. Son lea vissásit ieš hárjánan govahallat go lea guldalan muiatalusaid, ja nu son maiddái iešge veahkeha guldaleaddji dahkat dan seamma. Ailo geavaha muiatalanteknihka mas molsu áiggi muiataettiin. Muiatalusastis molsu vássán áiggis dálá áigái, omd. go lohká: “...válldii dan ja álggi bassit. Dál dat gal oaidná geat ba duo **boahtiba...**”. Go molsu áiggi, de badjána gelddolašvuhta. Guldaleaddji vuordá juoiddá dáhpáhuvvat muiatalus go šaddá áigemolsun.

Nubbi eará muiatalus maid Ailo fas muiatala iežas vilbeallái, Mihkkalii go čohkkába dollagáttis Sievjjus, vuordimin Inggá ja Áslaga geat leaba áiddi divodeamen. Ailo muiatala mo čáhcerávgii sahttá viečahallat:

Ailo: Eadni ja Áslat-áddjá leigga Gearvuonbaðas hyttás. Leigga das hupmamin, dalle dat časkkii olgovssa rabas. Manaiga ja bijaiga gitta, ii dat lean mihkigie. Geavja han vel manná vulos ja de rahpasa uksa. Eadni lei vázzán vel birra dan hyttá, ii doppe leat mihkigie uvssa duohken. De boahtá sisa, soittii lean veahá goavkut, boðii biegga. Nuppies fas, dál ii lean ba biegga, de uksa fas rahpasii. Manai fas birra, ozai viesu vuolde, juohke sajis. Ja eadni logai “gii don juo leaččat, divtte goittotge munno ráfis”. Na de gal manai diibmu, de fas rahpasii, de ii šat boaðe uksa gitta.

Mihkkal: Ná, mii dat lei?

Ailo: Ná, rávga.

Mihkkal: Rávga?

Ailo: Jo, dat logai: “Dál dat gal lea mu vieččaheamen dieðusge”. Eadni logai: “Ii du gal, ammal mu lea vieččaheamen, mu lea balddá-hallamin gii lean amas mearragáddái”.

Mihkkal: Áslat áddjá?

Ailo: Su dat leat dieðusge vieččadeamen rávggat.

Maiddái dán muitalusas seamma go ovddit muitalusas, leat sihke dihto olbmot ja dihto sajit. Guldaleaddji lea čaðat mielde, ja sáhttá leat vel veahkkin muitaleaddjái jus dat vajálduhttá namahusaid. Go oahpes olbmot leat mielde muitalusain ja dasa lassin vel dihte mii geavai dáhpáhusa manjjá, de lea dat nannemin muitalusa duohtavuoða. Rávga ii gulage dalle šat dušše máinnastanmáilbmái, muhto lea min olámuttos.

Muitalettiin Ailo čájeha, ahte son lea ieš aktiivva sihke skuvllas ja maiddái siiddas. Son ii leat oahpahuvvon dušše váldit dieðuid vuostá, muhto son maiddái máhttá heivehit daid muitalusaid maid son lea gullan oðða dilálašvuodaide, nugo skuvlii. Muitalusa sáhttá dás oaidnit metaforan dasa, ahte árbevierut gal fievri-duvvojit, muhto dat maiddái heivehuvvojit oðða dillái. Nu Ailoge muitaleami bokte heiveha fas muitalusaid otná dillái ja oðða guldaleddjiid ektui.

Goappašat Aillo muitalusat leat čáhcerávgga birra. Čáhcerávgga muitalusain lei balddihandoaibma mánáid ektui. Go Aillos leat muitalusat čáhcerávgga birra, ja dasa lassin leat su lagamuččat ja oahppásat leamaš mielde dáhpáhusain, de čájeha dat ahte son maiddái sosialiserjuvvo mearraguovlluide. Sosialiseren mearragáddái ii leat nu imaš Ailo go son lea orron doppe sullii seamma guhká go Guovdageainnus.

Jens Ivar Nergård (2006: 78) oaivvilda ahte muitalus lea guovddážis boazodoallobirrasis áimmahušsan dihtii vásáhusa, máhtu ja árbevieru. Mánát ohpet árrat guldalit muitalusaid ja sii oahpahuvvojit árrat ieža ge muitalit daid. Muitalusain lea stuora móvssolašvuhta oahpaheami ja sosialiserema oktavuoðas. Nergård fuomášuhtá ahte muitalusain lea vissis vuoiŋŋalašvuhta mii vuhtto das mo luondu ja olmmošlaš gaskavuoðat ipmirduvvojit. Muitalusain ii leat imašlaš-

vuhta, muhto dain lea baicce eallinoaidnu guovddážis nugo ahte olmmoš berre vánddardit várrogasvuodain ja leat gozuid alde dilálašvuodain gos olbmot ellet.

Nergård oaivvilda ahte (1997: 72) hárjánan boazosápmelaš dovdá eatnamiid topografiija ja maiddái daid muiatalusaid mat gullet iešguđetge guovllu eatna-miidda. Muiatalusat main dáhpáhusat leat leamaš dihsto sajiin, ealáskahattet guovl-luid. Dalle guovllut eai leat apmasat, eaige historjjá haga. Vaikke don ieš it leat vásihan dahje ba nu oahpisge dan guvlui, de liikká ii leat amas guovlu go dasa leat čadnon muiatalusat, ja vel leat du lagamuččat ja oahppásat vásihan doppe juoidá ipmašiid maid lea leamaš veara muiatalit viidáseappot.

Maiddái Karen Marie Eira Buljo oaivvilda, ahte sihke duovdagat ja kultur-muittut ealáskit eanet go mii diehtit geat doppe leat eallán, vánddardan ja bargan (Buljo 2002: 147).

Duolbmatalcessis luotta

Skuvlavázzi gánta, nugo Ailo, lea eanaš áigge eatni hálddus. Go Inđá bargá olles áigge boazodoalus ja Aillo lea vejolašvuhta vázzit skuvilla giđđat ja čakčat doppe gos eallu lea, de maiddái beassá Ailo eanet oassálastit boazodoalu barg-guide. Dalle son oahppá sihke doaimmahit boazodoalu, ja oahppá mii boazodoallu lea. Olbmo gullevašvuhta boazodollui lea su iežas mearka. Mánát eai njulgestaga gohčojuvvo bargat, muhto mánáide geažiduvvo nugo diiddaid bokte. Muhto jearaldat lea man stuora vejolašvuhta lea váhnemiin odne luohttit dasa ahte mánát čuvvot mielde ja ohpet duše geažideami bokte. Odne leat ollu eará fálaldagat mánáide mat sollejít sin eret boazodoalu bargguin. Dattetge bissot ain ollu vierut, nugo ahte olmmoš ferte heivehit iežas iešguđetlágán dilálašvuodaide. Olmmoš diehtá ahte diibmoplána ii sáhte čuovvut nu dárkilit. Dálkkit ja guohtun mearridit ollu dasa goas ja gosa vuolgá.

Dasa lassin go bargguid bokte oahppat, de lea maiddái dehálaš mánáide leat ovttas siidda olbmuiguin, fulkkiiguin ja ristváhnemiiguin go oktavuođat leat dehá-laččat. Okto oainnat ii birge boazodoalus. Muhto beroškeahttá bargguin, de leat mánáid čanasteamit fulkkiide ja ristváhnemiidda dehálaččat. Ailo oahppá alcesis duolbmatal luotta ja geahččat ovddos guvlui. Sosialiseren boazodollui dáhpáhuvvá máná aktiivvalaš doaimmaid bokte. Mánná lea seamma go ollesolbmot oassin sosiála joavkkus, ja nu sus lea iežas sadji seamma go buot ollesolbmuinge lea. Olmmoš ferte alcesis luotta duolbmatal. Nugo don ieš lázát dili, nu don oaččut maiddái, oaivvilda Inđá ja lohká: "Jus omd. eará siiddaid bohccot bohtet du bohc-cuid duovdagiaidda guohtuma dihtii, de don divttát dan go nuppes sáhttá dus ges heajos guohtun". Olmmoš galgá álo geahččat ovddosguvlui, oaivvilda Inđá.

Ailo sosialiserejuvvo maiddái mearraguovlluide go orru measta seamma guhká mearragáttis go siseatnamis. Sosialiseren mearraguovlluide boahtá ovdan Aillo muiatalusain mat leat čadnon čáhcerávggaide ja guovlluide mearragáttis.

Muitalusat maid son gullá, ja maid son fas muitala viidáseappot leat mielde ealá-skahttimin guovlluid ja nu son maiddái oažžu čanastemiid guovlluide.

Mánát ohppet boazodoalu dovdat go leat doppe gos dat doaimmahuvvo. Máhttofievrrideapmi ii leat dušše dieđuid fievrrideapmi nuppis nubbái dahje njulgestaga oahp(heap)apmi. Boazodoalus lea dehálaš máhttit dovdat guovlluid, go boazu ii leat dušše ovta sajis muhto sirddaša viiddis eatnamiid badjel.

5 Boazodoallomáhtuid fievr ridgeapmi

Boazosápmelačcat leat iežaset vásáhusaid bokte gávnahan mo buoremusat heivehit iešguđetlágán dilálašvuodaide. Eallima bokte leat sii hákhan máhtuid, mat leat fievr riduvvon viidáseappot ođđa buolvvaide. Boazosámi váhnemát šaddet ráhkkanahattit mánáideaset dilálašvuodaide gos besset iežaset vásáhusaid bokte oahppat. Ráhkkanamit sáhttet leat mánjgalágánat, nugo ahte váhnemát diktet mánáid iežaset geahčalit vándardit okto. Vaikke mánjii sáhttá čuožzilit ballu go mánát galget geahčalit okto birget, de váhnemát dattetge fertejít diktet dan dahkat go dihtet ahte sii ohppet buoremusat go ieža šaddet čoavdit hástalusaid. Dan dihtii mánáide dávjá láhčojuvvojít dilálašvuodat gos ieža šaddet čoavdit váttisvuodaid maiguin deaividit. Lassin geavatlaš máhtuide, leat maiddái vuoinjalaš máhtut, mat doibmet njuolggadussan mo olmmoš berre láhttet go vándarda duovdagis. Vuoinjalaš máhtut leat dávjá gođđojuvvon muitalusaide. Mánát ohppet hálddašít luondu ja sin málmmeaoaidnu hápmashuvvá muitalusaide bokte.

Dán kapiittalis guorahalan mo váhnemát leat ládestahttimin mánáid bargguide ja guovlluide. Láidesteapmi dahkko čujuhemii, njálmmálaš bagadalla-miin ja go mánna biddjo dilálašvuodaide gos ieš beassá geahčalit. Giellamáhttu lea dárbbašlaš jus galgá gulahallat earáigui, ja maiddái dange ferte dávjá oahppat iežas oaidnima ja vásáhusaid bokte. Mun guorahalan dás mo giella geavahuvvo gulahallama gaskaoapmin. Dasto árvvoštan mo olmmoš gulahallá maiddái njuolgga bohccuigui ja duovdagiin.

Oahppat oassálastima bokte

Olmmoš ferte ieš oassálastit go galgá vásáhusaid bokte oahppat. Máhttit oaidnit, dovdat ja dájjadit leat dehálaš dáiddut jus galgá birget boazodoalus. Vuosttažettiin ferte mánna oahppat oaidnit ja dasto ieš fuomášit ja dovdagoahtit iešguđetlágán bohccuid, eatnamiid ja johtolagaid. Olmmoš ferte dájjadit iešguđetlágán dálkkiin ja siivuin dohko gosa lea jođus. Dasa lassin ferte maiddái oahppat oaidnit omd. gokko lea buoremus johtit. Ferte čuovvut mielde mo dálki ja siivu lea nu ahte diehtá goas ja gokko lea buoremus johtit.

Oaidnit, dovdat ja dájjadit

Mánát čuvodit vuos álggos váhnemiid mielde. Dasto fertejít mánát ieža oahppagoahtit oaidnima, guldalemiid ja dárkumiid vuodul mearridit. Ellon-Gáren muitala mo su nieiddaš lávii hui boazodovdeš. Son ii lean go moatti jahkásaš go ieš dovdagöđii bohccuid. Nieiddaš čuorvvui: “Eadni, gea duo lea stuorra álddu miessi”. Ellon-Gáren lei de geahčastan ja oaidnán, ahte dat lei stuorra álddu miessi. Son lei



Govva 3. Berit Sara Turi ja Inger Berit Martine Buljo.

de jearran nieiddastis: “Mas dat don dan dovddat”? Nieiddaš lei vástdidan: “Na čalmmiin mun dan dovddan”.

Oahppat dovdat dahkkoge álggos vuos oaidnima bokte go mánát leat vágne-miid čuvodan ja sin bagadallama bokte oahppan. Dasto fertejit oahppagoahtit okto johtit, ja nu maiddáí oahppat dulkot dilálašvuodžaid ja mearridit dan vuodžul. Boazodoalus leage dovdan guovddážis. Lea omd. dárbu dovdat johtolaga eatna-miid ja diehtit gokko galgá johtit. Oahppan dahkkoge dan láhkái ahte mánát oahpahuvvojtit šaddat oadjebassan. Sii ráhkkanahattojuvvojtit dustet ja hálddašit ieš-guđetlágán dilálašvuodžaid. Oahppat deaivat iešguđetge siivvuin ja dálkkiin, lea heakkadehálaš go okto lea vánddardeamen.

Ovdal go mánná sáhttá okto vánddardit, de ferte leat álggos vuos čuvodan mielde nu ahte lea oahppan oaidnit. Máret Ánná gearduhage májggageardde man dehálaš mánnái lea oahppat oaidnit. Ferte oahppat oaidnit geainnuid, oaidnit gokko galgá garvit, oaidnit gokko ii leat soavli, oaidnit gokko soavlerokkit leat ja oaidnit jieňaid.

Máret Ánná diehtáge bures mo olmmoš buoremusat oahppá birget jođidettiin. Son lea ieš mánnán oahppan go lea leamaš mielde buot boazodoallo-bargguin. Danne son maiddáí deattuha man dehálaš máná iežas vásáhusat leat go

galgá oahppat ja birget boazodoalus. Máret Ánná lea leamaš boazovázzi dan áiggis go ii lean vel skohter, ja son gullá maid dan majemuš bulvii, gii lea bohčán áldduid. Máret Ánná muitala man duhtavaš son lei mannan giða go fáhkkestaga njázudii ovdal go gerge johttát. Dalle lei váhkarii gii lei konfirmánta lagi 2003, vejolašvuhta oahppat vándardit losses siivvus. Son muitala:

Na, eatnamiid gal ferte dovdagoahtit ovdal go okto bijada. Lea dárbašlaš diehtit makkár eatnamat leat, ja galggašii leat maiddái oahppan oaidnit geainnuid ja buot ovdal go meahccái vuolgá vándardit. Ja leage nu dehálaš, ahte mánná lea mielde go don vándardat, álo han dat oaidná ahte nie dat galgá, garvit dakko gokko ii ábut mannat. Giðdat erenoamážit lea hui váttis, muhto ii dat ábut, don fertet maid oaidnit gokko ii leat soavli ja gokko lea. Mannan giða lei hui soavli, go mii dás johttáimet. Das gal šattai oppa ollu maid oaidnit. Šattai nu ollu garvit. Oainnat dál majemuš áigge lea leamaš nu heittot, diet goavvejagit, hirbmat ollu muohta ja nu dálvi badjel duoddara. Dalle mánát eai oahppan dies maidege. Mun oidnen mannan giða, ahte dál gal ferte čáhcesuhppaga maid mannat. It don ábut mannat doppe vuollegis jogaid, go doppe gal lea juo dulvi. Ferte garvit čáhcessuhppagiid ja oaidnit gokko soavlerokkit leat, ja gokko don garvvát daid. Ja mu mielas lei hui buorre go bodii diekkár giðda. Oidnen mannan giða, ahte dat lea johtán aivve geaiggojulggiid skohter alde. Ja nie maid nugo lea leamaš dál, eai han cukrjot ban leamašange. It don vuolgit gal sáhte ovdal go skávvu bures, ii dárbaš jur cuonu, muhto go skávvu de gal jasat juo guddet. Go iððesidjii orru, de lávejit skávvut go nie beaivvádat lea leamašan. Diekkárat dat lea maid mii oahpahit šaddat, ja go mánát besset čuvodit, de gal birgejít doppe. Nu lea dál čakčat maid, ferte jienaid oaidnit, ja gokko ii ábut mannat, ja gokko ábuha mannat, nu dat lea.

Máret Ánná atná fuola das ahte su bárdni galgá maiddái oahppat vándardit losses siivun. Son leage ieš oahppan eatnamiid dovdat vánddardeami bokte. Nu son maiddái diehtá ahte mánát ohpet buoremusat go ieža besset geahčalit birget. Nu Máret Ánná ráhkkanahyttá máná duohta dillái go olmmoš ii sáhte álo vuordit, ahte lea buorre siivu jođidettiin. Máret Ánná oaivvildage, ahte mánná ferte ieš vásihit ovdal go sáhttá diehtit ja áddet mo lea omd. johtit heajos siivun. Easkka dalle lea vejolašvuhta diehtit mo galgá eastadit váralašvuodaid. Máná ráhkkanahyttit váttis dilálašvuodain birget, soahpáge oktii Ingolda (2003) oaiviliin, ahte máhttoviidodat lassána go máná fuomášahttojuvvo ieš čuolmmaid čoavdit. Váhnendoaibma šaddáge láhčit dilálašvuodaid gos mánás alddis lea vejolašvuhta vásihit ja dan vuodul ipmirdit, iige dušše oažžut nuppi olbmos dieđuid.

Go olmmoš ferte ieš vásihit oassálastima bokte, de heive dat oktii Tim Ingold (2000b) árvvoštallamii mo easkaálgi biddjo dilálašvuhtii gos oahppá danne go ieš lea aktiivvalacčat doaibmamin. Dalle olmmoš geavaha geahččan-, guldalanja dovdandáidduid. Ingold čuoččuhage ahte jus máhttu livččii dušše jierpmis, de ii livčče dehálaš ahte easkaálgit galggaše ieža oaidnit dahje vásihit objeavtaid dahje mearkkaid fysalaš máilmis. Mánna oahppá go lihkada máilmis, dutká dan, dahje dušše guldala dan, ja fuomáša mearkkaid mat čájehuvvojt sutnje.

Mihkkal-Elle lea maiddái bajásšaddan boazodoalus, gos bargá áin odnege. Son lea badjel 60 lagi boaris, ja sus leat rávis mánát. Boazodoalus ferte olmmoš oahppat dádjadir. Olmmoš ferte oahppat dovdat eatnamiid, bohccuid olgguldas hámi ja maiddái bohcco dahje bohccuid luonddu, nugo Elle dás lohká:

Deaivat lea buot ovddemuš maid galgá oahppat, ja dasto oahppat diehtit geainnuid. Go ealu maid vuodjá, ahte ii vuaje summal, sáhttá vaikke suddái mannat ja ádjagiidda dahje jekkiide. Dat galgá dovdat geainnuid, vaikke ii leat vánddardan dakko, justa dakko, muhto galgá áigá dovdat gokko heive vuodjit, mohkastit ja oahppat diehtit ahte ii galgga jienjaide mannat, ja dat lea ollu maid galgá vuohččan oahppat. Ja de oahppat mearkkaid dovdat. Go dovdat ja deaivat vuos álggos oahppá, de gal juo oahppá dan eará gal. Eatnamiid dovdat ja mearkkaid dovdat, ja bohcco luonddu maid dovdat, justa goas boazu sáhttá mannat, goas dat lea dakkár dálki ahte dál gal lea boazu ruvgalan. Go veahá bivalda, de boazu vuolgá ruvgalit ja vázzá maid. Nugo dáid muttuid go bivalda, de lea hirbmat vázzi, guoppar hakso, diet boares guohca guobbarat. Ja dán lagi lea erenoamáš vázzi boazu, biedgana. Na, dál lea nu bivval ja guobbarat haksojít, unnán muohta, dan čađa hakso guoppar. Ii guoppar hakso nu go lea buolaš, dat ii hakso. Dál lea nu vázzi dán lagi eallu, biedgana dat nu hirbmadir. Olmmoš han gal oahppá boarásmanbeaívai maid.

Seammaláhkái go Máret Ánná, de maiddái Elle deattuha man dehálaš lea oahppat dádjadir. Elle lohká ahte olmmoš galgá dovdat geainnuid, vaikke ii leat vánddardan dakko, de galgá liikká dovdat gokko heive vuodjit. Ovdal go olmmoš ieš sáhttá mearridit, de ferte gal ovdal vásihan sullasaš dili dahje oahppan dulkot dilálašvuodaid. Go Elle dás oaivvilda, ahte olmmoš ferte dovdat geainnuid, vaikke ii leat johtán justa dákko, de dulkon mun dan ahte olbmos ferte leat ovddalgihtií máhttu sullasaš johtolagain dahje oahppan dulkot iešguđetlágán dilálašvuodaid. Olmmoš ferte oahppan johtolagaid dovdat, dulkot daid ja dasto mearridit dan vuodul. Johtolagaide gullet sihke dálkkádat, siivu ja duovdaga iešvuodat. Elle muitala ovdamearkka dihtii, ahte go bohccot álget čuskkodit, de diehtá ahte dalle boahtá garra dálki.

Go Elle dás namuha ahte olmmoš galgá diehit mo johtit vaikke ii leatge justa dákko ovdal johtán, de soahpá dat oktii geavatlaš oahpaheami dovdomeark-kain nugo Bertil Rolf (1995) čilge daid. Son gohčoda *gelbbolaš geavatlaš máhttun* go lea sáhka doaimmain, maidda eai gávdno čielga njuolggadusat mo ášši čoavdit. Dalle lea dilálašvuhta ja konteaksta mat addet vuodju makkár čoavddus vállje-juvvo, ja danne oahpaheapmi ii sáhte dahkkot njulgestaga olbmos olbmui go olmmoš ii sáhte ovddalgihtii diehit justa mo dilli lea. Sáhtášii maiddái dás lasihit, ahte olbmos lea gorutlaš máhttu go dovdá gokko lea buoremus vuodjit vel amas guovlluinge. Lea olbmo hárjáneapmi ja vásáhusat mat leat dagahan ahte máhttu lea bisánan gorudii.

Árvvoštallat

Inger Marie Kristine Nystad (2003) gii lea dutkan sámi gánddaid árvvuid Guovdageainnus, oaivvilda ahte deaivilvuhta ja fitmatvuhta leat dehálaš máhtut go galgá birget boazodoalus. Dasto ferte olmmoš leat buorre njoarostit, ja leat roahkkat nu ahte duostá luohttit alcces ja iežas árvvoštallandáidduide. (Nystad 2003: 77.)

Maiddái Else Boine (2005) lea dutkan mo máhtut sirdašuvvet áhčis bárdnái sámi oktavuođain. Áhčiid mielas lea dehálaš ahte mánát ieža ohppet árvvoštallat, ja nu eai bijage ollu deattuhusa dasa ahte mánát galget čuovvut njuolggadusaid ja dieđuid maid nuppiin ožżot, oaivvilda Boine. Skuvla ja veahkkeapparahta orrot geavaheamen sosialiserenvuogi, mii dáhkida ahte mánát čuvvot sin oassálastima norpmaid ja njuolggadusaid. (Boine 2005: 48–84.) Čavga njuolggadusaid mielde čoavdit áššiid, leage eará bealli geavatlaš máhtus ja maid Rolf (1995) gohčoda *elementára geavatlaš máhttun*.

Luonddubirrasis leage dilli earálágán ja nu máhttu spiehkastage dábalaš skuvlamáhtus. Doppe eai gávdno ovddalgihtii čavga njuolggadusat mo juohke ášši čoavdá. Mikkel Nils Sara (2003b) cálláge sámi árbevirolaš máhtuid iešvuodđaid birra, ja oaivvilda ee. ahte iešguđetlágán dilit ja váikkahuusat ilbmet dađistaga, dávjibut dehe hárvvibut, ja olmmoš ferte leat eanaš áiggi luonddudilis jus galgá joksat dieđuid, vásáhusaid ja máhtuid. Dákár oahppodili ii sáhte olmmoš lágidit, ja oahpaheami ii sáhte plánet ja čohkket vissis áigemeari sisa (Sara 2003b: 125).

Máhttogeavaheami ja áššečoavdima erohusat skuvllain gos mánát leat eanaš áigge, ja boazodoalus leat goabbaatlágánat. Orro leamen oalle čielggas, ahte olmmoš ferte oahppat ieš birget iešguđetlágán dilálašvuodđain, ja dasa gáibiduvvo hárjáneapmi nu ahte sáhttá árvvoštallat juohke dilálašvuoda mii čuožžila.

Boazodoalu giella

Dasa lassin go mánát ohppet oaidnit, dovdat ja deaivat vásáhusaid bokte, de ohppet maiddái giela go leat doppe gos barggut doaimmahuvvojtit. Sámegiela

sátnevuorkkás leatge ollu iešguđetlágán sánit, omd. siivvuid birra. Nugo Máret Ánná dás ovdalis logai go hálai giđđajohtima birra, ahte ii vuolgit gal sáhte ovdal go skávvu bures muhto ii dárbbaš gal leat cuoju gal.

Gielas ja maiddái ovttaskas sániin leat ollu dieđut, mat doibmet gulahallama oktavuođas. Vuodđoealáhusain nugo boazodoalusge, de giella govvida ealáhusa ja dan doaimmaid. Nils Isak Eira (1994: 18) oaivvilda, ahte boazosápmelaččaid giella lea muhtun muddui sierra giella. Dainna son oaivvilda ahte ollu sániid sisdoallu čujuha bohccuide ja dakkár luonddudilálašvuodenäide main lea váikkahuus boazobargui. Son váldá ovdamearkka sánis *čiegar* ja čilge dan mearkkašumi ná:

Jus dálvejagis váldit ovdamearkka, de duot doahpa čiegar mualta ahte dakko lea guodohuvvon, ja dakko ii sáhte buoril fas guodohit. Ja jus ain dárkileappot čilge, de sáhttá dan nai mualtit ahte maŋŋil go bohccot dakko ledje vázzán ja suvnjiid goivon, de lea buolaš čárven ja garradahttán nu ahte dakko ii šat nagat boazu nuppes goaivut. Nu dasto čiegar mielddisbuktá ahte ealli ii šat das stađa orrut, go ii šat oaččostuva heggii, ja nu gártá čiegar guođoheaddjái gáržžadussan ja árrá su ohcat obbasa. (Eira 1994: 18–19.)

Gielas lea viiddis ja dehálaš mearkkašupmi boazodoalus nugo maiddái eará vuodđoealáhusain. Eira čilgehusa vuodul oaidnit ahte okta namahus sáhttá sistis-doallat ollu dieđuid. Gulahallama oktavuođas leage dehálaš áddet mas lea sáhka, go omd. čiehkara birra ságastallo. Dasa lassin ferte boazobargi diehtit maid galgá bargat bohccuid ektui go čiehkaris lea sáhka. Jearaldat lea ahte sáhttá go diehtit mii čiegar lea jus ieš ii leat dan oaidnán.

Mun jearange Máret Ánnás, ahte sáhttet go mánát oahppat dan guovllu ja daid eatnamiid birra jus ieža eai leat doppe. Máret Ánná vástida:

Diedát go, don viesus it sáhte oahpahit. Don it sáhte it gielage oahpahit doppe nugo bargogiela, eatnamiid ja buot namahusaid. Daid it sáhte oahpahit go dan ii boađe ipmirdit. Mun maid in ipmir go don tevdnet duosa, jus mun in livččii diehtán dan. Dál mun gal ádden go mun dieđán mii dat lea. Go mii meahcis leat, de mun álo mualtan mat leat namahusat, ja mii dat dá lea báikkiid masa don bisánit, ja inge mun daja “mana don váre nalde”. Jus dat lea mahkáš nie eará-lágán eana, ii diet leat eambbo go čorru, “mana dien čoru alde”. In mun dan gal loga várrin. Mun bivddán dien čoru nalde várdát, ja iige geahččat muhto várdádit ja časkilit. It don guoradit galgga álohii. Don dušše časkilat, ja jus oainnat de don guorat. Časkilit lea ahte don oainnat leat go luottat doppe. Dál don oidnet, don časkiledjet juo, die lea okta sátni mii boahtá vuosttažin. Muhto de lea dat guorrat. Don manat luottaid nala ja guorat. Diekkárat láhppoijit visot jus mii eat

geahččal doppe geavahit. Lea nu álki dadjat dego oađđi olmmoš “mana ja guora”. Mun dajan dat lea oađđi olmmoš mii giela massá, sámegiela. Das leat nu ollu diekkár sánit. Dieđusge mis lea iežamet suopman, eará báikkiin dain leat iežaset suopmanat, muhto mii geahččalit goittotge dan min iežamet suopmana doalahit.

Dás boahtá ovdan ahte Máret Ánná sihke gudnejahttá ja atná árvvus máhtu mii lea baozodoalu siskkobealde. Nu maiddái giella adno árvvus ja doaibmá bargogiellan ja máhttoguoddi ealáhusas. Gillii lea máhittu čadnon, ja go olmmoš gulahallá ja diehtá maid son galgá áicat go nubbi neavvu, de máhttá doaimmahit giela bokte iige dárbbaš láidestuvvot aivve čujuheami bokte. Sámegielas lea ge dárkilvuohita ja omd. alážat earuhuvvojit sturrodaga mielde. Go daid sáhttá earuhit, de sáhttá nuppi čilgehusa mielde diehtit ja deaivat. Go nubbi diehtá mii sus vurdojuvvo go lea gohččojuvvon mannat “časkilit”, de lea gielas ja vel eaŋkil sániin ollu diehtu. Máret Ánná bidjáge stuorra deattuhusa gillii, ja lohká ahte sámegiela gal ferte seailluhit jus galgá gulahallat. Son čilge:

Dan giela seailluhit dat lea buot, dat lea dat mii doallá oktii visot dan ealáhusa, dat gal lea nu, dat lea eatnamiin maid nu. It don gulahala jus don it sáhte namuhit eatnamiid, don it máhte bagadallat bohcco, don it diehtán makkár čoarvi das lei, it don diehtán guolggage. It don ábut dadjat, nugo mun dál dajan: “Dohppe dan vielgada gitta”. Na, vielgadat dat ledje máŋga, maid juohkelágáнат, de lei ruoššajievja ja jievjijat ja gappat, na nie ovdamearkka dihtii go čujuhat juoidá, don fertet dadjat dan rivttes sáni, nie dat lea.

Bohcco olgguldas hámi sáhttá maiddái dárkilit čilget, ja mii dieđusge de álkida sirret bohcco erset sullasaš bohccuin, ja nu leage gielalaš dárkilvuohita dehálaš gulahallama oktavuođas. Nugo Máret Ánná dás lohká, de leat ollu vilges bohccot. Nubbi ii sáhte diehtit guđemučča dat oaivvilda jus ii čilgejuvvo dárkileappot, ja danne gáibiduvvojitge čielga namahusat vai nubbi ipmirda justa man bohcco birra lea sáhka. Maiju Saijets (2000: 36) geažida ahte “go máhttá hállat dego badje-olmmoš, dalle lea badjeolmmos”.

Mánát oahpahuvvojit dainna lágiin ahte ollesolbmot čujuhit omd. muhtun bohccui ealus, seammás go kategoriserejit dan. Boazu gohčoduvvo dávjá olgguldas hámi mielde, nugo ruoššajievja maid Máret Ánná dás dadjá. Čujuheapmi bistáge dassážii go mánná lea oaħppan namahusaid. Giella addáge vejolašvuodđaid gulahallat earáiguin boazodoalus. Jus olmmoš ii dovdda omd. bohccuid nama-husaid, de lea veadjemeahttun gulahallat earáiguin earret dalle go bohccot leat oidnosis ja nubbi sáhttá čujuhit.

Boazu oahpaha

Mánná oahppá maiddái bohccuin njulgestaga go daid giedħallá. Ingá lohká, ahte olmmoš ferte muhtumin doaħtalit bohcco, ja boazu sáhttá leat soames gerddi id-maiddái láidesteaddjin olbmuiđe:

Bohccos lea luonddus, dat manná dohko gos lea buoret ealát. Ollu háve šaddá olmmoš maid čuovvut bohcco, vaikke lea gal hui dávjá nu ahte olmmoš stivre dan. Muhto lea gal māngii ahte olmmoš šaddá čuovvut dan maid boazu dakhá, gokko dat manná. Oażżu gal figgat stivret. Muhto jus dat lea nággár, de gal manná justa gokko áigu. Ja dat deaivá miħá buorebut go olmmoš. Nu ahte lea gal dálkin dáhpáhuvvan munnje go mun ledjen guoħoheamen, de šattai nu mierká ahte mun in oainne šat in maidege. Mus ii lean eará ráđđi go čuovvut dan ealu, ieš gal in livčé deaivan. Mun dihten boazu gal deaivá, ja nu mun de birgejin.

Mun ádden Inggá oaivvildeamen, ahte bohcco luonddus leat iešvuodat nugo deaivilvuohha, muhto bohccot leat maiddái luonddus iešguđetlágánat.

Ánná lohká ain dál rāvvet nuorabuid go ieš lea siiddas. Muhto boazu oahpaha maiddái olbmo, oaivvilda Ánná. Boazu oahpaha omd. mánáid ja nuoraid, go dat fertejiet doaħtalit ja čuovvut bohcco jus galgá lihkostuvvat bargat bohccuġin. Ii bohccuin sáhte vaikke maid bargat, dat lea ealli ja das lea iežas luondu maid olmmoš gii bargá daiguin ferte dohkkehít. Ánná muitala:

Boazodoallu lea dainna lágiin, ahte boazu ferte ieš maid oahpahit hui ollu nuoraid go galget bargat. Boazu ieš oahpaha. Dat fuobmájít ahte nu dat dakhá dat boazu, ja jus son nie dakhá de son ii jovssa. Dat galgá stellet ealu áloħii dainna lágiin. Guoħohit ja lávdadit ja diktit, ii galgga dušše vuodjelit ja bidjat mannat, ja de guoħđit. Beasságe oahppat go oaidná ahte ii dat bisánange dat eallu, mannan dat leage go son ii leat albma lähkái bisseħħan ealu dahje diktán bisánit ealu.

Gal dat boazu gal oahpaha, dan mun gal dieđán. Dat gal lea nu ċeahppi oahpahit nuorraolbmu. Dat ohppet mat daiguin šaddet bargat. Dat áloħii fuobmájít nie han diet dakháge, ja son ferte duoinnalágiin vai dat ii beasa nie dakhkat. Ii ábut doaivut ahte dat orru. Boazu lea diekkár mii manná ja lihkada. Oażżu gal nu viggamin jorgalit doppe gosa ii galgga mannat. Dat manná gal dohko gosa don jorgalat, muhto gal dat manná eará sadjái, gávvu doppe, manná ja de lea fas mannan dohko gosa dat ii suova. Boazu lea dakkár mii oahpaha. Eai gal sáhte girjjiin oahpahit, dan mun gal dieđán. Daidda

gal jukse boazu. Muhto mii doppe lea bargan daiguin, dat gal lea sihkkar ahte dat máhttet.

Ánná mielas boazu oahpaha olbmo go olmmoš šaddá máŋgii doahttalit bohcco láhttema. Son lohkáge, ahte olmmoš šaddá ieš oaidnit go bohccot mannet jus ii leat albma láhkái bissehan ealu. Maiddái dás lea sáhka oaidnimis, ja nu fertege olmmoš ieš leat doppe vásíheamen dili ja nu oahppáge dovdat bohccuid. Go bohccuin lea maiddái iešguđetlágán luondu, de mearkkaša dat ahte olmmoš ferte oahpásmuvvat maiddái iešguđetge bohccuide nu ahte diehtá mo dat láhttejit. Ánná oaivvildage ahte girjjit eai oahpat mo bohccuigui birge, muhto ieš dat ferte oaidnit mo bohccot láhttejit. Easkka dalle oahppá bohccuid giedahallat.

Carl Schøyen (1924) gii jodđii Sámis 1920-logus, čállá mo Boares Jonte sutnje neavvui heargedápmama:

... at det var med lempe og ikke med makt dyrene skulde tæmmes. Vel, sa han, kunde renen tæmmes med makt ogsaa, men den som var braa og brukte makt, han drev al villighet og lyst ut av dyret. Hans haandbevægelser var langsomme og myke, i takt likesom med grener som bøies av blæsten, mens han viste mig fremgangsmaaten.
(Schøyen 1924: 14.)

Maiddái Schøyenge oahpahuvvui bohccuid giedahallat sin miela mielde. Bohccuin lea luondu, ja nu fertege doahttalit sin seammaláhkái go olbmuidge doahtala. Jus olmmoš bohcco miela mielde giedahallá, de boazu maiddái doahtala millo-seappot.

Smith (1938) čállá ahte go eallu oažju duhtadit iežas dárbbuid, de lea maiddái boazosápmelaš ieš buori mielas, vaikke makkár rahčamušaid čađa dal leš mannan. Nuppe beales headástuvvá ja šaddá heajos millii jus eallu ii gávnna guohtuma go eatnamat leat lohkkašuvvan jienja geažil. Dalle boazosápmelaš bággehällá oahpes ja oadjebas johtolagas eret. (Smith 1938: 311.) Smith fuomášumis vuhttoge vuorrováikkahuus bohccuid ja olbmo gaskka, dainna lágiin ahte go olmmoš hoaidá bohccuid bures, de leat sihke bohccot ja eaiggát duhtavaččat ja nuppe beales vedjet goappašat bealit hejot jus bohccot eai gávnna guohtuma. Mikkel Nils Sara (2003a) oaivvilda maiddái, ahte olmmoš ferte heivehit iežas bohcco lundai:

Jus galgá birget bohccuigui, ferte boazosápmelaš mieđahallamiin daiguin bargat. Ja go dan galgá dahkat, de ferte bures diehtit bohcco luondu, eatnamiid, dálkkiid ja jahkodagaid. Dieinna lágiin olmmoš muhtinládje gártá jurddahit bohcco lági mielde, ja dovdat duovdagiid bohcco johtaladdama mielde. (Sara 2003a: 94.)

Olbmo ja bohccu gaskavuođat orrot leamen oalle guovddážis go lea sáhka bohc-cuid gieđahallamis. Bohcco iešvuođaid dovdagoahtá go dan šaddá gieđahallat. Čavga njuolggadusat dasa mo gieđahallat bohccuid eai oro gávdnomin, muhto lea dilálašvuhta mii oahpaha, dahje nugó Ánná dadjá ahte boazu ieš oahpaha olbmo.

Gessot guovlluide ja gulahallat daiguin

Dasa lassin go mánát boazodoalus válđojuvvojit mielde vai ohppet deaivat guovluin, de lea maiddái dehálaš ahte mánát ieža gessojuvvojit guovlluide. Elle muitala mo son lea mearkkašan, ahte su mánát hálidit vuolgit sin boazoguohitunguovlluide. Son muitala:

Go it beasa mannat, it beasa orrut doppe, it don daidda oahpásmuva, it don gesso daidda. Sihkkarit jus don dál manat lupmui, it don gal gesso daidda báikkiide gos it leat orron, doaivvut go? Ja doppe gos bessel jaskadis meahcis, doppe gal measta gesso daidda báikkiide, álgá liikot daidda eatnamiidda, váriide ja hálidišgoahtá leat doppe. Ná, lávejit goittotge mu mánát giđđat. Go giđđa šaddá, de goittotge hálidit duođas dohko mannat, fitnat juobe. Vaikke eai astta go leat bargguin, de juobe finihit fertejít. Nu ahte dat goit leat gesson daidda báikkiide.

Nugo mun ádden Elle, de ferte olmmoš ieš orostallat guovlluin, nu ahte liiko-goahtá daidda. Danne ii leat doarvái dušše fitnat guovlluin go dalle it dáidde gessot daidda. Muhto jus orostallá guovllus, de liikošgoahtá ja maiddái gessojuvvo daidda.

Káren Elle Gaup (2005) oaivvilda, ahte olmmoš oažžu dávjá lahkavuođa lundai bajásšattadettiin go orostaddá guovlluin, ja lea iežas bearrašiin ja lagaš fulkkiiguin guovlluin gosa sis leat čanastagat. Dasa lassin go mánna oažžu dieđuid ovddeš buolvvaid ja eallima birra daid guovlluin, de beassá maiddái oahppat mo birget ja hálddašit iešguđetlágán hástalusaid daid guovlluin dahje sullasaš guovlluin. Boarrásut olbmuin leat dieđut ovddeš ássanguovlluid birra ja guovlluid birra gos soames lea riegádan, ja nu duovdda ealásmahitto go devdo dáhpáhusaiguin ja muitalausaiguin. (Gaup 2005: 53.) Mánna sáhttá maiddái oahpahuvvot ieš gulahallat duovdagiin go máhttá daid njuolggadusaid.

Ailo muitala mo son lea iežas áhkus oahppan, ahte ii galgga duohadit buot maid gávdná fiervvás:

Mu eadni ja mu áhkku, gii dál lea ain eallimin, dat lávii munne muitalit ahte ii galgga mannat duohadit, mahkáš jus gávnna hui fiinna muora mas lea fiinna minsttar. It don galgga dan mannat

duohtadit ovdal go leat jearran lobi, ja in mun dieđe mo dat lávii lohkat “puh³ heahpan ále bosttáš mu” lávii sihtat lohkat jus mun mahkáš galggan duohtadit maidege. It don dárbbaš nie garrisit, sáhtát dušše jurdagiin lohkat. Lávejit maid lohkat, ahte jus viesu lusa válddát muora ja čuolat golbma sázu dasa, dat lea seamma go Ipmil Áhčči, Ipmil Bártni, Ipmil Bassivuoijja nammii. Nugo jus vuorja-huvvat rávggaide ovdamearkka dihtii, de galggat sámeniibbiin čuolastit golbma ceahki, ja de bálkestit dan merrii, ja vel lohkat “mannat geidnosii, iige mu boahtit vuorjat”, nie juoga láhkai.

Go Ailo lohká, ahte olmmoš sáhttá duohtadit ja váldit biergasiid mielde maid gávdná muhto dalle ferte vuos jearrat lobi, de ádden mun sus ahte olmmoš sáhttá gulahallat ja soabadit biergasiid alde mat leat fiervvás, muhto olmmoš okto ii ráđđe daid badjel. Aillo muiitalusa mielde olmmoš ii ráđđe okto duovdagis, ja danne ferte doalahit buriid oktavuođaid vuoinjpaiguin, iige hásttuhit daid.

Guovllut ja duovdagat doibmet maiddái gulahallansubeaktan. Muiitalusaid bokte mánáide oahpahuvvo maid fertejít vuhtiiváldit go lihkadir máilmmiss ja nu oahpahuvvo sidjiide maiddái máilmmissaidnu.

Maiddái eará álgoálbmogiid gaskkas, geat ellet luonnduvalljodagain, leat čanastagat olbmuid ja duovddaosiid gaskka oalle dábálaččat. Sin čanastagat duovddaosiide bohtet dávjá ovdan muiitalusain. Keith Basso (1996) gii cállá Oarje Apache indiánaid muiitalusaid birra Davvi-Amerihkás oaivvilda, ahte doppe lea njálmrmálaš muiitalusain vuolibmi ásahtit bistevaš čanastagaid olbmuid ja duovddaosiid gaskka. Jus olmmoš ii leat omd. láhtten rivttes láhkái, de bággejuvvo son iežas láhttema govahallat kritikhkalaččat, ja dasto geahččalit buoridit dan. Basso oaivvilda ahte eamiálbmoga modealla mo muiitalusat hábmejít Apache álbumoga duovdaga áddejumiid, lea maiddái seammás modeallan dasa mo muiitalusat doibmet hábmen dihtii Apache álbumoga áddejumiid iežaset birra. (Basso 1996: 40.)

Coyote álgoálbmogiin leat maiddái nana čanastagat olles duovdagii, mat bohtet fas ovdan sin muiitalusain. Fikret Berkes (1999: 7) čuoččuha ahte Coyote álbumogat eai sirre ekologalaš beliid eret oskkoldatlaš, estehtalaš dahje sosiálalaš beliin. Muiitalusaid bokte mánát ohppet moralalaš njuolggadusaid mat láidestit sin iežaset sosiálalaš ja ekologalaš oktavuođaide gultalettiin vuorrasut olbmuid máinnastemiid.

Lean dán kapihtalis digaštallan mo máhttofievrrideapmi dakkko boazodoalus. Guovllut, johtolagat, dálkkádagat ja siivvut bidjet dehálaš vuodu dasa maid olmmoš ferte máhttit hálldašit. Sii dovdagohtet guovluid dušše dan bokte ahte ieža leat doppe ja nu sii fertejít dovdat duovdagiaid gos sin bearas ja siida

³ čolgada

johtá. Dasa lassin go ohppet dovdat iežaset guovlluid, de fertejít maiddái oahppat dulkot iešguđetge dilálašvuoda nu ahte sáhttet vánndardit maiddái okto. Mánát fertejít iežaset vásáhusaid bokte oahppat vánndardit duovdagii. Sii fertejít oahppat, dovdat ja deaivat, nugo oahppat johtit juohkelágán siivun, oahppat dovdat bohccuid luonddu juohkelágán dálkkádagain, oahppat dovdat man guvlui galgá mannat, dovdat bohccuid hámi. Mánát ieža ohppet dovdat ja deaivat go leat guovlluin ja go bessel ieža oaidnit ja oassálastit dilálašvuodain. Sii ohppet mearridit iešguđetlágán dilálašvuodain. Daidda eai gávdno čielga njuolggadusat, muhsto olmmoš ferte oahppat diehtit maid dahká go iešguđetlágán dilálašvuodat čuožžilit. Vaikke ii leat vásihan dan seamma dilálašvuoda dahje lea vuosttas geardi go vánndarda guovllus, de ferte máhttit dulkot ja mearridit dulkoma vuodul.

Mánná oahppá giela bokte gulahallat earáiguin, ja nu sáhttáge doaimmahit áššiid go nubbi neavvu. Gielas leat sierra terminologija, sániid mearkkašumit, konnotašuvnnat ja čanastagat boazobargguide. Go máhttá giela mii guoská ere-noamážit boazodollui, de sáhttá doaimmahit bargguid nuppi njálmmálaš neav-vuma vuodul. Gielas, mii lea anus boazodoalus lea dárkilvuhta, ja dan oahppá go ieš lea boazodoalloguovlluin, bohccuid luhette ja muđui doaimmaheamen boazo-dallobbargguid. Boazosámiid máhtu sáhttá maiddái govahallat ollislažjan, mii mearkkaša ahte ii sáhte buot áiggiid sirret máhtuid osiide omd. Vuoinjalaš máhtu sirret eret ekologalaš máhtus. Vuoinjalaš máhttu sáhttá baicce leat oassin ekolo-galaš máhtus. Mánná sáhttá oahppat dovdat máilmimi mas vuoinjalaš bealit leat čatnasan duovdagii.

6 Sihkkarastit máhtuid sirdima

Nissonolbmot leat boazodoallobearrašiin sii geat leat mánáiguin eanemus ovttas sihke ovdal skuvlavázzima ja skuvlaváccidettiin. Mánát leat dasto ollu etniid hálldus oahpaheami dáfus go eanaš áhčit leat guodoheamen ealu. Eatnit váldet mánáid mielde siidoallobargguide. Muhto nissonolbmuin leat maiddái báike-doallobarggut, ja mánát dasto oahpahuvvojít maiddái daid bargguide go leat skuvlavázzit. Nissonolbmuin leat alddiineaset boazodoallomáhtut jus ieža leat bajásšaddan doppe, dahje leat ollesolmmožin oahpahallan boazodoallobargguide. Go sis alddiineaset leat vásáhusat boazodoalus, de dihtet maiddái maid mánát dárbbáshit oahppat go galget boazodoalus birget. Boazodoallu leage viiddis doaimbma, mas leat mánggalágán barggut ja nu maiddái šaddet mánggalágán máhtut. Muhto servodagas soitet leat váilevaš diedut das, mii oppalaš boazodoallu lea, ja erenoamážit das makkár máhtut gáibiduvvojít jus doppe galgá birget buoremus lági mielde.

Boazodoalu máhttofievrrideapmi spiekasta luohkkálanja oahpahusas go dasa gáibiduvvo ahte olmmoš geavaha buot áiccuid jus galgá sáhttít čoavdit áššiid. Nuppi olbmo čilgemat eai leat dasto doarvái jus mánna galgá ieš sáhttít čoavdit áššiid okto. Mánna ferte leat ieš oassálastimin doppe gos boazodoallu doaimmahuvvo lunddolačcat. Nuppiin sániiguin daddjon, ollu osiin boazodoalu oahpus ferte mánna ieš leat doppe ollislačcat, ja nu beasságe dovdat gorudis mii gáibiduvvo go galgá doaimmahit bargguid.

Sámi almmolašvuodas lea šaddagoahtán eanet sáhka árbevirolaš máhtuid birra. Boazodoallomáhtut leatge dehálačcat ja dárbbáslačcat jus boazodoalu galgá sáhttít fievrredit ekologalaš bisteavašvuoda vuodul. Jearaldat lea mo otná dilis máhtuid sáhttá áimmahuššat go máhttofievrrideapmi ii leat šat seamma lunddolaš ja diehttalas go ovddit čuohtejagi gaskkamuttus. Dalle lei biras mánáid skuvla, gos boarrásut fuolkkit doibme oahpaheaddjin. Odne šaddet mánát oahppat skuvlamáhtu, mii sihke oahpaheami bokte ja sisdoalu dáfus spiekasta ábevirolaš vuodđoealáhusaid oahpaheamis.

Mun guorahalan dán kapihtalis álggos vuos makkár áddejupmi otná servodagas lea boazodoallomáhtui. Dasto árvvoštalan manne lea dehálaš boazodoallomáhtu seailluhit ja ovddidit. Loahpas guorahalan vel mo sáhttá sihkkarastit máhtu fievrrideami maiddái boahttevaš buolvvaide.

Boazodoallomáhtu ipmárdus

Skuvllaaid ja eará almmolaš ásahuaid diehtu boazosámiid birra lea mealgat muddui ovttaskas olbmuid duohken. Sivvan dasa lea, go skuvllain ii leat leamaš

vierrun oahpahit máhtuid birra mat eai gávdno girjjiin. Dábalaš skuvlaoahpahus lea juhkkjuvvon fágaide ja nu spiehkastage boazodoalu oahpaheamis. Boazodoalu oahpahus ii leat juhkkjuvvon fágaosiide. Giella oahpahuvvo omd. gápmasiid neaskkidettiin. Jus skuvllas unnán oahpahuvvo árbevirolaš máhtuid birra, de unnu servodaga ipmárdus dasa mii árbevirolaš máhttu lea, mo dat oahpahuvvo ja mo dat spiehkasta skuvlamáhtus.

Máret Ánná mielas lea servodagas dávjá ovttageardánis oaidnu dasa mii boazodoallu lea. Dávjá lea oaidnu ahte boazodoallu lea dušše gárddástallan. Máret Ánná oaivvilda ahte skuvlagirjjiid ii heive váldit mielde boazodoallobargguide. Son oaivvilda ahte mánát de seaguhit daid oahpuid go eai nagot oktanagas buot oahppat. Máret Ánná muitala mo girjjit sáhttet sollet mánáid eret boazodoallobargguin:

Álggos lei nu ahte mánát ožžo váldit mielde girjjiid. Mun logan maid dat ohppet, eai dat goit astta mu gullat. Boazodoallu lea álohií gehč-čojuvvon, mu ipmárdusa mielde, ahte dat ii leat eambbo go gárdde luhtte. Don čuoččut gárdde siste, luite ealu, eallu manai, ja olbmot vuoddjájedje skohteriiguin manjái. Jus don nie jurddašat, ná gal dat lea oppa álkes eallin. Ii das leat mihkig, eai leat namahusat eai mastige. Ná nie gal lea oppa álki. Orro hui álkes eallin, muhto dat ii leat nie.

Go mun jearan Máret Ánnás, ahte lea go skuvllas dakkár ipmárdus ahte buot boazodoallobarggut dáhpáhuvvet gárddis, de son vástida ná:

Mun jáhkán dat ii leat dušše skuvllas, muhto oppa servodat mii geahččá dieinna lágiin. Boazodoalu leat geahččan, na goittotge dán rádjái, go mánggas leat dadjan munne, ahte maid jur doppe čuožžut dušše áideguoras, maid doppe, mánáid vel váldit mielde. Dat gii dadjá nu, ii vissa jurddaš gal nu guhkás. Mun láven jurddašit ahte jus servodagas lea diekkár jurdda, de lea ávccá boastut ipmirdeamen. Doppe lea nu ollu maid don galggat oahppat. Don it sáhte it lávvuige mannat, guovlalit sisa ja dadjat dá lea dušše lávvu. Das leat nu ollu namahusat go don guovlalat lávu sisa. Ja maid don jáhkát doppe boazobarggus, maid don galggat albma láhkái oahpahit, nu ahte ipmirda nubbi sápmelaš maid don meinnet.

Dás boahtá ovdan, ahte skuvla fievrída dieđuid ja máhtuid mat eai ovttastahtto boazodoallomáhtuiguin. Sáhttá gal jearrat manne skuvllas, mii galggašii speadja-lastit buot beliid servodagas eai leat dieđut mat heiveše oktii boazodoalu oahpahemiin ja máhtuiguin?

Skuvla- ja árbevirolaš máhtu ruossalasvuodat

Svein Mjaatvedt (1988: 52) čállá mo skuvla sáhttá leat roassun sámi servodahkii, jus dat ii leat vuodđuduvvon sámi kultuvrii. Jus dáčča skuvlaminstara fievrrida eahpekritihkalaččat, de áítá dat sámi kultuvrra. Nuppe beales jus skuvlla sisdoallu huksejuvvo sámi kultuvrra vuodul, de lea ballu ahte sámit eai oaččo dan gelbbolašvuoda maid dálá servodat gáibida. Ruossalasvuodat čovdojuvvojit buoremusat jus skuvla govččašii daid dárbbuid maid sámi servodat dárbaša odne ja boahtteáiggis. Dasa gáibiduvvo čiekŋalis guorahallan.

Vuokko Hirvonen (2003) guhte lea dutkan mo skuvlareforbma 1997, mas sámit ožžo sierra oahppoplána lea váikkuhan oahpahussii. Son lea gávnahan, ahte máŋgga oahpaheaddji mielas sámi mánát ja nuorat ohppet buoremusat barggu čada ja skuvlaseinniid olggobealde. Muhto vásttisvuhta lea luohkkálanjas vuolgit olggos go skuvladiimmut leat ordnejuvvon 45 minuhta oahppodiimmuid ja fágajuogu mielde. Dasa lassin lea oahpaheddjiin maiddái vásttisvuhta guodđit ovddeš diehtojuohkinrolla. (Hirvonen 2003: 116–123.)

Ruossalasvuodat skuvlla ja sámi árbevirolaš máhtuid háhkamis, maid Mjaatvedt namuha dás bajábealde, orrot ain odne leat duohavuohtan vel daid guovlluinge gos Sámi oahppoplánat doibmet. Mikkel Nils Sara (2003b) oaivvilda, ahte servodagas odne leat stuorra vuordámušat, ahte skuvla galgá oahpahit árbevirolaš máhtu, muhto skuvlla ii leat dasa gárvvis. Son čállá:

Ruovttu oahpahanáigi ja -vejolašvuhta lea oaniduvvon, ja seammás maiddái leat lassánan bearrašat main eai leat váhnemát ruovttuin barggus beivviid. Nu jorret skuvlla oahpaheapmái eanet vuordámušat ja ođđa ovddasvástádusat, ja dasa gullá maiddái árbevirolaš sámi máhtuid oahpaheapmi. Muhto go skuvla ii leat ovdal dárbbahan diein beroštit, de leat sámi árbevirolaš máhtut dán áiggi skuvllain guhkkin eret gárvvisin láhčojuvvon dieđut ja máhtut. Skuvlii dat leat ođđasat, go skuvllas leat iežas oami oahpahan- ja máhttoárbevierut.

Seammás lea nu ahte árbevirolaš sámi máhtut leat ain sadjosis ja anus muhtun oasi váhnemiin, ja erenoamážit goit boarráseappuin. (Sara 2003b: 123.)

Jearaldat lea maiddái, ahte lea go skuvllas oba vejolašvuohage alddis okto oahpahit mánáide árbevirolaš máhtu. Vaikke skuvllas sáhtašii leat vejolaš oahpahit, de badjána dattetge jearaldat man muddui skuvla sáhttá dan dahkat. Árbevirolaš máhttu, nugo boazodoallomáhttu lea earálágán go skuvlamáhttu. Nugo Hirvonen lea fuomášahttán, ahte skuvlla ii leat luvven eret oahppodiimmuin ja fágajuoguin, de lea juo dat iešalddis hehttehussan árbevirolaš oahpaheapmái. Diedu ollislaš-

vuhta lea árbevirolaš oahpaheami dovdomearka, ja jagiáiggit stivrejít mealgat muddui goas makkárge barggut sáhttet dahkkot.

Árbevirolaš máhttofievrrideapmi spiehkasta vuđolaččat pedagogalaš ide-álain maiguin mánná deaividá skuvllas. Mánát ožzot vuđolaš čilgehusaid árbevirolaš máhttofievrrideamis dasa maid dárbašit diehtit, ja dasa lassin movtii-dahttjoit jearahallat jus lea juoga maid eai ádde. Meahcceealáhusas lea olmmoš dávjá okto, ja muhtun áigodagain lea guhkkin eret eará olbmuin. Oahppat okto čoavdit váttisvuodaid lea dárbašlaš jus galgá birget. (Jernsletten 2000: 106–107.)

Bjørn Bjerkli (1999) árvvoštallá mo árbevirolaš máhtu berre oaidnit. Son oaivvilda ahte mii fertet áddet árbevieru dakkárin mii lea vuodđuduvvon geavatlaš doibmii, ja mii čatná olbmo ja luondu oktii áiggi badjel. Nu árbevieru ii sáhte oaidnit páhkkan, mii fievrriduvvo buolvvas bulvii. Muhtun láhkái ii leat dát máhttu fievrriduvvon obanassiige. Máhtut leat baicce geažos áigge heivehuvvon daid dilálašvuodaide gos olbmot geavahit eatnama ja luonduvalljodagaid. Jus olbmuin válđojit eret vejolašvuđat geavahit luonduvalljodagaid, de geavahan-áddejupmi nohká, nu ii leat šat joatkka árbevirolašvuđas. (Bjerkli 1999: 209.)

Mun lean ovttaoaivilis Bjerkliin, ahte árbevirolaš máhtu ii sáhte oaidnit stáđásmuvvan máhttun, muhto lea baicce máhttu mii rievdá. Go dilálašvuđat rivdet, de ovddeš máhttu ođasmuvvo ja heivehuvvo ođđa dilálašvuđaide. Nugo eará álgoálbmogat, geat ellet árbevirolaš boazodoaluin ja bivdduin árktaš guovlluin gos leat buollašat, de leat maiddái sápmelaččat háhkan bivuid maiguin bivvet. Ođđa vuogit mo birget badjánit dađi mielde go dilálašvuđat rivdet. Go omd. muohtaskohter válđui atnui, de nuvttohat eai leange álo šat nu vuohkkasat. Muohtaskohter bossu liegga áimmu vuojedettiin, ja nu njusketge nuvttohat. Muhto olbmot leat dasage gávdnan čövdosa. Máŋggas leat goarrugoahktán njunehis nuvttohiid mat leat heivehuvvon skohtergápmagiid sisa, ja nu juolggit bissot sihke goikkisin ja liekkasin.

Go geahčá mo ovddeš áigge árbevirolaš máhtut fievrriduvvojedje boazo-doalus ja buohtastahttá dan otná diliin, de sáhttá buorebut áddet mii odne gáibiduvvo máhtuid seailluheapmái.

Mánáid oassálastin ollesolbmuid bargguin

Ellon-Gáren gullá dan bulvii geat orro gođiin čađat ja nu šaddege ovttastallat ollu ollesolbmuiquin go čoahkkanedje goahtái. Doppe buohkat gárte leat njunnálagaid. Son gulai maid ollesolbmot ságastalle, ja oassálastti ovttas báikki ja siidda olbmuiguin beaivválaččat ja lei mielde bargguin. Ellon-Gáren muittaša mo son geahčališgodii duddjot. Son muitala:

De lei geassi ges, eadni lei goarrumin čázehiid, na mun dat gal maid geahčalan goarrut čázeha. Ále fuola, mun gorron gápmaga. Gáma

goit šattai mu iežan mielas. Mun hirbmadir fanahallen. Dál mun jurddašin, mo son dát lea go mun dán geahčalan duognat, makkár dat šaddá, in mun nuppi gápmaga astta goarrut. Mii bat dal leaččai, dalle mun čuhppen ráiggi dasa, ja de mun dugjen dearesduognasa dasa. Čuhppen jorba ráiggi manjegeahčái. Šattai stuorra ráigi, ja mun bidjen dearráisiid guovttebeallái, ja de dugjen birra. Na, dat han gal šattai duonjasgáma. Álggos mun geahčalin geadggi vuostá ruvvet, muhto ii han dat ráigánan dainna. Dalle mun skárriin čuhppen. Vare dál ain livččii dat oaidnit. Viššal mun ledjen, ja suonaid mun lávejin botnit hirbmadir, mun ledjen hui suotnabodni šaddan. Ja skuvlaáiggí botnen suonaid hirbmadir.

Gáren lea čuvvon mielde mo su eadni lea gorron gápmagiid, ja oaidnán velge go lea duogjan gápmagiid. Mánáid ovttastallan ollesolbmuiquin mielddisbuvttii ahte ollesolbmuid barggut šadde mánáid stoagusin. Erohus ollesolbmuid bargguid ja mánáid stoahkama gaskka ii leange stuoris. Stoahkan vuodđuduvvui ollesolbmuid beaivválaš bargguide, ja nu joraige stoahkan barggu guvlui. Nugo Gáren, gii ráiggai suohttasa dihtii gápmaga vai beassá geahčalit duognat nugo lei oaidnán ollesolbmuid dahkamin.

Anton Hoëm (1976b) cálláge ahte mánáin árbevirolaš sámi boazodoallobirrasis lei lahka gullevašvuhta ollesolbmuid máilbmái. Mánáin ja ollesolbmuin lei oktasaš latnja sihke beavet ja ihkku, ja bargu ja stoahkan dáhpáhuvai oktasaš sajiin. Stoahkama lei váttis oaidnit eará go bargoráhkkanepmin dahje eaŋkilis bargovuohkin. Hoëm oaivvilda ahte odne go mánát bajásšaddet giliin, de sii ohppet dušše bohccó ja boazodoalu birra váhnemiid ságastallamiid bokte dahje váhnemiid ja eará boazosámiid ságastallamiid bokte. Sii eai šat bajásšatta árbevirolaš eallinvuohkái man ala árbevirolaš doaibma lea huksejuvvon. (Hoëm 1976b: 197.)

Antropologa Robert Paine (1994) guhte vuosttas geardde čuovui boazosápmelaččaid mielde 1950-loguin, čujuha Nils Isak Eirai guhte mualta mo mánát ovddeš áigge oassálaste buot boazodoalu bargguin. Dalle lei maid vejolašvuhta árvvoštallat mánáid seamma árvomihtuid vuodul go ollesolbmuid, mii guoskkai návcçäide dahje návcçahisvuodaide bargat bohccuiguin. Manjá go 9-jagi skuvla bodii 1960-logu gaskkamuttus, de seamma árvomihtut eai sáhttán šat geava-huvvot. Rievdadus lei roassun boazodollui go bearaseallin fertii heivehuvvot eanet skuvlajahkái go boazodollui. Boazodoalu máhtoeavttut leat eatnama ja guohtuma rievdadusat birra jagi, áiggiid ja dálkkiid mielde. Dasa lassin ferte dovdat ealu láhttema ja ovttaskas bohccó iešvuodaid nugo neagu, agi, sohkabeali ja dábiid. (Paine 1994: 149.)

Otná dilis ii leat olles bearashaččat. Váhnemar, áhkut, ádját, fuolkkit, reanggat, biiggát ja mánát eai leat šat odne njunnálagaid. Stuorra dálut gos leat ollu lanjat addet vejolašvuodaid bearasha miellahtuide sierranit. Fuolkkit,

siidaguoimmit ja muðui olbmot geat bohtet guossástallat eai dárbbaš deaivvadit buohkaiguin. Mánát sáhttet leat sierra lanjain gos sii buðaldit, nugo omd. gehčet tv ja spellet dihtoriin. Nu massetge mánát ovttastallama ollesolbmuiguin. Sii eai gula siidaságaid omd. mo guohtumat leat, ja mii muðui dáhpáhuvvá boazodoalus.

Boazodoallomáhttu lea manggabéalat, ja okta oassi gullá čavgadit nuppi oassái. Birgen boazodoalus góibida dasto máhtuid mat gullet dan báikedollui ja siidii gos máná beará lea. Nugo ovdal juo daddjon, de leat mánát eanaš áigge báikedoaluin ovttas etniideasetguin. Mánain lea dasto vejolašvuhta oahppat daid bargguid mat dohko gullet. Muhto dasa góibiduvvo ahte eatnit bidjet návcçai-deaset oahpaheapmái, mii ii leat odne nu álki go mánáide leat nu ollu eará asttuáiggefálldagat maiguin gilvalit.

Boazodoalu iešvuodat

Boazodoalus góibiduvvo ollislašvuða máhttu siidda birra gosa olmmoš gullá, muhto dát máhtut sáhttet maiddái geavahuvvot eará siiddain. Boazodoallomáhttu leage vuolggahuvvon boazodoalu doaimmas, ja nu leatge oktasaš máhtut siiddaid gaskka. Muhto leat maiddái erenoamášvuðat siiddain. Ovdamearkka dihtii leat eatnamat ja johtolagat iešguðetge láhkai ja nu góibiduvvojít dasa nammajadieðut.

Paul Connerton (1989) juohká máhttoáddejumi guovtti oassái, nammalassii *incorporating practice* ja *inscribing practice*. *Incorporating practice* dahje inkorporerejuvvon máhttu lea olbmo gorudis, mii mearkkaša ahte olmmoš guoddá ieš dan máhtu. Dan ii gávnna girjiin nugo *inscribing practice* dahje čálihuvvon máhtu, mii lea vorkejuvvon girjiide dahje vorkejuvvon eará láhkái nu ahte dan sáhttá viežzat vuorkkás. (Connerton 1989: 72.)

Eanaš oassi boazodoallomáhtus fievrriðuvvo inkorporerejuvvon máhtu bokte. Vuosttažettiin leat váhnemát geat juhket dieðuid mánáidasaset. Molsun geavathlaš oahpaheamis teorehtalaš oahpahussii skuvllas, sáhtašii muhtun láhkái gohçoduvvot máhttofievrrideami molsumin, go skuvla geavaha girjiid ja dihtora háhkan dihtii dieðuid, ja nu šaddáge ollu oahppan dáhpáhuvvat čállojuvvon dieðuid bokte (Joks 2000: 21).

Inkorporerejuvvon máhtu dovdomearka lea improvisašuvdna. Go diehtu molsašuvvá njálmmálaš árbevierus čálalaš árbevirrui, de diehtu massá dávggasvuduða. (Connerton 1989: 75.) Boazodoallomáhttu lea juohke boazosámis, ja eanaš oasi máhtus leat sii oahppan earáin ja iežaset vásáhusaid bokte. Sii fievrriðit dan fas viidáseappot, muhto dat ii álo dárbbaš muiṭaluvvot dahje oahpahuvvot nugo sii leat dan gullan ja oahppan. Sii sáhttet fas heivehit máhtuid iežaset guovluide ja olbmuide. Nu sáhttáge dieðuid ealáskähttit ja dahkat daid gelddolažjan ohppiide. Olbmuide bohtet millii sihke duohtha dáhpáhusat ja muittut go leat dan guovllus gos dáhpáhus lea leamaš, dahje go lea guovllus gos dáhpáhusa birra lea muiṭaluvvón.

Boazodoallomáhttu lea árbevirolaš máhttua nu sáhttá diehtit ja áddet daid iešvuodaid birra dan bokte maiddái. Jearaldat lea, mo boazodoallomáhttu sáhttá fievrredit otná dilis go mánát leat eanaš áigge skuvllas. Naba skuvla, maid sáhttá dat oahpahit boazodoalu mánáide?

Skuvladoaibma árbevirolaš máhtu oahpaheamis

Boazodoalu servodat lea odne nannosit čadnon njuolggadusaide mat leat muđui servodagas. Nugo váhnemati ja mánát fertejít vuhtiiváldit skuvlavázzima. Muhto maiddái skuvladili lea vejolaš heivehit nu ahte boazodoallomáhttu ii hávkka, muhto baicce oačuhit dan oidnosii ja sihkkarastit ahte dat oahpahuvvo.

Skuvllas hárjánit mánát doaimmahit barggu, dan sadjái go oahppat fuomáshit bargguid mat galget čovdojuvvot. Seammás lea álkit muitit goas barggut galget dahkkot go dan ahte ieš mearridit maid galgá bargat ja goas bargu buoremusat sáhttá dahkkot. (Hoëm 1976b: 142.) Lea oalle čielggas ahte skuvla ja boazosámi servodat fertejít gulahallat ja searválagaid gávdnat čovdosiid dasa mo sihkkarastit ahte boazodoallomáhttu fievrriduvvo. Skuvladutkamuš maid Hirvonen (2003) lea čáđahan, čájeha ahte otná sámi skuvllat eai riekta bastte fievrredit árbevirolaš máhtu. Hirvonen oaivvildage ahte máhtu sáhttá fievrredit eará sajiin go skuvlla seinniid siskkobealde. Son čállá:

Diehtu ja máhttua eai leat čadnon beare skuvlla várás skuvlejuvvon ámmátolbmuide, oahpaheaddjiide, muhto maiddái earát sáhttet dan hálldašit ja gaskkustit. Dát viiddida maiddái oahppanoainnu, ahte skuvlla olggobealde lea vejolaš oahppat ja maiddái oahppanbiras oažju viidásut mearkkašumi, go mannat skuvlla seinniid olggobeallai. (Hirvonen 2003: 46.)

Hirvonena oaiviliid vuodul lea navdimis ahte skuvla ii dárbbašivčče geavahit dušše iežas ásahusa oahpaheami oktavuođas, muhto sihke oahpaheapmi ja oahpaheaddjít sáhttet leat skuvlla olggobealde. Go guorahallá mat árbevirolaš máhtu iešvuodat leat, de orro leamen dadjat juo veajemeahttun vuordit ahte skuvla okto galgá sáhttít fievrredit nugo omd. boazodoallomáhttu mii gullá árbevirolaš máhtuide. Sáhttá gal osiid boazodoalus oahpahit, nugo giela, bohccó birra, eatnamiid birra ja duddjoma. Muhto maiddái ollu dáid namuhuvvon osiin gáibiduvvo, ahte oahpaheapmi dahkko dan lunddolaš birrasis. Nugo mun lean dás ovdal čujuhan, de maiddái boazodoalu giela sáhttá leat váttis oahpahit eará sajiin go doppe gos barggut doaimmahuvvojít.

Boazodoalu oahpaheami mán̄ggabealatvuodat

Boazodoallu lea árbevirolaččat oahpahuvvon barggadettiin dalle go lea leamaš lunddolaš dan dahkat. Oahpaheapmi lea oassin beaivválaš barggus. Dan oahpaheami ii dárbaš plánet ja dasa ii dárbaš ráhkkanit sierra, nugo maid ja mo oahpahit. Ráhkkaneapmi gullá lunddolaččat oahpaheapmái, omd. ovdal go duddjogahtá, de ferte vuos ávdnasiid háhkat. Vuokko Hirvonen (1998: 154) govahallá mo nissonolbmot geat bivttastedje olles bearraša, fertejedje dovdat luonduu molsašuddama, ávnnastanbáikiid já ávnnastanáiggiid. Dás oidnoge man ollu sierralágán máhttu dárbašuvvo maiddái duddjomii, go dan geahččá ollislaččat. Olmmoš guhte ávnnasta ieš, ferte maiddái dovdat bures luonduu iešvuodaid.

Go Inggá oahpaha Aillo gámasuinniid dikšut, de son muitala maiddái fearániid su mánnávuodas. Nu Ailo barggadettiin oahppá mo su máttut barge ovddeš áigge, ja nu oahppá maiddái lagašbirrasa historjjá, fuolkevuoda birra ja mo áigi lea rievdan ovddežis otnážii. Ingá muitala Ailoi divššodettiin gámasuinniid:

Lávii dološ áigge go soames boahtá ja lea suinniguin bargamin, dat čohkkeda veahkkin bargat. Dalle lei ovttastallan earáiguin dehálaš. Dat hupme ja barge. Dološ olbmot eai golahan áiggi čohkkát ja geahččat ahte nubbi bargá.

Gámasuoidnedikšuma oktavuođas oahppá Ailo maiddái mo ovdalis áigge Sámis sáhtte veahkkálagaid nuppiiguin bargat.

Gunvor Guttorm (1996) lea guorahallan mo studeanttat Sámi allaskuvillas veardidedje duodjeoahppama skuvllas ja árbevirolaš oahpaheami manjá go ledje beassan geahččalit oahppat duddjot eallilan olbmuid luhtte. Son čállá mo studeanttat veardádalle:

Go lea okta gean luhtte lea, ja erenoamážit nugo dát studeanttat ledje eallilan duojáriid luhtte, de namuhit maid studeanttat ahte go čohkká duojáriin, bohte ságat eallimis ja eallinvuogis ja sii ožžot lagat oktavuođa birrasii mas duodji doaibmá. Go jerren mii lea erohusaid skuvlla duodjeoahpusas ja das maid dál ledje vásihan, de lei justa lagašvuohta geahččastahkii (*perspektiivi*) masa buohkat čujuhedje. Oahppanáigi oanui maid go besse leat ovttas bagadalliin. (Guttorm 1996: 8.)

Dás boahtá ovdan ahte Sámi allaskuvlla studeanttat oaivvildedje, ahte duddjodettiin sii besse oahppat eallima ja eallinvugiid birra go ledje oahppamin duddjot árbevirolaš málle mielde. Guttorm sániid mielde, studeanttat vásihedje ahte eallilan duojárat ságastalle maiddái eará go dušše duddjoma birra. Árbevirolaš máhttu dovdomearka leage holistalašvuohta, dainna mearkkašumiin ahte máhttu ii dár-

baš juhkkojuvvot sierra fágaosiide. Duddjodettiin sáhttá oahppat maiddái eará beliid nugo omd. vuoinjalaš áššiid.

Dás boahtáge bures ovdan mo árbevirolaš máhttu oahpahuvvo. Dasa lassin go dihto bargu oahpahuvvo, de sáhttet seammás maiddái eará áššít guoskka-huvvot, ja nu maiddái oahppis lea vejolaš oahppat eará beliid go dan guoskevaš barggu. Mánáid váhnemát, áhkut, ádját ja eará fuolkkit šaddetge dehálaččat oahp-heamis. Muhto lea unnán sáhka almmolaččat, mo sin máhtuin sáhttá ávkkástallat go boazodoalu boahtteágge birra digaštallovuvvo.



Govva 4. Berit Sara Turi ja Inger Berit Martine Buljo.

Máhtu dehálašvuhta boahttevaš boazodoalu bistevašvuhtii

Nugo ovdal daddjon, de lea etniin dehálaš doaibma máhttofievrrideami oktavuoðas go mánát leat eanaš báikedoalus skuvlaváccidettiin ovttas etniideasetguin. Dalle šaddáge dehálaš áimmahušsat nissonolbmuid máhtuid boazodoalus, ja geavahit daid riggodahkan mánáid oahpaheamis ja máhtuid fievrrideamis. Máhtut bohtet fas ávkin vuosttažettiin boazodoalu boahtteáigái, ja dasto árbevirolaš máhtu oppalaš áimmahuššamiidda.

Skuvllas leat ráddjehusat dasa maid bastá oahpahit. Oahpaheaddjit leat čadnon ásahusaide main leat sierra struktuvrrat, ja skuvlaplánat eai soaba buot áiggiid oktii árbevirolaš máhtu oahpahemiin. Skuvllas leat maiddái dihto áiggit goas maid galget lágidit ja bargat, nugo oahppoplánat mat geatnegahttet vissis oahppama, mas leat eará go árbevirolaš máhtut nugo ráhkkanameamit eksámeniidda mat gáibidit maiddái earálágán gelbbolašvuodaid.

Skuvlaoahpaheddjiin lea alddiineaset skuvlamáhttu man mielde sii oahpahit. Sii eai leat vuosttažettiin doppe gos árbevirolaš máhttu doaimmahuuvvo. Dan sivas go árbevirolaš máhttua rievdá iige leat stáðásmuvvan máhttu, de leat sii geat čadat doaimmahit boazodoalu bargguid geain lea máhttu áimmuin, dahje nuppiin sániiguin daddjon, sis lea máhttu gorudis. Máhtu ovdanbuktimii ii dárbaš ollu ráhkkanapmi, go dat lea iešalldis lunddolaš oassi bargguin. Boazosámit leat ieža mánnán oahpahuvvon dainna lágiin, ja nu sii maiddái fievrredit dieðuvideaset viidast sullasaš vugiid mielde.

Sii geat ieža leat boazodoalus, oidnet maiddái buorebut maid mánná dárbaša máhttít go galgá birget boazodoalus. Eatnit geat leat mánáiguin olles áigge, dihtet maiddái bures maid mánát hálldašit, maid eai hálldaš, ja maid berreše eanet oahppat. Dasa lassin dovdet sii maiddái máná luondu, mii maiddái lea mívssolaš árbevirolaš oahpaheamis. Boazodoalu árbevirolaš máhttosirdima dovdomearka lea váldit vuhtii máná iežas beroštumiid, ja nu biddjo dat vuodðun maiddái oahpaheampái.

Árbevirolaš máhtu oahpaheami ovddasvástádus ii sáhte ollásiidda biddjot skuvlii, go diehtá ahte lea veadjemeahttun oahpahit skuvllas buot beliid. Ráddjehusat leat máŋga ja daid lea dehálaš oažžut ovdan jus lea sáhka sirdit árbevirolaš máhttooahpaheami skuvllaide. Dalle lea dehálaš sihke diehitit ja ságastallat ráddjehusaid birra.

Árbevirolaš máhtu oinnolašvuhta ja viidodat

James Karlsen (2004) lea guorahallan Eanadoallodepartemeantta ovddas mo prošeavttat nugo eatni-máná-oahpaheapmi ja nissonfierpmádagaid ásaheamit ja doarjagat lihkostuvve. Jagiin 1999 rájes gitta 2004 rádjai lei biddjon 5,4 mill kr ruhta dáid doaimmaide. Guorahallan lea geahčadan rapporttaid, maid nissonolbmot

leat čállán prošeavtaideaset vuodul. Raporttat duođaštit ahte oahpaheapmi lea dahkkon, muhto unnán boahťa ovdan oahpaheami kvaliteahta birra, oaivvilda Karlsen. Guorahalli oaivvilda, ahte oahppu bissu ovttaskas báike- ja siidadoaluid siskkobealde. Mánná oahppá, muhto máhttu ii boađe ávkin muđui boazodoallo- ja stuorraservodahkii. (Karlsen 2004: 30.)

Eatni-máná-oahpaheami prošeavta sáhttá oaidnit inkorporerejuvvon geavatlaš máhttofievrrideapmin. Árbevirolaš máhttu lea sirdašuvvan buolvvas nubbái bearraša siskkobealde, muhto lea leamaš servodaga oktasaš máhttun maiddái. Dattetge sáhttet olbmot geat eai dovdda árbevirolaš máhttofievrrideami proseassa eahpidit ahte bearrašis oahpahuvvon máhtut bohtet ávkin viidábut servodahkii. Connerton (1989) oaivvilda ahte čállon diehtu biddjo vuorkái. Inkorporerejuvvon máhtu ii fidne čállon dahje earáladje vurkejuvvon hámis. Čálalaš máhttu, man árvu bajiduvvo, gohcoduvvo servodaga oktasaš máhttofievrrideami vuogádahkan. Muhto Connerton oaivvilda, ahte lea boastut vuolidit inkorporerejuvvon máhtu go das lea sihke muiču ja dat bisuhuvvo maiddái. Juohke joavku diehtá bures mo ovddeš máhtut bisuhuvvojít. Nu leage kultuvrralaš máhtus “njoahcivuohta”, dainna mearkkašumiin ahte máhttu doalahuvvo guhká go sirdašuvvá nuppis nubbái. (Connerton 1989: 102.)

Sáhtášii govahallat mo eatni-máná-oahpaheamis máhtut levvet viidát servodahkii ja šaddet oktasaš máhttun. Eadni oahpaha nieiddas goarrut čikjanuvttöhiid. Eadni lea dan oahppan fas su iežas eatnis. Ovdal go goarruba, de leaba válđan bohccos ávdnasiid ja dikšon daid goarrun láhkái. Oahpahettiin eadni lea čilgen nieidasis manne son goarru ná, iige eará láhkái. Son muičala, ahte sin bearrašis, sogas, siiddas, ii leat dáhpin goarrut omd. guhkesjunat nuvttohiid. Eadni namuha gean dahje geaid sogain lávejít nu dahkat. Go gápmagat leat gárvásat, de nieida čijada daiguin ja vuolgá beassážiid áigge heajaide. Doppe son deaivá eará nuoraid. Oaidná guhkesjunat nuvttohiid, muičala maid su eadni lea muičalan. Heajain son deaivá nieidda, gii gullá seamma orohahkii go son ieš. Soai ságastallaba čijaid birra, mo leaba gorron, seammás go guktot oaidniba iežaska ja earáid čijaid. Soai leaba ovttaoaivilis dasa, ahte sudno nuvttohat leat fiidnámusat, muhto soai fuobmába maiddái ahte muhtumiin earáin leat erenoamáš čáppa hearvat maid soai ge sáhtášeigga geavahit iežaska nuvttohiidda.

Nieiddaguoktá ságastallama sáhttá oaidnit máhttun mii sirdašuvvá, ii dušše bearraša siskkobealde, muhto go čijat geavahuvvojít servvoštallamiid oktavuođas de máhtut viidánit. Sáhttá maiddái dás imaštallat ahte lea go dákkár máhtus stuorát bisuheapmi go máhtus, mii livččii oahpahuvvon muhtun ásahusas ja man mielde buot livččii dahkkojuvvon ovttá láhkái? Lea go justa dat girjáivuohta nugo omd. nuvttohat mat sáhttet gorrojuvvot máŋgga láhkái, mii doalaha sihke máhtu ja hutkáivuođa badjin?

Máhtu aktiivvalaš sirdin

Odðaaígásaš mohtorfievrrut dagahit ahte mánain ii gártta šat seamma lagasvuoha ja johtolagaide, eatnamiidda, váriide ja čáziide go ovdalaš áigge mánain. Einar Bergland (2005) čálláge, ahte go olmmoš joðánit vánndarda luonddus, de sus lea unnán vejolašvuoha háhkut luonddus máhtuid ja govahallat čatnosiid. Nanu teknihka geažil olbmot eai šiehtadala duovdagiin ja dálkkiin seammaláhkái go boarrásut boazosápmelačcat dahke dalle go johte herggiiguin, vázze dahje čuige. (Bergland 2005: 152.)

Jens Ivar Nergård (1994) maiddái oaivvilda, ahte go mánát ja nuorat leat eret boazodoalus, de ovddeš ásahuvvon máhttua eatnamiid, guohtuma ja ealu lihka-deami birra jávká boazodoallobirrasis siivvožit, muhto vissásit. Dadistaga bohtet odða buolvvat boazodollui geat eai hálldaš dán máhtu. Boazodoallu lea eallin-vuohki, mas lea sierra mágtoárbevierru, nu ahte dat gii galgá boazodoalus birget ii sáhte beare riegádit dasa. Dat gáibiduvvo maiddái ahte olmmoš bajássaddá dohko. Geahčastat, gullu ja giehtačárvát hárjehallojuvvojít árrat, nu ahte boazodoalli sáhttá doaimmahit buot boazodoallobargguid. (Nergård 1994: 79.)

Odne lea deháleabbo go goassige ovdal ahte máhtut sirdojuvvojít dihtomielalačcat. Muhto deháleamos lea, ahte mánát besset oassálastit boazodoallobargguin. Dalle boazodoallu ii boađe dan dillái maid Nergård einnosta, ahte máhtut jávket jus mánát ja nuorat eai oassálastte bargguin aktiivvalačcat. Nugo sihke Bergland ja Nergård oaivvildeaba, de odða teknologiija ja mánáid unnit oassálastin boazodoalu beaivválaš bargguin hehtte ovddeš máhttosirdinvuogi. Lea danne dehálaš giddet stuorát fuomášumi odða oahpahanvugiide. Odða teknologiija ii dárbaš buot áiggiid aivve jávkadahttit máhtuid, muhto dan bokte sáhttá maiddái ealáskahttit máhtuid. Odne lea GPS⁴ dovddus boazodoalus. Das lea návigerema vuogádat, mii čájeha guovlluid kártaid, mat leat veahkkin olbmo dájdadeapmá. Leat diedusge vuostebealit das maiddái, nugo ahte olmmoš sáhttá beare álkít luohhttit teknologiiji, ja jus dat ii doaimma soames áigge, de čuožžilit váttisvuodat. Muhto leat das maiddái buorit bealit mat sáhttet leat veahkkin máhtuid seaillu-heamis. Go GPS sáhttá čájehit guovllu johtolagaid namaid, de sáhttá dat doaibmat maiddái ávkin máhttobisuheami oktavuoðas.

Manne seailluhit máhtu?

Máhttoseailluheami ulbmilin lea máhtuid bisuhit, ee. dan sivas go máhtuin lea ekologalaš ávki. Árbevirolaš máhtut, nugo boazodoalus, sistisdollet maiddái sosiála máhtuid, nugo omd. gulahallančehppodaga. Gulahallan lea maid birgema eaktun. Boazodoallu lea ealáhus mii gáibida máhtuid das mo earáid vuostá láhttet.

⁴ The Global Positioning System.

Jus buohtastahtá omd. byrokráhtalaš ásahusaiguin, de lea dieđusge dehálaš maiddái doppe gulahallat bargoguimmiiguin. Muhto bargu ii bisán jus buot áiggiid ii gulahala, go bargu lea dávjá juhkkojuvvon sierra osiide. Juohkehaš bargá iežas barggu, ja ii dárbaš buot áiggiid čuovvot mielde maid earát dahket, dattetge áššít čovdojuvvoyit go ovta olbmo bargu lea čadnon viidát vuogádahkii. Nu ii leat boazodoalus go doppe ferte olmmoš gulahallat vuostazettiin siidda olbmuiguin ja kránnjáisiidaiguin jus galgá lihkostuvvat dahjeba sáhttít ge doaimmahit boazodoalu.

Nils Oskal (2000) čuoččuha boazosámiid diehtit ahte olbmo ceavzin boazodoalus lea dan duohken man bures son gulahallá earáiguin. Vuoggalaš-vuodain oaivvilduvvo ahte olmmoš gulahallá earáiguin, muhto olmmoš ferte gulahallat maiddái guovlluiguin, guohtumiiguin, johtolagain, guottetbáikkiiguin ja buot sajiiguin mat sáhttet oidnojuvvot bohccuid ruoktun. (Oskal 2000: 178.)

Boazodoallomáhtu seailluheami eavttut boahtteáiggis

Boazodoalus, sámi skuvllain ja sámi servodagas muđui berre árbevirolaš boazodoallomáhttu boahtit eanet oidnosi. Boazodoallomáhtu árvvu ja dan seailluheami ferte vuos álggos oaččuhit almmolaš ságastallama dássái. Ii sáhte vuordit ahte máhttu otná dilis fievrriduvvo almmatge aktiivvalaš doaimma haga, ja danne ferte máhttofievrrideami problematička loktet almmolaš ságastallama dássái. Vaikke boazodoallu bisuhuvvo mealgat muddui ovddeš struktuvrraid, nugo omd. guođoheami, johtima, ávnasteami ja duddjoma vuodul, de leat doaimmat boazodoalu servodaga olggobéalde mat sihke bákkus ja maiddái eaktodáhtolaččat doalvvuhit mánáid eret árbevirolaš oahpuin. Skuvla lea dat ásahus masa maiddái boazosámi mánát eanemusat golahit áiggiset ja nu maiddái fertejít dahkat.

Skuvla ja báikedoalut leat guovddáš ásahusat go boazodoallomáhtuid fievrrideamis lea sáhka. Báikedoalut dihtet makkár oahpu mánát dárbašit boazodoalus, maid skuvla ii sáhte diehtit. Dattetge lea skuvla maiddái geatnegahhton mánáide addit oahpu árbevirolaš máhtus, nugo boahtá ovdan Sámi oahppoplánain. Go skuvllain ii leat dasa gelbbolašvuhta, iige skuvla oba sáhtáše ge oahpahit árbevirolaš vuogi mielde go dasa gáibiduvvo áibbas earálágán oahpahanvuohki, de báikedoalut galggašedje válđojuvvot mielde oahpahussii. Go skuvllas ja boazodoalus leat guovtelágán oahpahanvuogit, de daid erohusaid ferte válđit vuhtii oahpaheamis. Danne ii berre sáme- dahje stuorraservodat duvdit buot árbevirolaš máhttofievrrideami ságastallama skuvlaásahussii. Ságastallan ferte maiddái leat olles sámeservodagas, ja erenoamážit boazodoalu siskkobéalde.

Go báikedoalut ožđot seamma árvvu go skuvllat máhttofievrrideami okta-vuodas, de ii berre skuvla leat dat ásahus mii bidjá vuodu boazodoallomáhtuid oahpaheapmái. Báikedoalut dovdet buoremusat mii galgá oahpahuvvot ja goas. Sii

dihtet ja dovdet mánáid máhttováilevašvuodžaid, ja nu sáhttet ge oahpahit dan vuodžul. Árbevirolaš oahpaheami dovdomearka lea ge ahte dilálašvuodžat, eai ge ovddalgihtii ráhkaduvvon plánat, bidjet vuodžu oahpaheapmái. Jus árbevirolaš máhtu ja dan oahpaheami váldá duođas, de ferte dasa ráhkkanit eará láhkái go čavga plánaid ja áigerámmaid vuodžul. Ráhkkanapmi sáhttá leat bargguid vuodžul. Boazodoalus leat vissis barggut mat galget dahkkot, ja ráhkkanapmi sáhttá dahkkot daid vuodžul. Skuvla sáhtášii dasto iežas plánaide váldit mielde maid mánát galget oahppat geavatlaš bargguid oktavuođas. Nu šattašii skuvla geahččalit váldit vuhtii boazodoalu oahpaheami ja atnit das ávkki, dan sadjái go odne dávjá gullo, ahte váhnemar fertejit oahpahit maiddái skuvlabargguid go mánát leat skuvllas eret oassálastimin ealáhusbargguin. Boazodoalu árbevirolaš máhttu, nugo eará árbevirolaš máhtut eai adno árvvusin ovdal go sámi servodat ieš duostá luvvet boazodoalu oahpaheami eret skuvllain ja addit oahpu árbevirolaš vuogi mielde. Árbevirolaš vuogi mielde sáhttá oahpaheapmi lihkostuvvat buorebut go skuvlanjain. Olmmoš muitá buoremusat go ieš lea doppe gos máhttu lunddolaččat lea. Go dalle son beassá sihke oaidnit, gullat, dovdat ja geahččalit bargat, ja geavahit buot dovdagiid.

7 Loahppasánit

Boazodoallu lea eallinvuohki mas dávjá olles bearáš oassálastá. Máhtut bisuhuvvojít nu guhká go boazodoallu lea doaimmas, ja mánát besset leat ieža mielde oassálastimin doaimmain. Gitta 1900-logu gaskkamuddui lei dábálaš ahte mánát ohppé lunddolaččat go johte vähnemiid mielde, ja oassálaste maiddái beaivválaš bargguin. Odne lea dilli earálágán go eanemus áigi manná skuvlavázzimii, ja mánain leat maiddái ollu astoágiggefálaldagat.

Čállosa válđogažaldat lea leamaš guorahallat mo máhttofievrrideapmi odne dáhpáhuvvá boazodoalus go mánáid lunddolaš oahpaheapmi johtima ja beaivválaš bargguid bokte boazodoalus lea unnon, maŋjá go 9-jagi skuvlla ásahuvvui 1960-loguin mii dál lea šaddan 10-jagi skuvlan. Máhtut maid mánát ovdal ohppé boazodoalus, leat dattetge seamma dehálaččat odne go dalle ledje. Čilgehussan dasa lea ahte boazodoalu iežas ásahusat nugo báike- ja siidoallu bisuhuvvojít. Go organiserenmálle bisuhuvvo, de bisuhuvvojít maiddái dávjá seamma barggutge.

Boazodoalus leat leamaš iešguđetlágán heiveheamit. Nuorta-Finnmárkkus lea bearrašiin leamaš boazodoalu lassin šibitdállu, maid nissonolbmot fuolahedje. Guovdageainnus ja osiin Kárášjogas lea leamaš nomádalaš boazodoallu, mas olles bearáš jođii siidda mielde. Guovdageainnus ain bohče áldduid 1960-logus, mii lei nissonolbmuid doaibma. Go bohčin heittihuvvui, de unnui maiddái dárbu nissonolbmuide. Dattetge ii leat mihkigie mii čujuha dasa, ahte bohčima heittiheapmi lei válđosivvan dasa go nissonolbmot heite johtimis, go ollu nissonolbmot jotke johtit maŋjá go bohčin nogai.

Sámi boazodoalus lea sihke isida ja eamida bearáš leamaš dehálaš go bargo-oktavuođat galge ásahuvvot. Náittosguimmežat sáhtte ásahit báikedoalu isida siidii dahje eamida bearraša siidii. Boazodoalu sosiála struktuvrrat leat dávgasat ja dat rivdet. Muhto otná lábat sáhttet hehttet náittosguimmežiid ásaheamis báikedoalu eamida siidii, go boazodoalloláhka gáibida ahte dan siiddas masa lea ásaheamen lea juo ovdalis sierra doallu. Go diehtá man unnán nissonolbmuin leat doalut ja dasa lassin lea maiddái alla ahki dain geain lea doallu, de lea odne unnán jáhkehahtti ahte náittosguimmežat ásahit báikedoalu nissonolbmo bearraša siidii.

Rievdadusat servodagas nugo guhkiduvvon skuvlavázzin ja ahte boazosámít ássagohte čoahkkebáikkiide, guhkidiili gaskka siidii. Máhttofievrrideapmi mánáide ii dáhpáhuva šat seamma lunddolaččat beaivválaš bargguid bokte. Dattetge leat máhtut seamma dehálaččat dál go ovdal dan sivas go organiserenmálle, barggut ja bargguid čoavdin dáhpáhuvvá sullii seammaláhkái go ovdal. Odne leat nissonolbmot boazodoallobearrašiin eanemusat mánáiguin ovttas, ja muhtumat sis maiddái oahpahit mánáide báikedoalu bargguid nugo ávnnaasdikšuma ja duoji.

Nissonolbmot maiddái váldet mánáid mielde siidii, dahje ráhkkanahttet sin vuolgit ealu lusa.

Boazodoallomáhtu dovdomearkkat

Máhttofievrrideapmi lea oassi sosialiseremis boazodollui. Mánát leat ieža aktiivvalaččat mielde hábmemin iežaset dilálašvuoda. Servodaga struktuvrrat sáhttet dattetge leat hehtehussan aktiivvalaš hábmemii. Hehttehusat sáhttet leat nugo skuvla ja eará doaimmat mat leat mielde váikkuheamen dan guvlui ahte mánát eai leat mielde boazodoalu bargguin. Boazodoallomáhttu lea geavatlaš máhttu, ja eanaš oassi oahppamis dakkko bargguid, muitalusaid, dárkumiid ja olbmo iežas vásáhusaid bokte. Máhttu lea maiddái árbevirolaš dainna mearkkašumiin ahte dat sirdašuvvá buolvvas bulvii. Eamiálbmoga organisašuvnnat leat geažuhan, ahte ii leat ahki mii lea deháleamos go lea sáhka árbevirolaš máhtus, muhto lea máhtu hákhan ja dan geavaheapmi mat leat dehálaččat. Boazodoallomáhtu dovdomearkkat leat nanu čanasteamit dilálašvuodaide ja kontekstii, ja danne leage váttis dahkat mearrádusaid čävga njuolggadusaid vuodul. Nuppiid sániiguin daddjon, de lea dilálašvuohta mii bidjá vuodú mearrádusaide.

Ollusat geat leat dutkan sámi mánáid sosialiserema leat čujuhan iešguđetgelágán oahpahanmálle dovdomearkkaide ja erenoamážit deattuhan oahpahanmálliide mat eai njuolgut muital mánái maid galgá dahkat. Seamma oahpahanmálle lea maiddái oidnosis odne, vaikke váhnemat odne eanet go ovdal dárbbaašit movttiidahttit mánáid bargat, go dál mánát gessojit maiddái ollu eará asttuáiggefálaldagaide. Boazodoalu sosialiseren dakkko maiddái muitalusaid bokte. Muitalusat leat dávjá čadnon dihto guovlluide, ja leat maiddái dihto ja dávjá oahpes olbmot geat leat vásihan dáhpáhusaid man birra muitaluvvo. Guovlluin dasto leat dieđut ja máhtut. Go mánáid sosialiseren omd. geasseorohagaide dáhpáhuvvá maiddái muitalusaid bokte, de guovllut ealáskahattojuvvvoj. Dávjá sistisdotlet muitalusat maiddái vuoinjalaš dieđuid, ja nu muitalusat doibmet rávan mo olmmoš galgá láhttet go vánddarda luonddus dahje doaibmá eará olbmuid searvis. Mánáid eallináddejupmi hábmejuvvo dáinna lágiin maiddái muitalusaid bokte.

Mánát válndojuvvojít árat mielde dohko gos barggut dakkkojuvvojít, nu ahte galget fuomáshit sihke elliid ja mearkkaid luonddus. Mánát ohppet go ollesolbmot čujuhit dilálašvuodaide, mat sáhttet leat eatnamat, bohccot ja duovdaga mearkkat. Ilbmudusa masa čujuhuvvo, váldahallá maiddái sániiguin. Giela haga ii bálljo birge jus galgá gulahallat earáiguin. Dađi mielde go mánát leat oahppan gulahallat almmáge ollesolbmuid čujuhemiid haga, de sáhttet maiddái gulahallat earáiguin nu ahte eai dárbbaaš leat lahka dahje oaidnit dan man birra ságastallojuvvo. Dattetge lea váttis oahppat giela jus máná ii beasa ieš oaidnit, dovdat ja guoskkahit dan mii namahuvvo. Sámegielas lea rikkis ja dárkilis sátnehivvodat duovdagiid, váriid, muohttaga, siivvu ja bohcco namahusaid hárrái.

Mánáid oahpaheamis deattuhuvvo, ahte mánát galget ieža beassat vásihit guovlluid, oahppat dain ja dovdat gullevašvuoda guovlluide. Leat guokte doah-paga maid mánát boazodoalus vuosttažettiin fertejít hálddašit. Doahpagat leat *dovdat ja deaivat*. Mánát galget omd. oahppat dovdat geainnuid, maiddái dalle go leat amas guovlluin. Goappašat doahpagat eaktudit ahte mánát ieža leat aktiiv-valaččat oassálastimin, jus galget hálddašit dovdama ja deaivama. Mánná ii hálddaš dovdama ja deaivama earáid muitaleami bokte, nugo ahte mo galgá vánndardit iešguđetlágán eatnamiin ja heajos dálkin. Mánná ferte ieš beassat vásihit ja dan dakhá dalle go lea guovlluin, ja easkka dalle oahppá vánndardit okto duovdagis. Nu mánát biddjojit dilálašvuodaide main galget nákcer čoavdit hástalusaid okto. Mánát galget oahppat dovdat bohccو mearkkaid, guovlluid ja bohccو luondu. Sii galget oahppat dovdat goas boazu johttá, ja dovdat bohccو miela iešguđetge dálkiid oktavuođas.

Mánát galget sáhttit vánndardit vaikke eai leat ovdal leamaš justa seamma guovllus. Diekkár máhtuide eai leat čielga njuolggadusat mo čuolmmaid čoavdá. Leat dilálašvuodat ja konteaksta mat bidjet rámmaid dasa makkár čoavddus válljejuvvo. Dákkár máhttu spiekasta čuolbmačoavdimis skuvllain, gos čuolmmat dávjá čovdojuvvoyit čielga njuolggadusaid vuodul. Čuolbmačoavdin skuvllas ii leat čadnon kontekstii, mii mielddisbuktá ahte olmmoš gii áigu čoavdit čuolmma sáhttá leat guhkkin eret dan dilálašvuodas gos hástalus dahje váttisvuhta lea. Skuvlaohpus gávdna maiddái dávjá vástádusa gažaldagaide čoavddagirjjis. Veahkkeneavvu mii dárbbašuvvo čoavdit váttisvuodaide boazodoalus, oažju olmmoš go oassálastá dilálašvuodain. Čoavddus gávdnoge dilálašvuodas, muhto eaktu lea ahte olbmox leat vásáhusat, árvvoštallanattádat ja čehppodat dakhak heivvolaš mearrádusaid juohke dilálašvuodas. Seammás go oahppá dallego ieš čoavdá čuolmmaid, de oahppá maiddái bohccuin. Oahppan dakhko go mánát fertejít doahthalit bohccو, nugo omd. ahte bohccot sáhttet bieđganit jus olmmoš ii leat astan vuordit dassázii go eallu lea áibbas bisánan ovdal go guođđela ealu.

Máhtu mearkkasupmi

Árbevirolaš máhtut leat oažžugoahztán beroštumi almmolaš oktavuođain. Boazodoallomáhttu maiddái adnojuvvo árvvusin, ee. dan dihtii go dasa lea dárbu biras-gáhttema dáfus. Jearaldat lea mo servodat áigu váldit vuhtii máhtu ja sihkkarastit ahte dat fievrividuvvo viidásut, go odne ii sáhte šat dáhkikit ahte máhtut háhkkojuvvojít beaivválaš bargguid oktavuođas nugo lei dábálaš 40 lagi dás ovdal.

Vaikke nissonolbmuin boazodoalus leat leamaš iešguđetlágán heiveheamit ja sii leat maiddái dat joavku masa rievadusat leat čuohcan garrasepmosít, de dat ii mearkkas ahte sis eai leat boazodoallomáhtut. Go nissonolbmot sirdet isida siidi manjá go náitalit, de čuvvot ollu máhtut sin mielde. Ođđa siiddas ohpet nissonolbmot dovdat maiddái ođđa guovlluid ja sosiálalaš dilálašvuodaide. Sii sáhttet

buohtastahttit ja oaidnit erohusaid sin mánnávuoden siidda ja dan odđa siidda gaskka masa ásaiduvvet. Go oahpahit mánáid, de sáhttet oaidnit vuostálasvuoden iežaset mánnávuoden siidi, ja nu maiddái viidu máhttovuodđu. Seammás lea maiddái čielggas ahte ovddeš áigge nissonolbmuid ektui geat bohče áldduid ja guodohedje bohccuid, de otná nissonolbmuin eai leat šat seamma ollu máhtut bohccuid ja eatnamiid hárrai, go ollu boazodoallomáhtut leat geavaheami duohken. Jus olbmot eai geavat dahje bargga duovdagiin, de jávkagoahtá maiddái máhttu.

Vuogit mo máhttofievrrideapmi dáhpáhuvvá boazodoalus, leat májgga dáfus earálágánat go dábálaš oahpaheamis mii lea skuvllain. Boazodoalu máhttofievrrideamis lea holistalašvuhta vuodđun, mii máksá ahte oahpaheapmi ii leat juhkkojuvvon fágaide. Go mánná omd. oahppá čuohppat gámasuinniid, de oahppá maiddái goas jagis lea buoremus čuohppat, maid galgá ernoamázit geahčcat gávdnan dihtii šattolaš suoidneeatnamiid, oahppá guovluid báikenamaid, guovllu historjjá, olbmuid birra geat leat ovdal geavahan guovllu ja nu ain. Ollu oahpaheamis lea čadnon mánáid iežaset beroštumiide, muhto sii maiddái movttiidahttojuvvojit oassálastit bargguin. Movttiideapmi sáhttá leat omd. go mánnái mualuvvo, ahte bargu maid son dakhá boahatá alcceesis ávkin.

Go boazodoallomáhttu lea oassin árbevirolaš máhtus, de lea váttis govalhallat, ahte skuvla okto sáhttá gokčat dan oahpahusa mii lea báike- ja siidadoalus. Máhttu lea daid olbmuin geat beaivválačcat leat boazodoalus, ja nu maiddái dihtet buoremusat makkár máhttui lea dárbu jus galgá hálldašit boazodoalu. Árbevirolaš máhttu rievdá áiggiid čađa, ja danne sáhttá olbmuide geat eai leat boazodoalus čađat, leat váttis oðasmahttit máhtuideaset. Boahtteáiggi hástalus lea gávdnat čovdosiid dasa mo boazodoallomáhtu sáhttá áimmahušsat.

Mánát leat eanaš áigge skuvllas, ja danne lea lunddolaš ahte boazodoallu ovttas skuvllain gávnnašii čovdosiid dasa mo máhttofievrrideapmi sáhttá sihkkarastot boahtteáiggis. Go skuvllat álget čakčat, de leat maiddái seammás ollu doaimmat boazodoalus. Dán áigge omd. čohkkejtit ealu ja njuovadit gávpęčcoragiid, muhto eanaš mánát šaddet sirdit ovttas etniiguin siseatnamiidda skuvlavázzima geažil. Vaikke leat májgga sajis skuvllat riddoguovlluin gos ealut leat go skuvllat álget čakčat, de sáhttá leat váttis mánáide vázzit doppe go skuvllat eai leat heivehuvvon sámegielat mánáide. Árbevirolaš máhtu gaskkusteami hárrai lea dehálaš geavahit dávggasvuoden. Skuvla lea ásahus mas leat čielga rámát ja áigeplánat, ja máhttofievrrideapmi boazodoalus lea fas lagi áiggi duohken. Dálki, siivvut ja guohtun mearridit goas ja gos bargu dakhko. Lea danne dehálaš ahte maiddái boazodoalu dárbbut váldojuvvojit vuhtii go oahppoplánat ráhkaduvvvojit.

Skuvla berrešii maiddái beroštit gávdnat čovdosiid dasa mo mánát buoremusat oahpašedje árbevirolaš máhtuid. Erenoamázit guoská dat skuvllaide mat čuvvot sámi oahppoplánaid, go sii leat geatnegahton oahpahit árbevirolaš máhtuid. Livčii danne lunddolaš ahte skuvla ja báikedoalut, gos mánát leat eanaš áigge, ovttas sáhtášedje gávdnat čovdosiid dasa mo máhtuid gaskkustit, ja nu

maiddái leat mielde sihkkarastimin ahte boazodoalu árbevirolaš máhtut fievrri-duvvojit viidáseappot.

Oahpahaneavttut boazodoalus leat rievdan, muhto lea liikkáge vejolaš-vuohta fievridit máhtuid boazodoalu mánáide. Erohus ovddežis otnážii lea ahte odne ferte ollu oahpaheami lágidit dihtomielalaččat plána mielde, go ii sáhte šat vuordit ahte mánáid oahpaheapmi boazodoalus dakkko seamma lunddolaččat go ovdal. Muhto jus mánáide ii láhčojuvvo dilálašvuhta oassálastit bargguin, de bohtet maiddái máhtut jávkat. Skuvla ovttas njunuš eiseválldiiguin sáhttet dattetge láhčit dilálašvuodža dainnalágiin ahte mánát besset oassálastit boazodoalu bargguin. Bargu galggašii oažžut árvvu maiddái skuvlla ásahusas ja lohkkot oahppun seamma dásis go eará máhttu skuvllas. Go árbevirolaš máhttu bajiduvvo seamma dássái go skuvlamáhttu, de árvu maiddái loktana olles servodagas.

Gáldut

- Agrawal, Arun (1995) Dismantling the Divide Between Indigenous and Scientific Knowledge, *Development and Change Vol. 26*, s. 413–439. Oxford: Blackwell Publishers.
- Aikio, Aimo (2000) *Olbmo ovdáneapmi*. Kárásjohka: Davvi Girji OS.
- Amft, Andrea (2000) *Sápmi i förändringens tid. En studie av svenska samers levnadsvilkår under 1900-talet ur ett genus- och etnicitetsperspektiv*. Doktorsavhandling i samiska studier vid Umeå universitet.
- Andersen, Svanhild (2002) Innledning, *Samiske landskap og Agenda 21. Kultur, næring, miljøvern og demokrati*, Dieđut nr. 1, Svanhild Andersen (doaim.), s. 5–22. Guovdageaidnu: Sámi Instituhtta.
- Andresen, Astri (1991) *Omstillingstid. Nomadisk reindrift i Torne lappmark og Troms 1840–1920*. Institutt for samfunnsvitenskap, Universitetet i Tromsø.
- Balto, Asta (1997) *Sámi mánáidbjágsgeassin nuppástuvvá*. Oslo: Gyldendal.
- Basso, Keith H. (1996) *Wisdom sits in places. Landscape and language among the western apache*. New Mexico: University of New Mexico Press.
- Beach, Hugh (1981) *Reindeer-Herd Management in Transition. The Case of Tuorpon Saameby in Northern Sweden*. Doctoral thesis at Uppsala University.
- Beach, Hugh (1982) The Place of Women in the Modern Saameby. An Issue in Legal Anthropology, *Antropologisk forskning, Ymer '82*, Årgang 102, s. 127–142. Svenska Sällskapet för Antropologi och Geografi.
- Berger, Peter L. ja Luckmann, Thomas (1996) *Den samfundsskabte virkelighed. En videnssociologisk afhandling*. Viborg: Lindhardt og Ringhof.
- Bergland, Einar (2005) *Reindrift, omstilling og identitet*. Dieđut nr. 1, Avhandling til dr.philos.-graden. Guovdageaidnu: Sámi Instituhtta.
- Bergstrøm, Grete Gunn (2001) *Tradisjonell kunnskap og samisk modernitet. En studie av vilkår for tilegnelse av tradisjonell kunnskap i en moderne samisk samfunnkontekst*. Hovedoppgave i samfunnsvitenskap. Universitetet i Tromsø.
- Berkes, Fikret (1999) *Sacred Ecology, Traditional Ecological Knowledge and Resource Management*. Philadelphia: Taylor & Francis.
- Bjerkli, Bjørn (1999) Hva er tradisjon? Begrepsbruk, forståelse og rettighetsdebatt, *Norsk ressursforvaltning og samiske rettighetsforhold. Om statlig styring, allmenningens tragedie og lokale sedvaner i Sápmi*, Ivar Bjørklund (doaim.), s. 182–208. Oslo: Gyldendal.
- Bjørklund, Ivar (2004) Saami Pastoral Society in Northern Norway: The National Integration of an Indigenous Management system, *Cultivating Arctic Landscapes. Knowing and Managing Animals in the Circumpolar North*, David G. Anderson ja Mark Nuttall (doaim.), s. 124–135. New York: Berghahn Books.

- Boine, Else (2005) *Fra far til sønn – kjønnsperspektiv og sosial kompetanse i samisk sammenheng*. Hovedoppgave ved Institutt for sosialt arbeid og helsevitenskap, NTNU.
- Briggs, Jean (1992) Mazes of meaning: How a child and a culture create each other, *Interpretive approaches to children's socialisation*. New directions for child development, no. 58. William A. Corsaro ja Peggy J. Miller (doaim.), s. 25–49. San Francisco: Jossey Bass.
- Buljo, Karen Marie Eira (2002) Mu kultureanadagat, *Samiske landskap og Agenda 21. Kultur, næring, miljøvern og demokrati*, Diedut nr. 1, Svanhild Andersen (doaim.), s. 136–155. Guovdageaidnu: Sámi Instituhtta.
- Bye, Lilian (1939) *Finner i Finnmark*. Oslo: Aschehoug.
- Collinder, Björn (1932) *Lapparna. Deras kultur och arbeidsliv*. Stockholm: Albert Bonniers forlag.
- Connerton, Paul (1989) *How societies remember*. Cambridge: University Press.
- Corsaro, William A. (1997) *The sociology of childhood*. London: Pine forge press.
- Dei, George J. Sefa, Hall, Budd L, ja Rosenberg, Dorothy Goldin (2000) Introduction, *Indigenous knowledges in global contexts. Multiple readings of our world*, George J. Sefa Dei, Budd L Hall, ja Dorothy Goldin Rosenberg, s. 3–17. Toronto: An OISE/UT in association with University of Toronto Press.
- Demant-Hatt, Emilie (1913) *Med Lapperne i Høffeldet*. Stockholm: Nordiska Bokhandel.
- von Düben, Gustaf (1977) [1873] *Om Lappland och Lapparne, företrädesvis de svenska*. Stockholm: Gidlunds.
- Eikjok, Jorunn (1989) *Kvinner og menn mellom to verdener. Samisk kvinne- og mannsidentitet i endring*. Hovedoppgave i samfunnsvitenskap, Universitetet i Tromsø.
- Eikjok, Jorunn (1990) Kvinner og menn mellom to verdener. Samisk kvinne- og mannsidentitet i endring, *Samiske kvinner*, Ottar 2, s. 15–22. Populærvitenskapelig tidsskrift fra Tromsø Museum, Nr. 180.
- Eira, Elle Marit (2004) *Juolggis gihtii – giedas juolgái. Njuovvanproseassa väikkahuus gámasdujiide*. Duodjeváldofága Sámi allaskuvillas, Guovdageainnus.
- Eira, Nils Isak (1994) Sápmelaš boazodoallu, *Bohccuid luhtte*, Nils Isak Eira (doaim.), s. 8–23. Guovdageaidnu: DAT.
- Elgström, Ossian (1922) *Karesuando Lapparna. Etnografisk skisser från Königämä och Lainiovuoma 1916–1919*. Stockholm: Åhlén & Åkerlunds förlags.
- Enoksen, Ragnhild (1998) Kunnskapstradisjoner i reindrifta – den uformelle kunnskapen, vedlegg 8, *Kunnskap og kompetanse i indre Finnmark. Bakgrunn, behov og tiltak*, Diedut nr. 5, Einar Bergland (doaim.), s. 436–476. Guovdageaidnu: Sámi Instituhtta.

- Finnmárkku fylkkagielda (1994) *Sámenissoiid eallindilli/Samiske kvinners livsvilkår*. Konferanssa ráporta. SAS Kárásjoga hoteallas 8. ja 9. b. njukčamánuus 1994.
- Gaup, Káren Elle (2005) *Silisávži. Landskap, opplevelser og fortellinger i et samisk-norsk område i Finnmark*, Dieđut nr. 2. Guovdageaidnu: Sámi Instituhtta.
- Guttorm, Gunvor (1996) *Ávkkástallat eallilan duojáriid čehppodaga skuvllas*. SA-raporta nr. 2. Guovdageaidnu: Sámi allaskuvla.
- Guttorm, Gunvor (2001) *Duoji bálgat – en studie i duodji. Kunsthåndverk som visuell erfaring hos et urfolk*. Avahandling til dr.art.-graden. Det humanistiske fakultet, Institutt for kunsthistorie, Universitetet i Tromsø.
- Henriksen, Georg (1994) Det sirkumpolare området, *Fjern og nær. Sosial-antropologiske perspektiver på verdens samfunn og kulturer*, Signe Howell ja Marit Melhus (doaim.), s. 197–216. Oslo: Gyldendal.
- Henriksen, Tore (2002) Miljøvern og urfolks tradisjonelle kunnskap. To sider av samme sak?, *Samiske landskap og Agenda 21. Kultur, næring, miljøvern og demokrati*, Dieđut nr. 1, Svanhild Andersen (doaim.), s. 171–187. Guovdageaidnu: Sámi Instituhtta.
- Hirvonen, Vuokko (1998) *Sámeeatnama jienat. Sápmelaš nissonolbmo bálggis girječállin*. Guovdageaidnu: Vuokko Hirvonen & DAT O.S.
- Hirvonen, Vuokko (2003) *Mo sámáidahtit skuvlla? Reforpma 97 evalueren*. Kárásjohka: ČálliidLágádus.
- Hoëm, Anton (1976a) *Makt og kunnskap*. Oslo: Universitetsforlaget.
- Hoëm, Anton (1976b) *Yrkessfelle, sambygding, same eller norsk*. Oslo: Universitetsforlaget.
- Ingold, Tim (2000a) The temporality of the landscape, *The perception of the environment. Essays in livelihood, dwelling and skill*, s. 189–208. London: Routledge.
- Ingold, Tim (2000b) Culture, nature, environment. *The perception of the environment. Essays in livelihood, dwelling and skill*, s. 13–26. London: Routledge.
- Ingold, Tim (2003) There is one: How an ecological approach can obviate the distinctions between body, mind and culture. *Imagining nature. Practices of cosmology and identity*, Andreas Roepstorff, Nils Bubandt ja Kalevi Kull (doaim.), s. 40–55. Aarhus university press.
- Jefimenko, A. I.: (1878) *Juridičeskie obyčai loparej*. Zapiski Imperatorskoqo Russkogo Geografičeskogo obščestva po otdeleniju etnografii 8. St. Petersburg.
- Jernsletten, Jorunn (2000) *Dovletje jirreden. Kontekstuell verdiformidling i et sør-samisk miljø*. Hovedfagsoppgave i religionsvitenskap. Institutt for Religionsvitenskap, Universitetet i Tromsø.
- Jernsletten, Nils (1997) Sami Traditional Terminology: Professional Terms Concerning Salmon, Reindeer and Snow, *Sami Culture in a New Era. The*

- Norwegian Sami Experience*, Harald Gaski (doaim.), s. 86–108. Kárášjohka: Davvi Girji OS.
- Joks, Solveig (2000) *Tradisjonelle kunnskaper i bevegelse. Om kontinuiteten i reindriftas praksiser*. Hovedoppgave i sosialantropologi. Institutt for sosialantropologi, det samfunnsvitenskapelige fakultet. Universitetet i Tromsø.
- Joks, Solveig (2001) *Boazosámi nissonolbmot, guovddážis báike- ja siidadoalus muhto vajálduvvon almmolaččat*, Dieđut nr. 5. Guovdageaidnu: Sámi Instituhtta.
- Joks, Solveig (2005) Boazodoalu nissonolbmot – oaidnemeahttun geađgejuolgi, *Sámi diedalaš áigečála, 01*, Johanna Ijäs, Mákká Regnor ja Nils Oskal (doaim.), s. 39–56. Guovdageaidnu - Romsa: Sámi allaskuvla, Sámi Instituhtta, Romssa universitehta Sámi dutkamiid guovddáš.
- Kalland, Arne (2000) Indigenous knowledge: Prospects and limitations, *Indigenous Environmental Knowledge and its Transformations. Critical Anthropological Perspectives*, Roy Ellen, Peter Parkes ja Alan Bicker (doaim.), s. 319–331. Australia: harwood academic publishers.
- Karlsen, James (2004) *Evaluering av kvinnerettede tiltak i reindriftsnæringen*, Prosjektrapport nr. 36. Kristiansand: Agderforskning.
- Karlstad, Stig et.al. (2002) *Kvinner i reindrifta*, Samarbeidsrapport NIBR/Norut Samfunn. Oslo: NIBR.
- Komissar, Mariann, Møystad, Mari ja Rognlie, Kate (1987) *Kvinnens stilling i reindriftsnæringen. "Har det norske samfunnets lov- og regelverk påført reindriftskvinnene likestillingsproblemer i nyere tid?"* Prosjektarbeid for Kommunal- og Arbeidsdepartementet. Oslo: Rådet for Arbeidslivsstudier, Universitetet i Oslo.
- Kramvig, Britt (1999) I kategorienes vold, *Samer og nordmenn*, Harald Eidheim (doam.), s. 117–140. Oslo: Cappelen akademisk forlag.
- Landbruks- og matdepartementet (2004) Rapport fra arbeidsgruppe – *Kvinnenes situasjon i reindriften/Nissonolbmuid dildálašvuohta boazodoalus*.
- Mjaatvedt, Svein (1988) Sosialiseringselementer i samiske barns oppvekstvilkår, *Dugnad*. Tidsskrift for etnologi 2-3. Sosialisering, 47–61.
- Nergård, Jens-Ivar (1994) *Det skjulte Nord-Norge*. Oslo: Gyldendal.
- Nergård, Jens-Ivar (1997) De samiske grunnfortellingene. En kulturpsykologisk skisse, *Filosofi i et nordlig landskap, Jakob Meløe 70 år*. Ravnetrykk nr. 12. Anniken Greve ja Sigmund Nesset (doaim.), s. 68–80. Tromsø: Universitetsbiblioteket i Tromsø.
- Nergård, Jens-Ivar (2006) *Den levende erfaring. En studie i samisk kunnskapstradisjon*. Oslo: Cappelen akademisk forlag.
- Nilsen, Ragnar ja Mosli, Jens Halvdan (1994) *Inn fra vidda. Hushold og økonomisk tilpasning i Guovdageaidnu 1960-1993*. Guovdageaidnu: Bajos.
- Nystad, Inger Marie Kristine (2003) *Mannen mellom myte og modernitet*. Nesbru: Vett & Viten.

- Oskal, Nils (2000) On nature and reindeer luck, *Rangifer, Research, Management and Husbandry of Reindeer and other Northern Ungulates*. No. 2-3.-Vol. XX, s. 175–180. Tromsø: Nordisk Organ for Reinforskning (NOR).
- Oskal, Nils ja Sara, Mikkel Nils (2001) Reindriftssamiske sedvane og rettsoppfatninger om land. *Reindriften i Finnmark. Rettshistorie 1852 – 1960*, Kirsti Strøm Bull, Nils Oskal ja Mikkel Nils Sara (doaim.), s. 280–334. Oslo: Cappelen Akademisk forlag.
- Paine, Robert (1994) *Herds of the tundra. A portrait of Saami reindeer pastoralism*. Washington: Smithsonian Institution Press.
- Pehrson, Robert N. (1957) *The bilateral network of social relations in Könkämä lapp district*. Indiana university publications slavic and east European series, volume 5. Bloomington: Indiana university.
- Pelto, Pertti J. (1962) *Individualism in Skolt Lapp Society*. Kansatieteellinen Arkisto 16. Suomen muinaismuistoyhdistys. Helsinki.
- Pogadaeva, Maria Petronova (1999) Confident about their own future, *Woman in an Northern Landscape*, Sylvia Inez Liljegren (doaim.), s. 85–88. Steigen: Forlaget Nora.
- Ravna, Øyvind (2002) *Kampen om tundraen. Nenetserne og deres historie*, Dieđut nr. 4. Guovdageaidnu: Sámi Instituhtta.
- Rolf, Bertil (1995) *Profession, Tradition och Tyst Kunskap*. Nora: Bokförlaget Nya Doxa.
- Rudie, Ingrid (1995) Livsløp som dimensjon i kulturell reproduksjon, *Norsk antropologisk tidsskrift 1*, s. 53–69. Oslo: Universitetsforlaget.
- Saijets, Maiju (2000) *Eadni, badjeolmmoš dahje duojár? Diskursaanalyhtalaš dutkamuš golmma badjenissona jearahallamiin*. Sámegiela ja –kultuvrro pro gradu bargu. Suoma ja sámegiela juogus Oulu universitehta.
- Sara, Anders ja Karlstad, Stig (1993) *Boazodoallu Oarje-Finnmárkkus – rievda-deapmi, ovdánahttin vai loahpaheapmi – Jearahallandutkamuš boazodoallo-álbmoga gaskkas Guovdageainnu suohkanis*, Dieđut nr. 3. Guovdageaidnu: Sámi Instituhtta/NIBR.
- Sara, Mikkel Nils (1994) Eatnamat, *Bohccuid luhtte*, Nils Isak Eira (doaim.), s. 26–53. Guovdageaidnu: DAT.
- Sara, Mikkel Nils (2001) *Boazu lea biekka buorri. Guovdageainnu guovllu boazodoallovuogit*. Kárášjohka: Davvi Girji.
- Sara, Mikkel Nils (2003a) Boazosápmelaččaid vuodđoárvvut. Muhtun váldoch-čujuhusat, Árvvut, Árvo, Vierhtie, Samiske verdier, Edel Hætta Eriksen (doaim.), s. 93–97. Kárášjohka: Davvi Girji.
- Sara, Mikkel Nils (2003b) Árbevirolaš sámi dieđut ja máhtut sámi vuodđo-skuvllas, *Sámi skuvla plánain ja praktikas. Mo dustet 097S hástalusaid? Reforpma 97*. Vuokko Hirvonen (doaim.), s. 121–138. Kárášjohka: ČálliidLágádus.
- Schøyen, Carl (1924) *I Sameland*. Kristiania: Gyldendalske Bokhandel.

- Sikku, Olov J & Torp, Eivind (2004) *Vargen är värst. Traditionell samisk kunskap om rovdjur*. Uddevalla: Jamtli förlag/Jämtlands läns museum.
- Smith, Linda Tuhiwai (1999) *Decolonizing Methodologies. Research and indigenous peoples*. London: Zed Books Ltd.
- Smith, P.L. (1938) *Kautokeino og Kautokeino-lappene. En historisk og ergologisk regionalstudie*. Instituttet for sammenlignende kulturforskning, Serie B XXXIV. Oslo: Aschehoug.
- Solem, Erik (1920) Retsopfatninger blandt finnene, *Kulturværdier hos Norges finner*, J. Otterbech (doaim.), s. 15–40. Kristiania: Aschehoug.
- Solem, Erik (1970) [1933] *Lappiske rettsstudier*. Oslo: Universitetsforlaget.
- Svensson, Tom G. (1985) *Asa Kitok och hennes döttrar. En studie om samisk rotslöjd*. Acta Lapponica 21. Nordiska Museet.
- Tuisku, Tuula (2001) The Displacement of Nenets Women from Reindeer Herding and the Tundra in the Nenets Autonomous Okrug, Northwestern Russia. *Acta Borealia* 2, s. 41–60.
- Turi, Johan (1987) [1910] *Muitalus sámiid birra*. Jokkmokk: Sámi Girjjit.
- Vorren, Ørnulf ja Manker, Ernst (1957) *Samekulturen en oversikt*. Tromsø museum.
- Zorgdrager, Nellejet (1997) *De rettferdiges strid. Kautokeino 1852*. Nesbru, Oslo: Vett & Viten i samarbeid med Norsk folkemuseums samiske samlinger.

Muđui gáldut

- Aftonbladet áviisa čakčamánu 21. b. 2005, jearahallan Maria Kråik.
- Máhte Máret – Marit Sara Eira lohkkid čálus Áššu áviissas, guovvamánu 3. b. 2004.
- Lov om reindrift av 1978.
- .

Čoahkkáigeassu

Girji guorahallá mo mánát odne ohppet árbevirolaš máhtuid boazodoalus go eai jođe šat siidda mielde seamma ollu go sullii 40 lagi áigi dahje go 9-jagi skuvla álggahuvvui. Guorahallan lea dahkkon Guovdageainnus, ja dasa lassin leat maiddái dieđut eará boazodoalloguovlluin.

Boazodoalu nissonolbmot leat odne guovddážis bajásgeassimin mánáid boazodollui go mánát leat eanaš áigge etniid luhtte skuvlaváccedettiin. Albmát leat dat geat dávjimusat leat siidadoalus. Ovddeš árbevirolaš siiddastallan mas olles beará jođii ovttas, lea nohkan, muhto boazodoalu iežas siskáladas organiseren lea dattetge bisuhuvvon mealgat muddui rievddakeahttá nugó siidadoalut ja báike-doalut. Seammás go organiserenmálle bisuhuvvo, de doaimmahuvvojít maiddái seamma barggut nugó guodoheapmi, gárddástallamat, bohccoávdnasiid dikšun ja dasa lassin duddjon. Organiserema ja bargguid mielde čuvvot máhtut, ja nu leage dárbbashaš daid fievrredit ođđa buolvvaide.

Boazodoalu heiveheamit leat leamaš iešguđetlágáнат iešguđetge guovlluin. Nuorta-Finnmárkkus omd. leat nissonolbmot leamaš smávvadálolaččat lassin boazodollui juo 1900-logu álgogeahčen. Guovdageainnus ja báikkuid Kárášjogas lea leamaš nomádaeallin mas olles beará lea johtán siidda mielde, gitta 1900-logu gaskkamuddui. 1960-logus huksegohte boazosámít dáluid čoahkkebáikkiide Guovdageainnus ja 9-jagi skuvla álggahuvvui. Mánát šadde eanaš áigge leat skuvllas, ja eatnit maiddái ássagohte čoahkkebáikkiide. Mánáid lunndolaš oahppan beaivválaš bargguid bokte unnni.

Mánát ohppet dávjá bargguid bokte daid guovlluin gos boazodoallu doaimmahuvvo. Eatnit boazodoalus leat guovddážis máhttofievrídeamis go mánát leat eanaš áigge sin luhtte báikedoaluin. Dávjá leat maiddái eatnit lágiideamen mánáid siidadollui. Boazodoalu siskkobealde leat iešguđetlágán máhtut go dilálašvuodat leat máŋgalágáнат. Suolohasain lea mearra maid rasttildit ja mii dagaha ahte sii dárbbashit earálágán máhtuid go omd. nannánorohagat. Boazodoallomáhttu lea máhttu maid dávjá ferte oahppat doppe gos doaibma lea, go dilálašvuodat gáibidit iešguđetlágán čovdosiid. Olmmoš vásihage dilálašvuodaid mat eai leat ovttaláganat, ja nu eai gávdnože čavga njuolggadusat álo dasa mo čoavdit čuolmmaid. Oahpaheapmi láhčcojuvvo nu ahte mánná beassá ieš vásihit dilálašvuodaid ja oahppat oaidnima bokte gávdnat čovdosiid. Boazodoalus leage dehálaš oahppat oaidnit, dovdat ja dádjadit. Seamma láhkái go mualusat ja diiddat eai leat njuolggosánálaččat, de maiddái oahppan dávjá dáhpáhuvvá geažideami bokte. Mualusat ja diiddat doibmet morálalaš neavvun mánáide, ja mualusaid bokte ealáskahattojuvvojít guovllut, ja olbmot geat leat mielde mualusain muittašuvvvojít. Boazodoalu giella lea mívssolaš go omd. okta sátni sáhttá sistisdoallat oalle dárkilis čilgehusa. Mánná oahppá buoremusat go lea

doppe gos barggut doaimmahuvvojtit. Sámegielas leatge ollu sánit mat gusket duovdagiidda ja main leat dárkilis čilgehusat nugo omd. bohcc ealiheamis ja johtolagas. Giella doaibmá maid gulahallamis, jus dan ii hálddaš de geanohuhtá dat gulahallama eará boazobargiigun.

Boazodoallomáhttu lea árbevirolaš máhttu, ja dan dovdomearka lea ee. ahte mánnggalágan máhtut sáhttet oahpahuvvot oktanaga. Vuoinjalaš máhttu omd. sáhttá oahpahuvvot geavatlaš bargguid olis. Nubbi dovdomearka lea ahte máhttu fievrriiduvvo doppe gos barggut doaimmahuvvojtit. Dát bealit dagahit ahte lea veajemeahttun fievrriidit boazodoalu ollislaš oahpaheami skuvlii. Boazodoallomáhtut leat dattetge dehálaččat doallevašvuoda geažil, ja servodat berrešii danne ságastallat mo máhtu seailluhit boahtteáiggis.

Summary

The book examines how children, at present, learn the traditional skills needed in reindeer herding, as they no longer follow the herd and the herders – the *siida* – in the same way as about forty years ago when the 9-year-long school – the comprehensive school – was launched. This research has been done in Guovdageaidnu (Kautokeino), but it also contains information from other reindeer-herding areas.

The women who are involved in reindeer husbandry play at present a central role in training children for reindeer herding, since the children mainly stay with their mothers when going to school. Men are the ones who mostly work with the reindeer. The former, traditional way of herding reindeer in which the whole family moved together is no longer practised, but the inner organization of reindeer husbandry, the system of *siidadoallu* and *báikedoallu*⁵ – is, to a great extent, unchanged. With an unchanged organization, the tasks, such as tending the reindeer, round-ups, taking care of all the material that the reindeer yields and making handicraft, also stay the same. The herding skills are learnt through organization and the performing of tasks, and they need to be passed down to new generations.

In different areas, there have been local variations of reindeer herding. In Eastern Finnmark, for example, women were, to some extent, engaged in farming in addition to reindeer herding as early as the beginning of the 1900s. In Guovdageaidnu and in some parts of Kárásjohka (Karasjok), reindeer herding was nomadic in nature and the whole family migrated with the herd until the mid-1900s. In the 1960s, reindeer-herding Sámi began building houses into the villages in Guovdageaidnu and the 9-year-long comprehensive school was launched. Children ended up in being most of the year at school, and mothers also began to settle in the population centres. Children no longer learnt as much in a natural way, by performing every-day tasks.

In reindeer-herding areas, it is typical for children to learn by doing. The mothers who are active in reindeer herding play an important role in passing down the skills to their children, as the children mostly live with them in the population centres. Often, the mothers also do all the preparations so that the children can go to the *siida* and engage in reindeer work.

Because of differences in herding conditions, the skills of the herders vary from place to place. Some herders cross parts of the sea when migrating with their

⁵ *Báikedoallu* refers to the performing of tasks meant to guarantee an independent existence. The household unit has to provide means for its own work and sustenance, while also having to meet work obligations within larger co-operative groups, which are called *siidas*.

herds to islands, and, therefore, they need different kinds of skills than the herders who stay on the mainland. The reindeer-herding knowledge consists of skills that one often needs to learn on the spot where the activities take place, as the conditions determine how to proceed. Indeed, conditions vary, and, therefore, it is not possible to decide in advance how to solve problems. Learning happens so that children are themselves involved in the different situations; thus, they learn, through experience, to find solutions. Indeed, it is important in reindeer herding to learn to see, know, cope and find one's way. In the same way as narratives and beliefs tell nothing explicitly, learning also happens often through tips and hints. Stories and beliefs function as moral guidance for children, and, through narration, places become alive and people who are part of the stories are remembered. The language used in reindeer herding is important, as one word can, for example, contain an explanation that is rich in detail. A child learns best by being around when activities take place. The Sámi language abounds in words that are connected with and explain in detail the landscape and, for example, the care and routes of the reindeer. Language is also a means of communicating: not knowing it makes it harder to communicate with other herders.

Reindeer-herding knowledge is traditional knowledge, and one of its characteristics is that a variety of skills can be taught simultaneously. For example, spiritual knowledge can be taught in connection with practical work. Another characteristic is that skills are passed down through doing. Therefore, it is impossible to train people for reindeer herding just at school. Still, in terms of sustainable development, reindeer-herding knowledge is important, and, thus, we should discuss how to maintain this knowledge in future.

Translated by Kaija Anttonen